


MÊNÀ MAPENDI À NZAMBI

 Twasàkidila, Mwanèètù Neville. Eci ncyenze bu—bu cimbazùle mêmè. Ncìvwa ne cyà kwikala apa leelù to. Kàdi, dilòlòlò edi ndilòlòlò dìdì mèèsà à Mukalenge, kàdi mvwa—kàdi mvwa mwele meeji ne mvwa ne cyà kulwa mu dindà emu. Ki mêmè kubùkila Mwanèètù Neville, e kwambayè ne: “Èè, mpindyewu, pawikalà ulwa,” yèyè ne: “bwà cinyi kùyikù mwà kutwàkwilaku nànsha ndambù mukesè?”

² Ki mêmè kudyàmbidila ne, èè, bu mêmè mwà kupweka, ne bìvwa mwà kwenzeka, ncìvwa mufwànyine kuyiisha to, kàdi mvwa mufwànyine kwakula ne èkèleeziyà katanci kakesè pa maalù àdì, nudi bamanye’s, andì ngeela meeji ne àdì mwà kukolesha èkèleeziyà.

³ Tucìdì tufùmínaku ku lwètù—ku lwendu lwètù lwà dilemba dyà mu muvù wà mabèji àpòòpoka, mêmè ne bânà bèètù, kaaba aka, ne tuvwa bapicìle mu cikondo cyà butùmbi. Tudi—tudi ne disàkidila dyàbúngì, bònsò bwètù bapàte, ne—ne bapete nyama yètù yitùvwa tulemba ayi. Nènku—nènku mêmè ne mpaasàtà wètù tudi bamanyè ne munyiinyi wà kashà awu mmwìmpè, mmwìmpè wà menemene. Nànku tuvwa bapete ndambù wa tushà twìmpè. Ki mêmè kupeta ours ne tushà tùbìdì. Ki twètù kwalukila.

⁴ Ne eci cìdì ne cyà kwikala cikondo cìndì ne cyà kwakula pa Bitampì mwandamutekète byà ndekeelu abi. Kàdi kabàvwa balongòlole èkèleeziyà to. Nènku kùdì cintu kampànda, cipùmbìshi, cìdì cicyenzèje. Aci, ndi ngeela meeji ne cimenga cìdì citùpèèsha lutàtù, bwalu katwèna ne myaba mikùmbàne yà kuteeka màshinyi bwà búngì bwà bantu batwìkalà. . . bikalà èkèleeziyà mwà kwambula.

⁵ Tudi baswe èkèleeziyà mupyamùpyà ibakiibwè mwaba ewu, nènku tudi ne ndambù wa mfranga mimana kulongolola, nènku—nènku mbwà kwasa è—èkèleeziyà mutàmbe bunèe. Kàdi patùvwa ne masangisha aa, mòna’s nudi bùmvve cìdì bwalu. Ncintu cìdì cyenza luse be. Bantu bàdì mu nyungulukilu wa bimanu, pambèlu mu mvùla, ne—ne—ne bìdì ànu byènza bibì be. Nènku didyùla dìdì dífùmina nànsha kùdì balunda bàanyì. Bàmba ne: “Mwanèètù Branham, mbyenze ànu bu ne bóbò. . .” Ngàngàbukà mulunda wanyì, kwambaye ne: “S’udikù mwà kupeta kaaba kampànda.” Kwambayè ne: “Ndi ndyùm vwa bibì, padìbo bàpita apu.”

⁶ Mungàngà mukàji mutumba naanyì, kwambayè ne: “Mòna’s, ndi mupicìlekù mu dindà kampànda pa dìbà itàànu jaajaaja. Uvwa ne cyàkwikalapu. . .” Yèyè ne: “Bantu bàkavwa bakùngwile mu nyungulukilu wa èkèleeziyà awu kwìnshi

aku, pa díbà itaanu wa dindà jaajaaja. Wèwè uvwa ne cyà kwikalaku pa díbà citèemà ne tusunsa makumi àsàtù.” Pa nànkù, nwamònu’s, ke cìdì cìcivwija cikolè ncyòci aci.

⁷ Nènku tudi baswè èkèleeziyà udi ne mwaba kampànda wà kusòmba, ne mwaba wùdì bantu bònsò mwà kusòmba. Ne tudi twela meeji ne tudi ne mwoyi mu matùkù à ndekeelu, twitabuuja aci. Bwà ne mwaba ùdì. . . Tuvwa ne cyà kwikala tulongesha Èkèleeziyà bwà—bwà—bwà bintu ebi, disongoloka adi, bintu bìvwà byambìbwe mu cipròfetà, bìmwè byà ku byòbì, kùkaadi bidimu binunu. Nènku bwà bidimu bitwè ku makumi àbìdì ne bitaanu anyì makumi àsàtù, ànu kuumukila ku ewu èkèleeziyà ewu, bìvwà byamba mu cipròfetà, bìvwà ne cyà kwenzeka. Nènku mpindyewu nyèwù tudi tùbìmona byènzeka buludi. Pa nànkù bìvwà bitùkèngela kuvwijilula bintu ebi bipyabìpyà, kàdì katwèna ne mwaba mukùmbàne to. Pa nànkù mu dindà emu. . .

⁸ Mvwa ngenza mabiikila àànyì ne bikwàbò, makèlèlèlà awu, ne ndi ne makwàbò àà kwenza, mu mapingaja emu, ne bikwàbò. Ne pashìishe mvwa ne bantu kampànda bàvwà bajinga bwà kubwela, nsongààlùme wa maalu malenga, udi ànu ne mutù munyùngùlùke, mwambi naanyì mu budimi bwà bwambi. Ne bààbùngì bàà mùshindù awu, ne mwanèètù kampànda mufùmine ku Norvège. Nènku—nènku tuvwa ne miyuuki mikese paanyimà apa mu cibambalu cyà ku mfundu eku. Ki mèmè ne: “Èè, mpindyewu, netùpatukè ànu cyanàànà.”

⁹ Ke Mwanèètù Neville kwambayè ne: “Èè, tudi tujinga bwà ùpàtukè ùlwa kwamba mèyì makesè bwà kukolesha Èkèleeziyà kakesè.” Cyàkumpàl- . . .

¹⁰ Cìmwè cyà ku bintu byà kumpàla bìndì njinga kwamba. Mvwa mufunde tuntu ndambù pa dibèji apa, twà ne, pàndì ndwa mu èkèleeziyà emu, tùmvwà muswè kwamba. Cintu cìmwè cìmvwà mufunde mwaba ewu cìvwa citàngila lufù lwà Mwanèètù munanga Taylor patùvwà bayè.

¹¹ Mwanèètù Taylor ùvwa ùlwalwalwa mu èkèleeziyà emu bidimu ne bidimu. Bònsò bwètù tuvwa bamumanyè, ndi mutwishìbwe. Kàdì kwòkò kufwànyine kwikala beenyi mwab’ewu, ùvwa mmukùlumpè wa mushinga mukolè wa dipòkò uvwa ukupetela nkwasà, bwà kukusòmbesha awu. Mwanèètù Taylor, musangu wà ndekeelu ungàkamumòna mpindyewu, too ne mungàmumòna nsongà, ùvwa mwimane ku ciibi kwàka kùkaadi maadyàlumingu àsàtù anyì ànaayi. Kwambayè ne: “Mvwa njinga kupetakù ndambù wa mikàndà, Mwanèètù Branham. Mvwa njinga kwabanyakù mikàndà eyi.” Pa nànkù tudi, yèyè. . .

¹² Cìndì ngùmvwà ncyà ne ùvwa ne dìsaama dyà nsùkaadi ne mubwele mu kòoma, kàdì kàvwa. . . kàvwa mumanye ne ùvwa ne dìsaama dyà nsùkaadi nànsha. Ne—ne ùvwa. . . Wàkafwà. Yèyè kààkafwàku to. Wàkaya ànu bwà kiikala ne Mukalenge Yesù.

13 Kàdi ùvwa mwena lulamatu, mwanèètù wa dikèma, misangu yònsò ànu mweledi wa bantu bakwàbò meeji. Nènku dyèndè disànka òvwa dyà kuteeta bwà kupetelakù muntu kampànda mwaba wà kusòmba, pàvwàye ùlwa mu èkèleeziyà. Kàdi nudi bamanyè's, pàmwàpa, patùdì tusambuka mushoonyi wà Mùkalu, kabyàkwikalakù bìmpe bwà kumònakù Mwanèètù Taylor kuntwaku, ùtupetela mwaba wà kusòmba, luseke lukwàbò lwàlwa anyi?

14 Ndi ngeela meeji ne, bwà kuvùluka Mwanèètù Taylor. . . Nciwva mwaba ewu bwà kuciyiikila ne Mwanèètù Neville to, ku citàlù cyèndè, kàdi ndi mswè kwamba òyi dyà dyanyisha dyànyì, kùdì mukàmbà wende. Mwanèètù wa bakàjì Taylor, ngeela meeji, ùdì mwab'ewu mwaba kampànda mu dindà emu, mwoyi wèndè wà lulamatu ùbènèshibwè!

15 Mwanèètù Taylor, ònga ditùkù kwambayè ne: “Wàlwà kumònanganakù naanyì. Ndi ne kaadijiba kakesè kuumbula mwaba ewu, ndi mwelemù ndambù wa mishipa, pa nànkù udi mwà kulwa kulòbakù.” Misangu yònsò wèlela muntu mukwàbò meeji. Kàdi kùvwa Muntu kampànda uvwa umwelela meeji, awu ùvwa n'Kilistò, bwà kumupa lupàndu.

16 Ngeela meeji, bwà kumuvùluka, kàbidì, bwà èkèleeziyà ewu, bu mudiye mukùngwila bu mubidi ùmwè mu dindà emu, twimanàayi cyàpàmwè, twinyikàayi mitù yètù kumpàla kwà Nzambì.

17 Taatù wetù wa mu Dyulu, twètù bu bantu mu dindà emu, ne—bàtù balwa mwaba ewu wà dikuukwila. . . Cianza cyèbè cinène ncikwàte mudimu munkaci mwètù ne cyangàte kutùdì umwe wà ku bânà bèètù bananga utùvwa banange, ne bamanyè ne Wèwè uvwa mumunange. Kàdi Wèwè uvwa ne kabingila bwà byònsò ebi, Mukalenge, cyanààna kabìvwa mwà kwikala byenzèke mùshindù ewu nànsha, bu mutùdì bamanyè ne Bible wetù ùdì ùtwàmbila, ne: “Bintu byònsò bìdì byenzeka bwà dyàkalenga dyà bàdì banange Nzambì.” Ne ke mùvwàbì bwèndè.

18 Nènku tudi tukènzakana, pa buloba apa, ne tusangana ne bufùki mu mishundù yònsò bùdì bwàkula neetù, ne lukita kalwèna mwà kumulama to, bwalu pa buloba yèyè wàkàkùmbàja kiipacila kaWàkamutumina bwà yèyè kwenza. Yèyè ùvwa mwanèètù mwímpe, wa lulamatu.

19 Tudi tusangana aci mu mwoyi wà bukwàmici, ne mu mwoyi wa òbà òdì òjuukà mu dindà bwà kutùpèèsha bukènkè. Nènku munkaci mwà ditùkù òdì òlwa cikondo cyà bukùlumpe. Nènku pashìshe òlòlò òdì òfwa kàbidì, ànu bwà kujuuka kàbidì mu dindà dyàlondà, ne cyashima ne dipyàdìpyà, bwalu òvwa dikùmbàje kiipacila kàà Nzambì.

20 Tudi tumòna bilòngò pàdìbì bìbwayika ne bìlengèja buloba ne bìlengèja bìbambalu byà madilu, ne myaba yà mafestò à òbàkà, ne bìkùmbàja kiipacila; bìkangula mwoyi wàbì ne bìfila,

kakùyi mushinga mufuta, bwìci kùdì lubùlùbùlù, ne mànànanshi kùdì mupìci wa njila, bulenga kùdì mukèbi. Cìfila cyònsò cidici naaci, ku mudimu wà Nzambì, pashìishe cìdì cinyika mutù wàcì mukesè awu. Kàdi pàdì movù wà bintu bitòloka ùpingana, cidi cijuuka kàbidì, bwalu cidi cikumbàja kiipacila kà Nzambì.

²¹ Pashìishe mu mpàla wa bufùki bwònsò, ne Bible, mulayi, ne Nyumà Mwímpè, tudi mwà kucyònkòmoka ne disànka mu mwoyi wètù, pa kumanya ne Mwanèètù Taylor, byà mwomùmwè, Mukalenga, wàkakùmjàja kiipàcila kàà Nzambì. Kàdi bwà kwamba ne kàakubiika ku lufù aci ncifwànyine kwikala kuvila kwà Bible, kwà Nzambì wètù, ne kwà bintu byònsò bìdì Nzambì mutùpèeshe bwà twètù kubitàngila, bwà kumanya ne kùdì dibìikà dyà ku lufù. Pa nàнку tudi bindile cikondo citwikalà mwà kumumòna cyàkàbidì, pìikalàye nsonga ne bukolè bwà mubidi ne kàciyi kàbidì mwà kusaama anyi kukùlakaja to.

²² Bèneshàku mukàjèndè wa mushinga mukolè, mwena dyèndè wa lulamatu awu. Mwàtùtácishàbi mwine ntànta mule, bwà kubènga kubàmòna kàbidì, Mukalenge, mutùvwà tubàmòna bàya pàmwè ku dijiba, ne bàsòmba pa túbasa tukesè pambèlu pààpa, munkaci mwà kuloba, ne kuyiikila, ne mùshindù mene ùvwàbo bananga bàà menemene.

²³ Nènku mpindyewu tudi bamanyè ne kùdì Ditùkù dinène didì dilwa, pìikalà bilòbo byà diitabuujà ne cyà kwendela mwinshì mwà ntafu munene wa bucìmunyi, ne Banjèlò bàà. . . nebùwuje mpèpele ne misambu. Netùbàmòne kàbidì mu mwaba awu.

²⁴ Too ne díbà adi, Mukalenge, tùpèeshèku bukìtù. Tùbènèshèku ne tükwàcishèku. Ntàntà mule Mwanèètù Taylor neàtùpangike, ne muntu yònsò utu ulwa mu èkèleeziyà ewu, mùvwàye wimana ku ciibi kwàka ne ùpetela muntu uvwa ulwa mwaba bwà kuteelejaye Dìyi dyà Nzambì, ne bwà kusòmbayè mucyankàme ne kwikisha.

²⁵ Ditùkù adi pàakasabukàye, Mukalenge, ngàkalòmba ne Mwarkanjèlò munène wa Nzambì imàna mwaba awu ku ciibi, bwà kumupetelakù pèndè, mwaba, Mukalenge, bwà wàmòna mwà kusòmbakù. Bwalu mbafunde mu Bible ne: “Beena luse nebàpetè luse.” Too ne patwàmumòna, Mukalenge, swàku bwà bivùlukilu bitùngunuke ne kwikala byà kalolo munda mwà myòyi yètù, too ne ku ditùkù kampànda patwàtwilanganà cyàkàbidì mu Buloba bukwàbò. Mu Dìna dyà Yesù Kilistò mmutùdì tulòmba nùнку. Amen.

²⁶ Neàpangikè ntàntà mule munkaci mwètù ne munkaci mwà beenyi, ne bakwàbò, bàtù bàlwa mu èkèleeziyà wètù, anyi mu citanda cyètù emu, bwà kukuukwila. Swàku bwà musùkà wèndè wikishè mu ditalala kumpàla kwà Nzambì, too ne ku Ditùkù adi.

²⁷ Dìnga ditùkù, kàbidì, yònsò wa kutùdì neàye, ku umwe ku umwe, too ne mutwàpweka ne mulongo mùshindù awu.

Nènku mpindyewu, patùcìdì ne dîbà, ne mùshindù apa, tudilongòlòlaayi bwà cikondo aci cidì cyènda cilwa; bwalu katwèna bamanyè dîbà dîikalàci to. Katwèna bamanyè ne nganyì walonda to. Tùsombàayi nsòmbelu wa ne, ku ditùkù dyònsò, bwà ne bu cyòci mwà kulwa, ciikale bwètù twètù, netwikalè badilongòlòle.

²⁸ Mpindyewu, ndi njinga kufila mamanyisha. Mpindyewu, mu mutanci mukesè emu, pàmwàpa, mîngà misangu, ncyèna muyiikilàngàne ne balubuludi kacya ngàalukila, pa bidì bitàngilà mùshindù wà kwibaka è—èkèleeziyà kaaba aka to, anyi citwikalà ne cyà kwenza matùkù àdì kumpàla eku, kufikisha èkèleeziyà wetù mu mùshindù wà twamona mwà kwenza masangisha ètù. Pashiishe nentùngùnuke, mfwilaayiku luse, ne—ne Bitampì Mwandamutekète, ne pashiishe Mpànzà Mwandamutekète, ne bintu bikwàbò byàbùngi kàbidì bitwikalà ne cyà kubwelamù, kakùyì dijànguluka to.

²⁹ Nènku mpindyewu, mu dyàlumingu dyàlondà mu dindà, dyàdya, ndi ne cyà kwikala ku Elisabethtown, mu Kentucky, ne Mwanèètù L.G. Hoover, ku—ku mudimu wà dijidila dyà ntèmpelù. Nènku mbwà kajidila tabernacle mupyamùpyà, anyi tabernacle udibò basùmbe mu Elisabethtown, mu Kentucky. Upweka ànu ne njila wa 62 too ne mùyààya kafika ku Elisabethtown, anyi upweka ànu, mvwa nswa kwamba ne, njila wa 31, anyi kwinshi kwà cibeeba cyà mpungà. Ànu lwà mu masangu amu, ciyààya kakufikisha ku Elisabethtown. Cidi bu mu ntàntà wa dîbà dijimà nàнку awu. Cidi bu mu ntàntà wa kilòmèètà makumi àtaanu ne yisambòmbò, makumi àsambòmbò ne inaayi lwà kwinshì aku. Ngeela meeji ne, mitwè ku makumi àsambòmbò ne inaayi, mu njila wa . . . wa 31, ne yipacila ku makumi àtaanu ne yisambòmbò, anyi cintu kampànda, munga njila, kupweka lwà ku cibeeba cyà mpungà. Mmu mùsèèsù wà Mulberry.

³⁰ Mudimu wà dibanjija dyà ntèmpelù. Mwanèètù Hoover neikalè ne Kàlaasà kàà dyàlumingu kàà cibidilu pa dîbà dikumi jaajaja. Nènku ndi ne cyà kuyiisha mu disangisha dyà dibanjija adi, kuumukila ku dîba dikumi ne umwe too ne ku dîbà dikumi ne ibidì, mu dyàlumingu didì dilonda edi, dyà matùkù dikumi ne dimwè à ngondo wa dikumi ne umwe.

³¹ Ku cibàsà cyà mamanyisha cidì pambèlu cyàcya, kùdi—mamanyisha pa bwalu ebu. Nènku nekwikalè ku . . . Nenwikale mwà kupetela njila wenù kuumukila ànu kwòkù aku. Mmu mùsèèsù wà Mulberry. Anyi bòbò—bòbò mbaleeje njila ku . . . Cidi ku cibàsà cyà mamanyisha cidì pambèlu pàapa mumpàla mwà èkèleeziyà ewu.

³² Pashiishe, mu—mu dyà matùkù makumi àbidì ne—ne àbidì à ngondo wa dikumi ne umwe, ndi—ndi ne cyà kwikala ku Shreveport, mu Louisiane, mu dyà matùkù makumi àbidì ne

àbidì, dyà makumi àbidì ne àsàtù, dyà makumi àbidì ne ànaayi, dyà makumi àbidì ne àtaanu, ne—ne dyà makumi àbidì ne àsambòmbò. Matùkù àtaanu, ngeela meeji, ku Shreveport, mu Louisiane, ku Life Tabernacle. Aci cidi ne Mwanèètù Moore. Bàdi bàtwa cyanga cyàbò cyà ngòlò. Dibènesha dyà mpenta dyàkapòna mu Shreveport, mu Louisiane, kùkaadi bidimu makùmi àtaanu, mu dyà matùkù makumi àbidì ne àbidì à ngondo ewu. Kùkaadi bidimu makumi àtaanu, bìvwà mukenji wa mpenta wà kumpàla muyishìbwe. Ne kuponayè, Nyumà Mwímpè kuponayè, mu Louisiane. E kupetabo civùlukilu ku cyòcì aci, nènku eci ncyanga cyà ngòlò. Nènku ndi ne cyà kwakula pa cyanga eci, malòòlò àtaanu, ne Mwanèètù Moore, ku Shreveport, mu Life Tabernacle.

³³ Wèwè ne balunda kampànda mwômò amu ne mu nyùngulukilu, mòna's, baùdi muswè kufùndila, anyì cintu kampànda, netwikale ne disànkà bwà kulwabo. Nànku bambile wèwè bwà masangisha àdi àlwa aa.

³⁴ Nènku ku Life Tabernacle, piikalà muntu kanà yònsò ewu ùkaadiku kacyà mutwilangane kuntwaku ne Mwanèètù Moore, yèyè's mmuntu mulenga wa dikèma. Ne kùdi musumbà wà bantu balenga bàà dikèma, bantu bà kale bàà ku Sud abu. Kwena ànu mwà kubàfùdisha to. Ne pa nànku, Life Tabernacle, muntu kanà yònsò udi mu nyùngulwilu wa Shreveport udi mwà kukwambila ne mpenyi pàdiye ùsanganyiibwa. Shreveport udi ne bantu batwè ku binunu nkàmà yìbidì. Ne ùdi cimenga cilenga, muule tètè ne nzùbu yà bilàla beenyi. Pa nànku. . .

³⁵ Nènku tabernacle ùdi tabernacle mwalàbàle, tabernacle mwalàbàle bikolè bitàmbe. Ùdi ne nzùbu yà kuulu, ne bisàsà, ne nzùbu minène yà mwinshì, ne pashìishe ne cikwàbò cisàsà kuulu. Nenku mùdi myaba yàbùngì menemene. Cìdi ànu buludiludì menemene ne cibambalu cyà komine cyà cibwela bantu binunu bitaanu aci. Mbyenze ànu—ànu bu kusambuluka mùsèsèsù ewu, ukafika ku cibambalu cyà komine aci.

³⁶ Ne Rev. Jack T. Moore, anyì—anyì nànsha Life Tabernacle ku Shreveport, mu Louisiane. Cìdi cibanga mu dyà makumi àbidì ne àbidì. Necikalè mu disàat-. . .Kuumukila mu dìnaayi too ne ku dyàlumingu. Dìnaayi, dìtaanu, disambòmbò, dyàlumingu, matùkù ànaayi pamutù pàà àtaanu. Mfwilaayikù luse. Netwikale dyà matùkù makumi àbidì ne àbidì, dyà makumi àbidì ne àsàtù, dyà makumii àbidì ne ànaayi, ne dyà makumi àbidì ne àtaanu. Ngeela meeji ne ke mùshindù ùdìbi, à—à ngondo wa dikumi ne umwe.

³⁷ Nènku pashìishe, netùjandulè díbà adi cìdi bwalu, citùdi benze bwà èkèleeziyà ewu, bwà kujandula mùshindù ùdi èkèleeziyà mulubùlùke bwà kupeta wendè nzùbu. Biibaki bàdi batwàmbila bwà se bàdi mwà kwangata bantu bàbùngì ku mudimu awu, mu mùshindù wà ne mu matùkù matwè ku

dikumi bàdi mwà kumujikija twètù bafwànyine kubwelamù, nwamònu's, ne lùkàsà lwònsò. Mbindile ànu bwà cimenga kutwàci cyàlà. Nudi bamanyè's, ne bikèngela twikalè ne mwaba bunène bukumbàne wà kwimanyikila màshinyi, ne *ebi* ne byabya búngi bukumbàne. Nènku, kaa, ekèlekèle, mmishingà búngi cyanààna yà kwenza, bwà kutwàdija kwibaka ní ncinyi ní ncinyi cyònsò. Kàdi ndi muswè kulwa kùdi èkèleeziyà kumpàlà kwà mèmè kwalukila cyàkàbìdi mu budimi bwà bwambi.

³⁸ Mpindyewu ndi ne dibìikila dyà ku Tanganyika, ku Uganda, ne kwònsò aku. Joseph ùdi ne masangisha malongolola bwà kutwàdijawù mu ngondo wa Lwìshì.

³⁹ Kàdi makèèlèlà awu, pangààbwedi, kùvwa bàna bèètù kampànda, ne Mwanèètù wa bakàji Thoms ne bakwàbò, bàfùmina dyàmwàmwa dyà mbù, bàvwa balwè. Nènku mvwa . . . mvwa musangàne dibèji difùnda dintékela ku ciibi cyànyi, anyi—anyi dibìikila dyà ku—ku nsangilu kampànda wa Àfrikè du Sud. Pa nànkù ndi mbàfùndila, bwà kumanya ànu menemene cidi ne cyà kwenjiibwa. Pàmwàpa, pàngiikale kwine aku apu, ndi mwà kupweka mu Àfrikè du Sud, pàmwàpa, mu citùpà cyà ndekeelu cyà ngondo wa Lwìshì ne wa Lwabanya nkàsu, mu cipòlò cyà cikondo aci.

⁴⁰ Kàdi tudi ne ditèkemena dyà kwimanyika èkèleeziyà, bwà mèmè kubwejamù Bikondo byà Èkèleeziyà ebi, kumpàlà—kumpàlà kwà muvù wà mashika kutwàdijawu, bu byòbì mwà kwenzeka. Mèmè nciyi mwenze nànkù to, anyi pàngiikala ne cyà kufuma kwòkò aku, bu Mukalenge Yesù mwà kunèga.

⁴¹ Mvwa munkaci mwà kutèeleja makèèlèlà awu, pàmvwà ngènda ngàngata, ngeela meeji ne ciywa ditùkù divwà didyànjidile makèèlèlà awu adi, pa mukàbà wà mèyi. Mèmè kudyàmbidila ne mvwa muwùtèlèlèje wàkula mwab'ewu mu dindà emu. Mwanèètù mutekète wa ku Sud kampànda ùvwa ne . . . Mamwèndè ùvwa mubwele mu disangisha. Ùvwa ne cyùjà cyà kansère kàà ku dibèlèlè, ne ùvwa mubwikila kùdi mundidimbi wà lufù. Ke Nyumà Mwimpe, mu dimwè dyà ku masangisha à matùkù mashààle aa ku Southern Pines kwaka, ngeela meeji ne nkwòkò, anyi mwaba kampànda, kumwambilayè, wàmba bwà cyùjà cyà kansère kendè aku, ne dína dyèndè, ne kùvwaye ùfùmina. Kàdi kumwambila ne yèyè ùvwa ne mwànà wa balùme mutwè cimpingà, ne ùvwa ne cyà kupetakana ne njiwu, ne kulumbulula bwà dishipangana dyà ku mpùkàpùkà. Ne bintu byàbúngi byà mùshindù awu. Nènku mulùmyàna ewu . . .

⁴² Byònsò byàkenzeka ànu mùshindù awu. Ne cyùjà cyèndè cyà kansère aku, ànyi cyùja cyèndè cyà kansère aci, èyowà's wè, cyàkamuumuka. Ciinè aci cidi ne, cyùja cyà kansère aci's nkansère, nudi bamanyè's. Ki dibà adi ku—kumuumukaku. Nènku nsongàalùmè awu wàkalumbulula bwà dishipa

dyà muntu ku mpükàpùkà, ne maalu wònsò ànu mùvwà Nyumà Mwímpe mwámbe. Ne wàkalombodìibwa kùdi Kilistò, cyàkàbìdi. Ke kucikwàtayè pa mukàbà wà mèyì, ne mèmè—mèmè kucyùmvwa cyàkula. Nuvwakù basánke bwà ngaakwilù mukesè, wà kale wà cyena Sud awu anyi? [Disangisha didi dyàmba ne: “Amen.”—Muf.] Yèyè ne: “Lwà kwìnshì eku mu Caroline wa ku Nord,” mwàkambaye. Kaa, ndi munange ànu aci, bantu bàà kale bàà ku Sud abu. Nènku ùvwa ne. . . Ke Mukalenge kutùgunukayè ne kumubènèsha. Yèyè ne: “Ndi mumanyè ne udi wamba ne kwèna uyiisha dilongesha to, Mwanèètù Branham; ànu ku disangisha dyèbè nkààyaakù.” Yèyè ne: “Twètù tudi citùpà cyà disangisha dyèbè.” Pa nànkù aci cìvwa cilenga kudiye, bwà kwamba nànkù.

⁴³ Kàdi mpindyewu kùdi cimfwànyì kampànda, ngeela meeji, pàmwàpa, cidi ku cibàsà cyà mamanyisha mu dindà emu. Cyòci kaciyikù to, Billy neàcitéèkeku. Misangu yàbùngì bàvwa bàmbè, pàncìvwa mbangilakù kwakula, bàvwa bàmba ne: “Udi ànu ufwànyikija cyanààna, Mwanèètù Branham, bwà ne wèwè udi mumòne Bukènkè abu, Bukènkè abu.” Pàmwàpa, mbikolè bwà. . .

⁴⁴ Nkufwànyine kwikala kushààle bàmwè kaaba aka, beena kale bàdi bavùlùke, kumpàla kwà fòtò yààCì kwikalayiku mikwàcìbwe. Kùdiku muntu mwab'ewu muvùlùke pàmvwà ncyàmba, kale menemene anyi? Tàngilààyi's. Byanza bitwè ànu ku binaayi ànyì bitaanu cyanààna. Mwanèètù wa bakàjì Spencer ewu, ne Mwanèètù wa balùme ne Mwanèètù wa bakàjì Slaughter, ne—ne mwanèètù wa balùme *ewu*, ne mwanèètù wa balùme udi lwà kwàka *wàwa*. Bàdi ànu beena kale bàtaanu ànyì bàsambòmbò bàdi bashààle.

⁴⁵ Èè, mpindyewu, paanyimà pàà cikondo kampànda, disù dyà cyamù cyà fòtò kukwàtadi fòtò awu. Pa nànkù kuyayè ku Washington, DC e kupìcilayè ku bakenkeci, ne kwalukilayè ne: “Ki mmütentàmangane anyi cintu kampànda to.” Kwambayè ne: “Bukènkè mbutuute mu lumwènù.” Ki George J. Lacy awu. Nudi ne dìnà dyèndè difùndapù. Nwamònu anyi?

⁴⁶ Èè, nènku, misangu yàbùngì nutu nungumvwa, ntàngila ngàmba ne: “Nkwákù kùdi mundidìmbì mufiike pamutù pàà muntu *ewu*. Mmundidìmbì wà lufù.” Mbanganyì bàkaadi bangùmve ngàmba nànkù? Misangu yàbùngì, nwamònu's, misangu yàbùngì. Èè, mbyenzèke ne cyamù cyà fòtò cyàkakwàta cyòci aci. Nènku tudi naaci kaaba aka.

⁴⁷ Inàbànzà uvwa mulwè kwambila mwanèètù wa bakàjì kampànda, mu disangisha mu—mu Caroline, mutùvwà benze masangisha malenga à njàjàmà ku Southern Pines. Nènku kwòkò aku, inàbànzà awu ùvwa ùpùnga ne lufù ne kansèrè ku mabèlè wònsò àbìdi. Kàdi bangàngàbukà bàvwa bamwele làà bwà kudifwilayè. Ke inàbànzà awu kwìnamayè è kumukwàtayè

fôtô, ànu pâmvwà mmwambile ne yêyè ùvwa nganyi, ne kùvwàye ùfùmìna. Ki mèmè kwamba ne: “Nkwèkù kùdi mundidìmbi mufiike pamutù pèèbè. Udi mubwikidija kùdi mundidìmbi wà lufù.” Ke inàbànzà awu kubàkula fôtô wà cyôci eci. Nènku ki cyôci eci pa dîsù dyà cyamù cyà fôtô, cibàkùle mundidìmbi wà lufù.

⁴⁸ Ní nuvwàku bônso bamòne *Mèyi Matùma Dikumi*, ne bamòne mwanjèlò wa lufù, mwà kàsemenàye, mu mundidìmbi mufiike awu, ùvwa ùmwèka wà mifitù, udi ùsanganyiibwa mu fôtô ewu. Nènku ndi ngeela meeji ne cidi ku cibàsà cyà mamanyisha mpindyewu. Cyôci kaciyikù to, Billy ùdi mwà kwikala muntèèlèje, mòna’s, àcitèèke ku cibàsà cyà mamanyisha. Nènku cidi ne muketa munkaci mwà kufunkuna mwinè muntu awu. Ne mwinè muntu awu, mundidìmbi kuumukawù pa mukàjì awu, ne kwondopiibwayè mu mùshindù wà cishimà. Kàdi ncyênze ànu bu cijiku, mwìshì mufiike mungwile mwênze cijiku pa inàbànzà awu, mulembèlèle pa kansèrè aku mùshindù awu, uumukila lwà eku. Mu bushùwà bwà bwalu, ke kùdi mundidìmbi wà lufù ùpòngolodiibwa mu yèyè, kàbìdì, ùumukila ku kansèrè aka.

⁴⁹ Èè, nànsha wèwè muteete bwà kwambila bantu Bulelèlè mùshindù kaayi, nekwikale ànu muntu kampànda wèlè mpatà ne Kí m’Bulelèlè to. Nènku wèwè ànu mwambè misangu yònsò Bulelèlè, dîbà adi udi mumanyè ne udi—udi mubingè.

⁵⁰ Ndi ne mulunda wànyì udi mwena citùpà cyà buloba cidi ne ferme yà nyama, lwà ku Wesètè kwàka. Nànku—nànku beena mudimu wà bukùbi bàvwa bafutè ndola mitwè ku binunu binaayi bwà màshinyi à cikònga-nèjè, bwà kubadika bisùmbù byà mbudi yìvwà mishààle mu cibandabanda cyà Troublesome Valley. Mukalenga Jeverez uvwa usòmba mwab’ewu mu èkèleeziyà emu, ngaakamulombola kùdi Kilistò, ùvwa mwena bupidyà wètù wa menemene ewu. Ne nukàvwakù bùmvwè ndonda bwalu bwà mutùvwà tunyemesha tùbalù pàmwè. Kàdi kàvwa wìtabuuja cìngà cintu to pa kuumusha dilongesha dyà Darwin. “Ne Mwànà wa mu dibòko awu, mulela virgo, civwa cintu cyà macimbu.” Kàdi twakaasa citùdilu dilòdòlò adi ànu pa mwaba menemene wàkiitabilàye Kilistò awu.

⁵¹ Ke nànku dîbà adi muntu ewu kubàmbilayè. Yèyè kwamba ne: “Mpindyewu, kanwèna ne cyà kusùmba màshinyi awu to, màshinyi à cikònga-nèjè awu.” Wàmba ne: “Nennwambile menemene búngì bwà mbudi yìdì kuntu kwàka.” Yèyè ne: “Yìdikù dikumi ne citèèmà.” Kwambayè ne: “Yìvwa makumi àbìdì- . . . Yìvwa makumi àbìdì ne umwe, ki mèmè kushebeya yìbìdì yà ku yòyi.” Nènku ùvwa wàkula ne mulami wa lupangu lwà nyama. Udi mwenzejiibwe bwà kushebeya ànu umwèpelè. Ke kwambàye ne: “Yìvwa makumi àbìdì ne umwe, mèmè è kushebeya yìbìdì yà ku yòyi. Nkushààle dikumi ne citèèmà.”

Ki yèyè ne: “Èyowà’s, Jeff, ndi mumanyè ne nudi bashebèye yìbìdì mijimà.”

Kwambayè ne: “Èyowà.”

⁵² Èè, kwangatabò màshinyi à cikònga-nèjè, kubàndàbo kuntwaku, kuvwa mitù dikumi ne citèèmà yà mbudi. Ki yèyè ne: “Billy, ambila wèwè ànu muntu bulelèlà; kààkubwitàbuujakù to.”

⁵³ Pa nàнку ki mùdìbi ànu nàнку. Udi mwà kwambila bantu Bulelèlà, kàdi nànsha nàнку bàdi. . . Kùdi dyumvwa dibì dyàbùngì ne—ne mafi àbùngì be mu maalu bifikisha bantu too ne ku dibènga kwitabuuja ne udi ubàmbila Bulelèlà pèèbè munkaci mwà kubàmbila Bulelèlà. Nudi numòna anyi?

⁵⁴ Kàdi tudi ne kusàkidila kwàbùngì bwà ne tudi ne Taatù wa mu Dyulu Udi ushindika Bulelèlà ne dishindika. Mbulelèlà. Pa nàнку bu edi mwà kwikalaku nànsha ditùkù dyànyì dyà ndekeelu pa buloba, kùdi. . . nànsha bukèbikebi bwà maalu à mamanya ne bishindiki mbishindike ne ndi munwambile Bulelèlà pa bintu ebi. Ncyà bushùwà. M’Bulelèlà. Pa nàнку pàmwàpa neciikalè ku mboodi wa mamanyisha. Billy, udi mu cibambalu amu anyi? Udi naaci mu cyanza amu anyi, fòtò awu? Nàнку wèwè nendè, èè, patuka nendè pambèlu apa, díbà adi udi mwà kumukudika kuulu eku, bàdi mwà kumumòna pàmwàpa. Èè, ncyèna mumanye to. Nkufwànyine kwikala bukènkè ku—ku mboodi aku.

⁵⁵ Kàdi ki fòtò ewu—ki fòtò nyèyè ewu ànu mwab’ewu. Ngeela meeji ne kanwèna mwà kucimòna to. Kàdi *apa* mene nudi mwà kumòna mundidimbì wa lufù wà bu cijiku awu kumutù kwa mutù wà mukàjì awu. Nèнку dýì didì dicishindikije ndyòdi *edi*, kaaba kàvwà inàbànzà awu mukwàte fòto, bwà kumòna ní cìvwa cimwènèka menemene. Kàdi’s ki cyòcì eci, lwà—lwà mwaba awu. Mmundidimbì mwenze cijiku wà lufù.

⁵⁶ Udi mumòne mukàjì ewu, ànu udi lwà mwaba ewu anyi? Udi mucimòne, ngeela meeji, Mwanèètù Neville, kí mmwòmò anyi? [Mwanèètù Neville ùdi wàmba ne: “Èyowà.”—Muf.] Uh-huh.

⁵⁷ Pa nàнку, Billy neàcìtèèke pàmwàpa ku cibàsà cyà mamanyisha, bu wèwè mwà kuswà, Billy. Lwákù, ùcyangàte, unyunguluke naaci kumpàla kàdi ùcìtèèke ku cibàsà, bwà muntu yònsò wàcimòna mu dipàtuka. Yèyè anyi Doc, ewu anyi ewu. Mpindyewu mvwà ndyàmbidila ne, pàmwàpa, cìdi mwà kuleeja pa bùtooke menemene bwà nwamòna mwà kucimòna, kàdi mbitàmbe kubwìcidila bikolè bwà fòtò wa mùshindù awu. Kàdi neàmupatule pambèlu pààpa, bwà nwamòna mwà kumumòna, pàdìbò bènda bàpatuka apu.

Mpindyewu, nwavùlukaayi mamanyisha ònsò.

⁵⁸ Nèнку mpindyewu, mu dindà emu, mvwa ngeela meeji ne pàmwàpa ne tuvwa mwà kwakulaku ndambù pa cintu

kampànda bwà kukolesha èkèleeziyà, cintu kampànda cìdì mwà kutàmba kunupèesha. . .

⁵⁹ [Mwanèètù Doc Branham ùdì wàmba ne: “Udi dijinga ne mwéndù wàwa anyi?”—Muf.] Wambà cinyi? [“Udi dijinga ne mwéndù awupù anyi?”] Èyowà, Doc, bu wèwè mwà kuswa. Mbifwànyine kwikala bímpè.

⁶⁰ Ndi muswè kukwàta mudimu ne ewu nùнку. Mvwa ne. . . Yimwè yà ku yôyi kayivwa ne eci cilamikakù to, bwà lumingu lushàale elu, nàнку ki twètù kwela meeji ne pàngàpa udi mwà kuteemakù bímpe ndambù leelù ewu. Mvwa njinga kwakula bwà cyôci eci, bwalu cívwa cipetangana ne—ne cilòòtà cívwa mwanèètù wa bakàji mulòòte.

⁶¹ Ndi ndikonka Mwanèètù wa bakàji Shepherd ní ùdì mwà kwikala mu èkèleeziyà mu dindà emu. Mvwa mutwilàngane nendè dilòòlò adi. Nèнку musangu wà kumpàla wúmvwà mumòne mukàji awu, mu bushùwà bwà bwalu, ncívwa nànsha mumanyè ne yêyè ùvwà nganyi to. Ùdipu anyi? Ngeela meeji ne kènàpu to. Èyowà. Mbifwànyine kukutàcisha, ncifwànyine kwikala cintu cyà kaciyi mu cyôci, bu mèmè mwà kutèèla cilòòta aci anyi, Mwanèètù wa bakàji Shepherd? Kì mbifwànyine kukutàcisha to, mmwômò anyi? Èyo. Mmwômò.

Nèнку kumpàla kwà twètù kulenga cyôci aci, twinyikaayi kàbìdì mitù yètù mpindyewu.

⁶² Taatù wa mu Dyulu wa ngàsà, tudi tuKwalujila butùmbi bwà bwímpe Bwèbè ne luse. Nèнку mpindyewu, tùpòlesheku, Mukalenge, bwà twamònakù mwà kulonga Díyi dyà Nzambi udi ne mwoyi, bu mùdì dilwa kutùdì ku cìkèèna-kumòna ne dishindikìibwe kùdì Nyumà Mwímpe, dijaadikìibwe kùdì Bible. Pa nàнку tudi tulòmba bwà Wèwè kutùpèesha dyumvwa, bwà twamòna mwà kumanya cyà kwenza mu matùkù à ndekeelu aa patùdì tumòna makolè à bubi ènda àtùnyunguluka mpindyewu. Mvità, mvità yà ndekeelu yìdì ànu pabwìpì ne kulwìbwa. Tùkwàcisheku, Mukalenge. Bu balwanganyi balelèlà bàà mvità, bàà dikàndà, swàku twikale beele ngabu wa Diitabuuja muulu, biikàle ne Díyi dyà Nzambi, Mwele wa mvità, ne twenda tuya batàngile kumpàla. Mu Dìna dyà Yesù. Amen.

⁶³ Mpindyewu, twelangana meeji bwà kutàngila kumpàla, mvità, bu mùdì—beele mulongo bwà mvità, badilongolole bwà kukùtula mvità, mvità mi—milelèlà, bwà kulwangana mvità yà diitabuuja.

⁶⁴ Mwanèètù wa bakàji Shepherd ewu, ne Mwanèètù wa balùme Shepherd, bàdì balunda bèètù bananga balenga, ne bàtù bàlwa mu tabernacle emu. Kàbìdì mbànà bàà Nzambi bàà mushinga mukolè. Nèнку—nèнку Mwanèètù wa bakàji Shepherd ewu, pamvwà ngàngata mikàndà yànyi mimfùndila, yà bwena yìdì Billy mwà kwandamuna, pàdì muntu kampànda wàmba ànu ne: “Ntumineku tululù twà disambila twàbùngi.”

Nènku mémè kutùsambidila. Yèyè ùtu ànu ùbàndamuna. Kàdi wówò mwikale mukàndà wà muntu nkààyà, ndi ne cyà kuwàndamuna mémè nkààyanyì, nudi numòna's. Ki mémè kwangata mikàndà yànyì yà sungasunga, nènku mvwa nya naayi kumbèlu. Nènku mvwa mbalamù, bàmba ne: “Mufùmine kùdi Mwanèètu wa bakàji Shepherd.” Cìvwa ncilòòtà cìvwaye mulòòte, cyà—cyà kùkaadi ndambù wa ngondo. Kàdi kàvwakù mwà kucyumvwa bìmpè nànsha too ne mu maadyàlumingu àbìdi anyì àsàtù mashààle aa, pàngààkalongesha pa—pa *Bikondo Muwandamutekètè byà Èkèleeziyà* ebi ne—ne—ne mamuma mwandamutekète, Peetèlò Mwibìdi, mùdìbì bìlòmba, Peetèlò Mwibìdi 1 ne: “Kusàkidila ku diitabuuja dyètù.” Nwamònu anyì?

⁶⁵ Dyàmbedi, pa cishimikidi, n'Diitabuuja. Ciibìdi, sàkidila ku diitabuuja dyèbè, bukolè; ku bukolè bwèbè, dimanya; ku dimanya, didikanda; ku didikanda, lutùùlù; ku lutùùlù, difwànà dyà Nzambi; ne ku difwànà dyà Nzambi, dinanga dyà bwànà bwètù, dinangangana dyà bwànà bwètù; ne pashiishe dinanga, diikàle dibwe dyà mùsongà. Bintu abi mwandamutekètè. Bikondo mwandamutekètè byà èkèleeziyà, nwamònu's, ne mìtootò mwandamutekète yà bikondo byà èkèleeziyà, ne byònsò abi bikwàtakaja pàmwè kùdi nshàmenda wa Nyumà Mwìmpè.

⁶⁶ Mpindyewu, ki cìdì cìkèngelà bwà kulwa musadidi wa Kilistò ncyòci aci. Kilistò ùdi wibàkila Èkèleeziyà Wendè mu bikondo mwandamutekète byà èkèleeziyà; Mukàj'Èndè musèla, Mupersona, muntu mukàji, Èkèleeziyà. Bikondo mwandamutekète byà èkèleeziyà mbìdi byènza Mukàji-musèla. Bàmwè bàà mu cikondo *eci*, ne bàmwè bàà mu cikondo *aci*, ne bàmwè bàà mu cikondo *cyàcyà*, ne bònsò pàmwè, ne wènda ùmusonga bu cipaapu cyà musàkà.

⁶⁷ Bu Enòka, wàkiibaka bipaapu byà musàkà awu, mutùdi twitabuuja. Kàdi kacya dibwe dyà mùsongà kadìvwa ditèekiibwe pa yòyi to, bwalu dibwe dyà mùsongà dìvwa dimansha. Nènku tudì bangàte mpindyewu, kaciyi bu Dilongesha to, kàdi bwà kumvwa, ànu bwà èkèleeziyà ewu. Bwà sè byòbì ebi . . .

⁶⁸ Nzambi ùtu ùDìvwija mupwàngàne mu isàtù. Ùdi ùDìvwija mupwàngàne mu “Taatù, Mwànà, Nyumà Mwìmpè,” midimu yisàtù yà Nzambi umwèpelè. Ùdi ùDìvwija mupwàngàne mu “dibingishiibwa, dijidiibwa, dibàtiiza dyà Nyumà Mwìmpè,” kulwa mupwàngàne, byenzedi byà ngàsà. Ùdi ùDìvwija mupwàngàne mu kulwa kùsàtù: musangu wà kumpàla, bwà kupikula Mukàj'Èndè musèla; musangu mwibìdi, bwà kwakidila Mukàj'Èndè musèla; musangu mwisàtù, mu Bukalenge bwà bidimu cinunu ne Mukàj'Èndè musèla. Ne byònsò mbipwàngàne mu isàtù. Nènku mwandamutekète nnombà wa dikuukwila wa Nzambi. Nzambi ùdi ùkukudibwa mu mwandamutekète, mukùmbàne, mpindyewu mupwàngàne ne mukùmbàne.

69 Kàdi cintu cyà pabwàci civwa ne, kaciyi bwà kutwala eci to, kàdi ànu bwà kunuleeja, kashà kàà ndekèèlu kàmvwà mwàsè kàvwa ne matoba àtaanu ku luseke lùm wè ne àsàtù ku lukwàbò; nwamònu's, ngàsà ne bupwàngàne.

70 Mpindyewu tàngilàayi eci, Kilistò awu. Nzambì mmufùnde Bibles isàtù. Bible wa kumpàla ùvwa mu dyulu, ùbìikidiibwa ne cidiminanzaji. Mpindyewu, wèwè kùyì mumanyè Mukàndà wa Yobò to, ùcipwe ànu mwoyi cyanààna, bwalu, Yobò ngudi ucyùmvwija, mùshindù wàkatàngilaye muulu ne kwinyika bintu abi mènà mu dyulu.

71 Nènku mònaayi, mu cidiminanzaji, cyàkabanga ne cinyi? Cintu cyà kumpàla cidi mu cidiminanzaji m'virgo. Cintu cyà ndekeelu mu cidiminanzaji cidi n'Leo ntambwe. Dilwa dyà kumpàla dyà Kilistò, kupicila ku virgo. Dilwa diibìdi, Leo ntambwe, Ntambwe wa cisàmbà cyà Yudà.

72 Pashìshe Enòkà wàkajikija mu ditùkù dyèndè, anyi mu ditùkù adi, cipaapu cyà musàkà aci. Nènku civwa mwà. . . Mu bushùwà bwà bwalu, katwèna ne dībà dyà kucishindamijila pa bitùdì twamba to ne kuleeja ne cipaapu cyà musàkà aci cidi cibànda kupicila mu bibambalu ne bikwàbò. Cidi cyàkula buludì too ne ku cikondo cyà ndekeelu mpindyewu. Badi mu cibambalu cyà mfùmù mpindyewu, ku cipiminu. Kàdi dibwe dyà mùsongà kacya kadivwa dyanji kutèekibwa pa cipaapu cyà musàkà nànsha. Ne aci cidi cijaalama bipwàngàne, pa lwibaku, anyi—anyi pa bimanu. Mu mùshindù wà ne, nànsha. . . kapesè kakesè kàà kapaaya. . . Bòbò kī mbamayè mùvwàbò baciibàke nànsha, kabèèna bàcyùm vwa to, kapaaya kakàvwakù mwà kubwela munkaci mwà nseke ya mabwe mùvwà bitoci ne cyà kwikala amu to. Kàdi kaciyèna ne bitoci munda mwàci amu to. Cidi ànu cipwàngàja, citèèka pàm wè.

73 Ke cidiku ncyôci aci dībà didi Kilistò ne Èkèleeziyà bashààla umwe. Kakwèna bitoci pankaci apu to. Kakwèna cintu nànsha cìmwè pankaci to; ànu Nzambì ne muntu awu. Nzambì, Kilistò, ne muntu awu.

74 Mpindyewu, kàdi, dibwe dyà mùsongà, kacya kabàtukù banji kudìpeta to. Nudi bamanyè dibwe dyà Scone divwàbò naadi mu Àngleterre, bwà kubanjija naadi bamfùmù adi, anyi bwà—bwà kubàsa cifulu cyà butùmbi, ne bikwàbò. Kàdi dibwe dyà mùsongà. . .

75 Tàngilàayi mu kabèji kàà ndola wa cyena Àmèrikè. Nenumòne ní. . . pa kabèji kàà ndola wa cyena Àmèrikè aku, ku lùm wè luseke, lusekè lwà dyàbakàji, kùdì citampì cyà Àmèrikè, mukankù mwikale ne. . . dyà mafùmà mu cyanza cyèndè, ku luseke lwibìdì, eci ncibìikidiibwe ne “cìtampì cyà Ètats-Unis.” Kàdi ku luseke lùdì lulonda kùdì cipaapu cyà musàkà ne, kumutù kwàci aku, dīsù dinène, ne mwinshì emu mbàmbemù ne: “Cìtampì cinène.” Bwà cinyi ncifwànyine kwikala “Cìtampì

cinène” mu ditunga edi, nànsha mene kumutù kwà cìtampì cyà ditungà dyètù? Nwamònu anyi?

⁷⁶ Nànsha bàmba ne cyùtù mwenze ncinyi, Nzambi ùdi wènza ne cyàkule ànu byà mwomùmwe. Nwamònu ayi? Udi wènza ne ngèzàmpèkààtù àkule bwàci. Udi wènza bwà ditunga dyàkule bwàci. Bintu byònsò bìdi ne cyà kwakula Bwènde. Nànsha wèwè—wèwè muswe kuCìitabuuja anyi to, Cìdi ànu mwaba awu.

⁷⁷ Mpindyewu, mònayyi, kùdi dísù mu cyôci aci, dísù dyà Nzambi. Bwalu mùsongà kawùvwa mutèekiibwepù, Cìtampì Cinène aci, bwalu Cìvwa cibèngiibwe, cìvwa Mwànà wa Nzambi; Dibwe dyà mu ditumba dyà nzùbu, Cìtampì Cinène cyà cipaapu cyà musàkà, ne byònsò ebi. Mpindyewu—mpindyewu, ndi. . . Ncyèna muswè. . .

⁷⁸ Míngà misangu bàdi bàkwàta bintu ebi pa mikàbà yà mèyi, ne bìdi bìya munkaci mwà bânà bèètù mu maèkèleeziyà, mu èkèleeziyà mikwàbò. Nènku pàdibo bènza nàнку, díbà adi bânà bèètù bàdi míngà misangu bapeta mmwenenu mubi, wa ne ndi ngàmba cintu kampànda bwà bânà bèètù. Kàdi ncyèna ngàmba nàнку nànsha. Mémè. . . Bu nwènù ànu mwà kutèeleja cyanàànà ne kuumvwa, nwamònu’s, ncyèna ngàakula bibi bwà mwànèètù nànsha umwe to. Bwalu, abi ki mbikùmbàne bwà bânà bèètù, kwakulabò bibi bwà umwe ne mukwèndè nànsha. Bìvwà bikèngela kwakwilangana, kàdi kí nkwakula bibi bwà umwe ne mukwàbò.

⁷⁹ Kàdi pàndì ngàakula misangu mikwàbò bwà bulongolodi kampànda, bu mùdi bwà ba-Presbytérien, ba-Méthodistes, anyi bikwàbò, bàdi bàmba ne: “Nwamònu’s, yèyè ùdi ùcilwisha.” Mémè ncyèna mbèngangana ne mwanèètù wa balùme udi muntwamu awu to, anyi mwanèètù wa bakàji udi muntwamu awu to. Ndongolwelu udi utàpulula bwànà bwètù ke ùndi ndwisha. Bânà bàà Nzambi bàdi famiye umwe, kàdi kí—kàdi kí mmisùmba mishìilàngàne to.

⁸⁰ Nènku bàmwè bàà ku bôbò bàdi bàmba ne: “Mémè ncyàkwikala naaci bwalu to, bwalu aci ncyà ba-Presbytériens. Kàdi mémè ndi Méthodiste.” Nwamònu anyi? Mpindyewu, aci kí ncyôci to. Nwamònu anyi? Ndongolwelu wa bulongolodi awu gudì ùkosolola bwànà bwètù abu. Nwamònu anyi?

⁸¹ Mpindyewu, ànu bu múmvwa mwàmbe, bu wèwè upweka ne musùlù mu ciibwàtù cyà kale cimweka cisalakane, ukeba kupicila mu bisàbàsabà, kàdi pàanyi mumanyè ne kabyàkukùmbàna to, èè, díbà adi, ncyèna ngeela mbila mikolè, nkutàndisha wèwè. Ndi nteeta bwà kukupatula mu bwàtù abu. Nwamònu anyi? Bwalu, bwàtù mbwàkosoloka, nènku—nènku—nènku newùshaalè, musòmbe nkààyeebè, mu màyi. Pa nàнку—pa nàнку kí—kí m’mwànèètù udi mu bwàtù to, kàdi ndi ngeela mwanèètù awu mbila bwà kumulèeja cìdi cyàmba kwenzeka.

⁸² Èè, ndongolwelu yònsò eyi, yidì bantu benze ku dimanya dyàbò yidi ne cyà kutaayika. Kwàjikì. Bàdi ne cyà kulwa. . . Tudi ne cyà kufika ku bumwè, ku bwàna bwètù. Aci's ke civwà kàànyì kiipàcilà kàà mwoyi bwà kuteeta kusangisha kàdi kí nkupandulula bulongolodi kampànda to, kàdi kubàfikisha ku dilekela mmwènenu yàbò, ne kwikala bânà bààbò ne Mwena Kilstò yònsò mulediibwe cyàkàbìdì. Nudi numòna anyi? Ki cyòci, ki mmwènenu nyèyè awu. Ki mwaba ûndì mwimanyine awu, èè, mpindyewu, bu bânà bèètù mwà kucimòna. Ndi. . .

⁸³ Bààbúngì bàà ku bânà bèètù, nànsha mene mu milongo yètù yà Èvànjeeliyò mu Kaabujimà, kabèèna biitabuuya ne ba-Baptistes ne ba-Méthodistes, ne ba-Lutheriens ne bakwàbò, bàdi ne mpungà to. Kàdi, mpindyewu, mbafwànyine kwikala babíngè. Kàdi ncyèna nciitaba to. Ndi ngiitabuuya ne cikondo eci, cyà Cikondo cyà Luther, mu cikondo eci civwà cibìikidiibwe, ngeela meeji ne, Cikondo cyà Sàadi. Ne pashìishe Cikondo cyà Filàdèlèfiyà aci, bwà ba-Méthodistes. Ne pashìishe beena Mpenta, Cikondo cyà Laòdikiyà. Ndi ngeela meeji ne mbikondo abi. Ne Nzambi, mu cyònsò cyà ku bikondo abi, mwangàte cisàmbà cisungula. Nènku mu cyòci aci, mùdì Ebèlù 11 wàmba, ne: “Bòbò abu twètù katùyiku to kabèèna mwà kuvwijiiibwa bapwàngàne to.” Nwamònu anyi? Kàdi mpindyewu Èkèleeziya mmufumine ku cyòci eci, ùlwa mu banyaàbanya dîbà dyònsò, too ne mùdìCi cìkafika too ne mu cikondo cyà Mpenta.

⁸⁴ Mpindyewu, cìdì cingambishisha eci, mbwà nwènù kupeta cingenyigenyi kampànda pa cìdì mwanèètù wa bakàjì mulòòte aci. Ne cilòòtà cyèndè ncifwànàngàne menemene ne dilongesha dyànyì.

⁸⁵ Tàngilàayi mpindyewu mwab'ewu, mpindyewu, bintu byònsò ebi bivwà Peetèlò wa Kumpàla mvensà mwi6 ne wa 7 ùnwàmabila, kuumuk-. . .ku diitabuuya dyèbè, aci ke cyà kumpàla. Mpindyewu, ndi ngàmba ne kùdi bantu bàdì bàmba mùdìbo ne makolè aa kabàyi nànsha balediibwe cyàkàbìdì to. Nènku ndi ngeela meeji ne ndi mwambe díyì dikolè ne mwambe ne: “Ncyènze ànu bu nyuunyi mufiike úteeta kwasa masàlà à nyuunyi wa kàyibà mu yèyè, ne kudìvwija yèyè mwìnè nyuunyi wa kàyibà.” Kèna mwà kucyènzakù to. Bikèngela kwikale masàlà à cifùkulu àpàtukila pa mubidi wèndè. Munda mwèndè amu ke mùdì ne cyà kupàtula masàlà awu.

⁸⁶ Nènku misangu yònsò, bàtu ànu bàmbanda misangu yònsò ne mémè ntu nkoleshela bânà bèètù bà bakàjì maalu, bwà diikala dyàbò dyà ne nsukì mibebula, ne bilaabu mu mpàla yàbò, ne bintu cyakaa. Bàtu bambandèbànde bwà dyuumishila bânà bèètù bàà bakàjì maalu. Kí—kí ne ndi naabò bwalu nànsha bùmwè to. Mémè ncyèna ngàmba ne mukàjì kí mmùkàjì mwimpè to, ne yèyè ùdi mulalakanyi kampànda wa mu mùsèèsù anyi cintu kampànda to. Aci kí ncilunji cyànyì nànsha. Kàdi, bwalu bùdi ne, pàdiye ùdilaba bintu bikwàtàkaja byàbúngì kwisù,

bìdi bileeja ne kùdi bintu byâbûngi bikwâtakaja munda amu, nwamònu's, mwaba ùvwà ne cyà kwikala mùle ne Kilistò. Bwalu, pambèlu pàsòmbèla misangu yònsò paleeja patòòke cidì munda. "Ku mamuma ààbò nkunùdi nubàmanyina." Nudi numòna anyi? Nènku mwaba ùvwà Kilistò ne cyà kwikala ùsanganyiibwa, ne kucyùka bwà Nzambi, ne kucyùka bwà bintu bikwàbò pamutù pà bintu bikwâtakaja bûngi cyanààna, nènku nudi bamanyè's, bilàfinyi byà mâyi à matàmbà, ne lukebu lùdi kalùyì lwà buntu to, ne bintu byònsò byà mùshindù awu abi. Mémè nciutu ngùtaba aci to, ne ncyèna ngùtabuuja ne nànsha Bible mmucùteta to, ki bwà cinyi ntu muswè ànu kwikala citùdi aci.

⁸⁷ Mònaayi, mpindyewu, mukàjì yéyè kàyì ne nzàdi yà ku minu to, ne yéyè muswè kudyàsa mikwàbò; yéyè kàyì ne ménù to, kàdi mwikale naayi dìjinga; kàyì ne dibòko, ne mwikale naadi dìjinga; kùyì ne nsukì to, kàdi naayi dìjinga; pawùdi kùyì ne bintu ebi to, abi mbishùlàngàne. Kàdi paùdi utùùla ménù èbè malenga menemene awu, bwalu ànu ne kaèna àkenka menemene mùvwàbì bikèngela wòwò kwikala to, dìbà adi udi mu bubì. Wèwè mwikale ne nsuki mikùnze kàdi ùjinga yà mifiike, kàdi uya kayèla díkala bwà kushààlayi mifiike, ànu bwà nàнку; udi mwenzè bibì. Èyowà, ngeela meeji nàнку. Kàdi cintu cyà mushinga. . . Kakwènakù Mufùndù bwà cyòci aci to. Cìkòla, bwà kubebula nsuki yènu, kùdi Mufùndu bwà cyòci aci, èyowà, tudi naayi bûngi cyanààna, pa nàнку tudi baswè kwikala batwishùbwe ne mmwòmò, mpindyewu.

⁸⁸ Mpindyewu, mwanèètù wa bakàjì, mu cilòòtà, ùvwà mulòòte ne yéyè. . . Èè, dyàmbèdi, ùvwà mutàcishùbwe. "Bidi ne dikwàcisha kaayi dyà kuya kumpàla, ne kuteeta bwà kulwangana mu nsombèlu wetù, pìikala Nzambi utùlòmba bwà kupeta Nyumà Mwímpe kàdi twètù katùyì Nendè to?" Mpindyewu, ncyèna ngeela meeji ne. . .

⁸⁹ Bàdi mwà kwikala bàkwàta eci pa mikàbà. Kàdi bóbò kabàyi bàkwàta to. . . Bóbò bàkwàta, yìdi mbwà èkèleeziyà nkàayendè. Nwamònu anyi? Mpindyewu, nènku kwòkò mwanèètù kampànda muswè kupeta yòyi eyi, ne nuumvwa díyi dyànyi, mwanèètù, pa cyòci eci, nwàvùlukaayi ne, ndi ndongesha ànu èkèleeziyà wanyi. Ikalaayi misangu yònsò, kumpàla kwà disangisha dyènu, nukenketa mi—mikàbà yà méyi eyi, ne nwènù kanùyì baswè bwà disangisha dyènu dìyitèlèjà, kanùlekedì disangisha dyènu dìyitèlèja to. Kàdi ndi nteeta ànu kwambila kasumbu aka kakesè kàdi mwaba ewu aka, kàdi—kàdi Mwanèètù Neville ne mémè, ku Nyumà Mwímpè, tuteeta bwà—bwà kudiisha ne kulongesha.

⁹⁰ Mpindyewu, kùdi bìmwè byà ku bintu ebi binùdi bafwànyine kubènga kupetanganapu nwòsha ne munu mwiku. Pa nàнку byòbì nàнку, ànu bu mùntù ngàmba bwà kudyà kwà nzòòlo mukànga ne: "Paùdi upeta mufùbà, kwèna wimansha nzòòlo nànsha. Udi wimansha mufùbà." Pa nàнку ikàlà wenza misangu

yônsò ànu nàнку. “Wêwè munkaci mwà kudyà mùkàtà mwela cérise, kàdi wêwè kubèla lutete, kwèna mwà kwimansha mùkàtà to. Udi wimansha wêwè ànu lutete.” Pa nàнку udi wenza cintu cìmwècìmwè aci mu kutèèleja Cyôci eci.

⁹¹ Mpindyewu, ndi—ndi ngeela meeji ne—ne—cidi cyenzeja cibwejàkàji cyàbùngì leelù ewu, pa bwalu bwà Nyumà Mwîmpè, kî mmulongèshìibwe mu mùshindù mujaalàme to. Ndi ngiitabuuja ne dibàtiiza ndilongeshiibwe. . . ne kwamba ànu cyanaànà ne “dibàtiiza.”

⁹² Pashìishe biikale ànu bu kwamba ne “màshinyì.” Kàdi mpindyewu ndi ne ndambu wa baamekanyisheelè mu èkèleeziyà ewu, ne mêmè ncyèna mumanyè kantu nànsha kàmwè pa bwalu abu to. Pa nàнку mêmè mwênze cilèma, bânà bèètù, ndi. . . Vùlukàayi, ncyèna mekanyisheelè to. Kùdi ne cyà kwikala ma bobines, bougies, vices platinées, ma soupapes, ne bintu byônsò bìdi byènta màshinyì abi.

⁹³ Nènku paùdi wakula bwà dibàtiiza dyà Nyumà Mwîmpè, kùdi byàbùngì bìdi byènta pàmwè ne Cyôci aci. Huh? Nwamònu anyi? Kùdi byàbùngì bìdi byènta pàmwè ne Cyôci aci. Nàнку mònaayi cìndi ngeela meeji ne cidi Nzambì ùshindika: Nyumà Mwîmpè ùdi mwaba ewu. Nwamònu anyi?

⁹⁴ Mpindyewu, Peetèlò wàkamba, dyàmbedi ne: “Diitabuuja.” Mpindyewu tàngilàayi ne ntèmà yônsò mpindyewu. Netùlongèshè cyôci eci bwà tusunsa tukesè. Diitabuuja, mpindyewu, ki cyènu cyà kumpàla. Ne kusakidila ku diitabuuja dyèbè, bukolè; ku bukolè bwèbè, dimanya; ku dimanya dyèbè, didikànda; ku didikànda dyèbè, lutùùlù; ku lutùùlù lwèbè, difwàna dyà Nzambì; ku difwàna dyèbè dyà Nzambì, dinangangana dyà bwàna bwètù, dinangangana dyà bwàna bwètù; ne pashìishe dinanga. Ne muntu kanà yônsò ewu mmumanyè ne dinanga didi Nzambì. “Nzambì ùdi dinanga.” Nwamònu anyi?

⁹⁵ Mpindyewu, ne díbà adi, kuumukila ku eci, ne pashìishe kubweja eci mu bikondo mwandamutekètè byà èkèleeziyà. Nzambì ùdi munkaci mwà kwibaka, mu bikondo mwandamutekètè byà èkèleeziyà, Mukàji-musèla bwà Kilistò; kupicila ku cyà beena Filàdelèfiyà, beena Twatilà, ne Peegàmò, ne beena Seemùnà, ne Efèsò. Cikondo cyà èkèleeziyà, cívwa Yesù mwámbe ne: “Bu mu—bu Mubàki mwà kulwa mu cilù cyà kumpàla anyi mu cilù cyà mwandamutekètè, bavirgo bônso aba bàkabiika.” Bàvwa babiikè. Kubiikabò, bavirgo bàà mu Efèsò abo, Seemùnà, Peegàmò, Twatilà, Sàadi, Filàdelèfiyà ne Laòdikiyà. Nuvwa bamòne aci anyi? Cívwa cikondo cyà mwandamutekètè, piine apu mpàakalwàYe ne kubìishayè bavirgo bàvwa bashàale abu. Aci cidi cibàfikisha ku dyalukila too ne kwìnshì *eku*. Nwamònu anyi? Bwalu, mu cyôci eci, munda mwà bidimu, bikondo, Yèyè mmwibàke Mukàji-musèla,

mulediibwe Mukàji-musèla, mulelè Mukàji-musèla pa buloba bwà Kilistò. Ne mùshindù ùmwèùmwe wàkalelàYè Mukàji-musèla awu, ngwàkalelàYè bantu nkààyà.

⁹⁶ Mpindyewu ûndi ngènda ntèeka bishimikidi ebi, mbwà nwènu kumòna piikala cilòòtà cyà mwanèètù wa bakàji ewu munkaci mwà kwambiibwa.

⁹⁷ Mpindyewu, bintu ebi mwaba ewu kakùyì mpatà to bìdi ne cyà kwikala mu mwena Kilistò kumpalà kwà Nyumà Mwîmpè kubàtwaYè citampì, kumpala kwà yéyè ewu kupwekayè pa yéyè ne kumuvwija cintu mu kaabujimà.

⁹⁸ Mpindyewu, cilòòtà cyà mwanèètù wa bakàji mpindyewu. Ûvwa ùditacisha bwà kumanya ne ùvwa ne Nyumà Mwîmpè anyi to, pàvwàye mudyadija mu nkwasà wa fòteyi mùvwà bàyendè munkaci mwà kubala cibèjibeji. Ne ùdi ne bàna bakesè, bu mùndi naabu emu, bôbò bàsòmbèla ànu benza mitooyi ne bikwàbò. Ki kaayi, mwómò emu, wàkaya mu tulù bu twà tusunsa tutwè bu ku dikumi, anyi dikumi ne tùtaanu. Ki kulòòtayè cilòòtà. Kàdi kàvwa ànu mwà kucyùmvwa to, anyi kucibùngàkaja cyònsò, kacya kùkaadi cidimu cijimà, bu nàнку awu, too ne paàkayishiibwa Mukenji ewu. Pashùshe, pàmvwa munkaci mwà kuWùyisha, ke kumuvwilaci cyònsò. Nènku ùvwa mulòòta ne ùvwa munkaci mwà kusambila.

⁹⁹ Ûvwa wènda wèndakana panshi, dyàmbedi, kumpala kwà kulòòtayè, ùvwa ùnyùkula byanza, wèla meeji ne: “Mukalenge, ndi ne Nyumà Mwîmpè anyi? Udikù mwà kunjaaadikila. Bàmwè bàdi bàmba ne: ‘Bwalu mvwa—mvwa mwelè mbilà.’ Anyi bakwàbò mbàmbe ne: ‘Bwalu ndi mwàkùle mu myakulu.’ Kàdi twètù tudi twitabuuja byònsò abi. Kàdi ndi Nendè bulelèlà menemene anyi?”

¹⁰⁰ Ndi ngiitabuuja bintu byònsò abi, makolè awu, dyakula dyà mu myakulu, ne dyela dyà mbila, ne dileeja dyà patòoke dyà mùshindù yònsò. Mémè ndi ngiitabuuja kantu ne kantu kònsò kàà cyòci aci. Kàdi cyòci ciikàlekù kakùyì *Eci* to, kùdi cintu cipampalàmùke. Nwamònu anyi? Mpindyewu, nwamònu’s, nudi numòna’s, nudi—nudi ne cizubu. Mònaayi.

¹⁰¹ Ne yéyè mukàji awu ùvwa ùditacisha bwà bwalu abu, pa nàнку ke yéyè kulààlayè mucyàmàkàne mu nkwasà wa fòteyi mùvwà bàyendè munkaci mwà kubala, e kudìtwayè mu tulù.

¹⁰² Ke kulòòtayè mùvwàye ùsanganyiibwa pa mukùnà kampànda. Kàdi mu wòwò mukùnà amu, cìvwà citàmbe bwîmpe. . .ncyèna ne dibèji adi kumpala kwànyì eku to, kàdi ndi ngeela meeji ne cidi mùshindù ewu. Wàkalòòta ne ùvwa mumòne mu—mushètà wà dibwe, bu—bu mu—musàkà, musòmbè pa lusongo lwà mukùnà ewu. Ne bàyendè ùvwa ànu paanyimà pèndè apu. Ki yéyè kumòna muntu munène wa katumbi mwimàne mwaba awu, muvwàle bilàmbà byà mudimu, mabòkò à mutèèlu mabùnya, mwikale ùpòngolola

mâyi à kazeze menemene à kacya wàmòna, ùàpongolwela mu mwinè mushèètà ewu, mushèètà wà dibwe ewu ùvwa musòmbe pa lusongo lwà mukùnà. Kàdi mushèètà wà dibwe ewu kawùvwa mufwànyine kulama mâyi to. Nènku mâyi àvwa àpongolokamu, àsàba ùmusha makooya wònsò ne bisòta byònsò, ne bikwàbò bivwàmù, àbisabisha byònsò bipwekela lwà kwìnshi kwà mukùnà awu. È kupòngòlokewà ku makàsà èndè, kàdi yèyè mukàjì awu ùvwa mwimane ànu mu bintàkanyi abi, cikòlà kabyàkamulamata to.

¹⁰³ Ke—ke kukonkayè ne bwà cinyi mushèètà kî mmuàlame, ke muntu mulùme awu kwamba ne: “Aci kî mmâyi to. Aci n’Nyumà Mwîmpè, ne,” yèyè kwamba ne, “cintu nànsha cimwè kacyàkuMùlamaku to.” Ki yèyè ne, pashìishe kwalukilayè e kwangata mbekeci mukwàbò munène, ne ùvwa mùle tètè ne bwìci, è kupòngòlweyèmù bwìci, wàmba ne: “Mpindyewu neàlamè eci.” Nènku kwelayè meeji ne mushèètà ewu, ùvwa mushèètà wà dibwe ewu, ùvwa ne cyà kutaayika, ne kumwagalaja bwìci, kàdi kawàkataayika to. Wàkalamakana pàmwè e kushààlawù mubùlamè.

¹⁰⁴ Yèyè mukàjì awu kukùdimukaye ne kutùùlukaye ku mukùnà aku. Pàvwàye wènda ùtùùluka ku mukùnà aku, yèyè e kwimana kwìnshi kwà mukùnà e kutàngilayè paanyimà. Kumònayè misùlù yìtaanu yà mâyi aa, makezùke, à lumwènu, kaayi ne bukooyà bwà bintu bivwawu mapicile to, mîkale ànu makezùke ne matòòke, àlwa ne lubilu. Ke pashìishe kutekeshawù. Pashìishe, kwenzawù bu makàme, nènku ùvwa munkaci mwà kudìkonka ní àvwa mafwànyine kufika kwìnshi kwà mukùnà, tusùlù tùtaanu atu. Ki kutàbulukayè.

¹⁰⁵ Ngeela meeji ne aci cidi pabwìpì menemene ne kwikala mu cyòci, kî mmwòmò anyì, Mwanèètù wa bakàjì Shepherd?

¹⁰⁶ Mpindyewu, ndi mwènzè ànu ngàngata mukàndà mumfùndila awu ne ngùbuulula, kumpàla kwà mèmè kuwùbala, mèmè e kumòna cilòòtà cyà mwanèètù wa bakàjì aci.

¹⁰⁷ Ke mùshindù ùtù bilòòtà byùmvwijiibwa nànu. Mpindyewu, bààbúngi bàà kunùdi bakaadi balwè kùndi ne bilòòtà, ne—ne bàngambila bintu bitàngila bilòòtà. Ntu ngàmbe ne: “Indilà katanci. Kwèna mucilonde cyònsò to.” Nwamònu anyì? Ne mèmè kwalukila paanyimà e kucibakula cyònsò. Dìbà adi pawikalà kùyì mwà kwawula cilòòtà cyùdi mulòòtà, mmunyì mùdi mwà kumanya ne dyumvwija ndilelèlà anyì ki ndilelèlà? Nwamònu anyì? Bikèngela bwà, bikèngela ùmonè cilòòtà aci. Cìkèènà-kumòna cidi ne cyà kuleeja cilòòtà aci. Ne dìbà dyùdi umòna cilòòtà cìvwà muntu mulòòte, ne kumwambilaci kumpàla kwà yèyè kukwambilaci, dìbà adi udi mumanyè dyumvwija.

¹⁰⁸ Èè, ngeela meeji ne aci cidi mu Mifùndu, kàbidi, Danyèlè, musangu kampànda. Kabivwa nànu anyì? Ne... Èyowà. Ndi

ngeela meeji ne cyafùmu ku dimvwila mu meeji ànu katanci aka. Nwamònu anyi?

109 Kàdi udi misangu yònsò umòna cilòòtà, mpindyewu, pìikalà dyumvwija dyà cyà bushùwà. Muntu udi ùtwàdija kukulondela cilòòtà, udi ànu mwà kumwimanyika, wamba ne: “Indila kakesè. Ne cìvwa *nùнку ne nùнку*. Cìvwa *nùнку ne nùнку*, kàbìdì *nùнку ne nùнку*.”

Ne pashiishe wêwè kwamba ne: “Aci ncyà bushùwà menemene.” Nwamònu anyi?

110 Muntu, ditùkù adi, ùvwa ùteeta kungambila cilòòtà cìvwaye mulòòte aci. Yèyè ne: “Èè,” mwàkambàye. . .

Ki mêmè kwamba ne: “Mpindyewu, mwanèètù, bwà cinyi washiyi citùpà cikwàbò?”

Yèyè ne: “Citùpà kaayi cikwàbò?”

111 Mêmè kwamba ne: “Uvwa mulòòte ne uvwa mwêle dibwe mu lupeepèlè, ne mêmè kudyàsà dizaji ne bimwè bipese kumbwelabi mu dísù.”

112 Yèyè ne: “Aci’s mbulelèlè menemene, Mwanèètù Branham.” Kàdi’s mbafùma ku dipatula bisùnsukila byàdi byà ndekeelu abi, makèlèlè awu. Uh-huh.

113 Pa nàнку’s ki bwalu mbwòbù abu. Nwamònu anyi? Nudi numòna anyi? Bwà cinyi? Kwèna ucyàmba mu bulelèlè bwàci to, kàdi, nudi numòna’s, Cìdi misangu yònsò ànu cibuuludiibwa, cìdì, cikwambila cilòòtà cyèbè, cyùvwà mulòòte aci. Dìbà adi udi umanya ne mbulelèlè.

114 Mpindyewu, dyumvwija dyà cilòòtà cyèndè ndyôdì edi. Ùvwa mutàcishiibwe bwà Nyumà Mwimpè. Mpindyewu, bu mwàkamònaye mushèètà ku lusongo lwà mukùnà, cìvwa lubwebwe. Mushèètà wà dibwe, s’*n’dibwe*, “ditonda.” Mpindyewu, bu mwàkambà Yesù mu Mifundu. Yèyè ne: Peetèlò wàkamba. . . “Nganyi,” Yesù wàkamba ne: “bantu bàdi bàmba ne Mêmè, Mwànà wa muntu, ndi nganyi?”

“Umwe mmwambe ne Wêwè udi ‘Eliya,’ ne ‘Mòsà,’ ne bikwàbò.”

Ki kwambaYè ne: “Kàdi nwènù nudi nwamba ne Mêmè Ndi Nganyi?”

Yèyè ne: “Wêwè udi Kilistò, Mwànà wa Nzambì udi ne mwoyi.”

115 Mpindyewu, bàmwè bantu bàtu bàmba mpindyewu, èkèleeziyà wa Kàtòlikè ùdi wàmba ne, èkèleeziyà wa Kàtòlikè wa cyena Loomò ùdi wàmba ne: ne Dyèndè diton-. . . “Lubwebwe alu lùvwa cinyi, lwàkamba Yesù ne: ‘Pa lubwebwe elu Nèngiibakilèpu Èkèleeziyà Wanyi, ne biibi byà ifernò kabyàkuMutàmba bukòlè to.’” Bàkamba ne: “Cìvwa mpa Peetèlò. Ne Peetèlò ùvwa lubwebwe alu, bwalu *Peetèlò*

ùdi ùmwija ne 'kaadibwe kakesè.' 'Pa dibwe dikesè edi Nèngiibakilèpu Èkèleeziyà Wanyi.'" Nènku pa Peetèlò, bôbò, bulondyanganyi bwà cipostòlò, mpàdìbò bìibakila èkèleeziyà.

116 Pashiishe èkèleeziyà wa Mishònyì ùdi wàmba ne: "Aci ncya mafi. Aci, cìvwa mpa Yèyè mwinè pàkiibakila Yè Èkèleeziyà."

117 Mpindyewu, kabiyi bwà kupangishangana nsòmbelu to, kàdi, mèmè, ku wànyì mùshindù wà dicimòna, byònsò bibìdi mbyà mafi. Bwalu kacya kàtu mumwibàkile pa Peetèlò nànsha, kàtu nànsha mumwibàkile pa Yèyè mwinè nànsha, kàdi cidi mpa dibuulula dyà Peetèlò dyà ne Yèyè ùvwa Nganyi. Nwamònu anyi?

"Bantu bàdi bàmba ne, Mèmè Mwànà wa muntu ewu ndi nganyi?"

"Wèwè udi Kilistò awu, Mwànà wa Nzambì udi ne mwoyi."

118 "Udi mubèneshiibwe, Simonà, mwànà wa Yona. Munyiyinyi ne mashi kî mbikubuulwile eci to," kî n'seminère kampànda to, nwamònu's: "kàdi Taatù Wanyi udi mu Dyulu ngudi mukubuulwileci. Wèwè udi Peetèlò. Pa lubwebwe elu lwà ditonda, pa dibuulula edi, Nèngiibakilèpu Èkèleeziyà Wanyi."

119 Nènku ke cìvwàku, cikondo cyònsò cyà èkèleeziyà cyàkapeta lwòlò lubwebwe lwà ditonda alu, too ne ku lubwebwe elu lwà ditonda lwà Laòdikiyà.

120 Nènku, mpindyewu, kwèna mwà kwenza èkèleeziyà wa cijila to. Kakùtu cintu pààci ne ng'èkèleeziyà wa cijila anyi bulongolodi bwà cijila nànsha. Nyumà Mwímpe ùdi mwà kuyiishibwamù, kàdi mwómò amu udi usanganamu bímpe ne babì, bantu bavile diitabuuja, bàdi kabàyi bacyùka, ne bikwàbò byònsò ebi. Pa nàнку bulongolodi kabwàkushindama to. Wèwè kwèna mwà kwamba ne: "Tudi Nendè to. Kakwèna nànsha umwe wa ku bôbò udi Nendè to." To, mukalenge. Nyumà Mwímpe mmupòngòlwela bantu nkààya. Mmuntu nkààya.

121 Pa nàнку, ki bwà cinyi, lubwebwe alu, Èkèleeziyà wa mpenta, wa ditùkù dyà ndekeelu ewu mmupete Nyumà Mwímpe, wàkapetabo dyàmbedi awu. Bìpweka nàнку mu bikondo byònsò, bàdi bàpetà Nyumà Mwímpe, kàdi ki mmu cipiminu cidibo Nendè mpindyewu to, bwalu ndyalujulula dyà wa kumpàla awu. Patùdi twangata bitèekedi byà myèndù, Alpha ne Omega, mùshindù mwinè wùvwàbo bàteemesha kàndeyi kàà kumpàla; Byàkaya byènda bibànda ne byènda bibànda, e kubangabi byènda bibwita byènda bibwita; pashiishe byàlukila kàbìdi. Nwamònu anyi? Wa kumpàla ne wa ndekeelu, mùshindù awu.

122 Mpindyewu, kàdi mu cikondo cyà èkèleeziyà eci, Mukenji mmupòngolodiibwe mu èkèleeziyà. Kàdi mubidi wà èkèleeziyà, wòwò mwinè, mu cibùmbù bu mùdi. . .

123 Tabernacle ewu, mutùdi mwà kwamba. (Mwómò amu ke mùdiye ùlwa mu èkèleeziyà.) Ntentà ewu kî ntentà wa Nyumà Mwímpe to. Cintu bu nàнку kacitukù to. Bantu nkààya

bàtù bàlwa mu èkèleeziyà ewu ke bàdi ntentà yà Nyumà Mwimpe. bôbô ki ntentà yidi myambule Nyumà Mwimpe, kàdi ki ng'èkèleeziyà mu mubidi to, musùmbà. Ki bwà cinyi, Ùdi ùpàtuka.

¹²⁴ Kàdi, cidi, muntu ewu uvwa upòngolola mâyi, mùsànjeelà wa èkèleeziyà, munkaci mwà kupòngolola Mukenji mu èkèleeziyà, kàdi ncinyi civwà mâyi ènzà? Avwa àsàbà àpàtula bukooya bwònsò bùvwàmu. Cyôci aci ke cidi Nyumà Mwimpe wenzà, ubisabisha ubibàndisha, mpindyewu.

¹²⁵ Mpindyewu, bwìci bùvwa buleeja dinanga dyà bwànà bwètù, dinangangana dyà bwànà bwètù, didi cikondo eci adi. Ndi mfuma ku dyamba, nwamònu's, bwà dinangangana dyà bwànà bwètù, cikondo citùdi ne mwoyi mpindyewu eci.

¹²⁶ Mpindyewu, udi mufwànyine kwamba ne: “Tàngilàayi, ncyèna—ncyèna—bushùwà muswè Mwanèètù Neville to.” Anyi ne: “Ncyà bushùwà ne ncyèna muswè Mwanèètù Jones to. Ncitu muswè Mwanèètù *Kansanga* to,” ne cintu bu nanku awu. Kàdi lekela ànu cintu kampànda cìmwenzèkèlè, mwanèètù, mwoyi wèbè mmucibùlùke. Byàmba ànu kukushebeya. Nwamònu anyi? Tudi mwà kupeta dinangangana dyà bwànà bwètù ne kuumvwa majiyà bwà muntu ne mukwèndè. Nwamònu anyi? Kàdi bwà kushàala badilame mu musùmbà kapànda wà bantu. . .

¹²⁷ Udi uditacisha bwà mwanèètù wàwa bwà cinyi? Bwalu nuvwa bakòsòlwelanganane nendè dyàmpà mwaba ewu ku cyoshelu eku, munwàkòsòlwelanganana dilòlò edi. Udi wenza nendè bwobùmwè. Ulabulangana nendè ku cyanza. Ukukwila nendè. Yèyè mmwanèènu wa balùme. Kàdi ùdi mwà kwikala mwenzè cintu kampànda mu mubidi, cyùdi kùyì upetangana naaci to, kàdi ùdi ànu wanji uditola, (cyùvwa kùyì ne cyà kwenza to), kàdi wèwè e kumwepela ndambù. Kàdi mu ndòndò wa mwoyi wèbè, cintu cyôci cyenzèkèle mwanèètù wa balùme awu, ncifwànyine kukushebeya menemene, anyi mwanèètù wa bakàji awu.

¹²⁸ Mémè—mémè ndi muntu mununu. Musangu kampànda mvwa nsongà, kàdi mpindyewu nkaadi mununu. Nkàadi mucimòne, mu cikondo ne mu cikondo, cyèenza nanku. Nkàadi mumvwe bantu bamba ne: “Ncyàkwikala kàbidi nendè bwalu to.” Kàdi bwalu kampànda bwènzekele ànu mwinè muntu awu, bùdi bwàmba kumushebeya yèyè awu. Ùdi wèla meeji ne: “Éyi Nzambi, ndi mulekéle mwanèètù wa mushinga mukolé ùya, katùyì bapingàja nendè bulunda.” Udi umòna anyi? Nwamònu anyi? Nwamònu anyi? Ndinanga dyà bwànà bwètù. Bidi bimwèka ànu bu ne kabyàkulamakanangana to, kàdi bidi bilamakanangana. Bwìci, bùtu bùlamakana.

¹²⁹ Mpindyewu, bu mwàkafùminaye kwàka, wènda ùpweka pa mukùnà, mutàngile kwìnshì kwà mukùnà, mpindyewu, mâyi à butùmbi aa àvwa àpàtuka àsòmpokela pa tukùnà, mu tusùlù

tùtaanu. Mpindyewu, itaanù nnombà wa ngàsà; J-e-s-u-s, f-a-i-t-h, g-r-a-c-e. Nwamònu anyi? Itaanù nnombà wa ngàsà. Tusùlù tùtaanu tùvwa tùpongolokela kuulu eku mu mpoko, tùpwekela too ne kwinshì *eku*.

¹³⁰ Cyònsò cyà ku bikondo ebi cìvwa ne lubwebwe lwà ditonda alu. Bansantu mbalààle tulù, bindìle, bindìle, bindìle, bindìle, nwamònu's, too ne mu cikondo eci. Kàdi mu katanci kakesè emu Nyumà Mwímpe, bu mùdìYe mupòngòlola ùpàtukila mu Kilistò, neàlwe ne neàtwe Èkèleeziyà citampì. Dìbà adi Èkèleeziyà neàmbwìbwe. Neciikalè cintu cijimà cyà Nzambì, Mukàji-musèla bwà Kilistò, wìkala Mutù wà bintu byònsò. Nudi nundonda mpindyewu anyi? [Disangisha dìdi dyàmba ne: "Amen."—Muf.]

¹³¹ Mpindyewu, ùvwa munkaci mwà kudikonka. Mpindyewu, mu cilòotà cyèndè amu, ùvwa munkaci mwà kudikonka ne: "Kasùlù kakesè aka nkafwànyine... Kasùlù kakesè aka nkafwànyine kufika too ne kwinshì kwàka anyi?" Nwamònu anyi? Kàvwa kènda kùuma. Mpindyewu, bu mùdìbi nàнку, yèyè mwinè. Mpindyewu mònaayi kùndi muswè kunùfikisha mpindyewu. Yèyè mwinè ùvwa munkaci mwà kudikonka bwèndè yèyè mwinè. Ùvwa "ne Nyumà Mwímpe anyi"?

¹³² Mpindyewu, mvwa mwepùke bwà kwamba eci, kùkaadi ndambù wa matùkù, ndyàmbidila ne èkèleeziyà neikalè wa nyumà menemene bwà kucibàkula. Kàdi pàmwàpa mbitàmbe bwímpe mèmè kwimanyika dikwàtà dyà mukàbà wà mèyi ewu ànu mpindyewu, kàdi bu mùndi nciyi muswè bwà kupàtukawu munkaci mwà bàna bèètù. Kàdi udi mufwànyine kwakula mu myakulu, udi mufwànyine kwela mbilà, udi mufwànyine kuja maja, udi mufwànyine kwipata baadémons, kwenza cintu kanà cyònsò cyùdi muswè kwenza aci, kàdi kùyi ànu ne Nyumà Mwímpe to.

¹³³ Baiidi abu kabààkaalukila, bèndà bàsànka ne bènda bèèla mbilà bwalu badémons bàvwa bàbàtumikila ne Yesù... ànu munkaci mwàbò mene amu s'mùvwa Yudààsà's?

¹³⁴ Yesù kàakambaku ne: "Mu ditùkù adi," pààlwàYe apu, ne: "bààbúngì nebàlwe kùNdi bàmba ne: 'Mukalenge, mèmè ncyèna mwipàte badémons, ne mwenze byenzedi byà bukolè mu Dìna Dyèbè anyi?' Nènku nèngàmbè ne: 'Nguumùkilaayi apa, nwènu beena mudimu bàà bubì. Mèmè ncìvwa munùmànyè to.'" Abi bintu kì mbileeji byà Nyumà Mwímpe to.

"Ku mamuma ààbò nkunwàbàmanyinà."

¹³⁵ Mpindyewu wèwè udi wamba ne: "Mwanèètù Branham, twètù, bìvwa bikèngela twètù kwakula mu myakulu anyi?" Kakùyi mpatà to. Aci mmapà à Nzambì. Kàdi mapà à Nzambì awu, wòwò kàyi ne makolè aa munda mwàwù to, àdi àtèèka dibwe dyà cilèndwishi kùdi mwena bupidyà. Kì ncyanyishìibwe kùdi Nzambì to.

¹³⁶ *Eci* cìdi ne cyà kwikalakù dyàmbedi. Nènku paùdi ne diitabuuja, bukolè, dimanya, didikànda, lutùlù, difwànà dyà Nzambì, ne dinanga dyà bwànà bwètù, dībà adi Nyumà Mwîmpè ùdi ùpweka ne ùkutwà citampì bu muntu pabwèndè, byà mwomùmwe ne mùdiYe ùtwa bikondo byà èkèleeziyà citampì bu cintu cijimà cìmwè. Mùshindù ùdiYe ùfumba Mukàji Wendè musèla ke mùshindù ùdiYe ùfumba muntu nkààya Wendè; mwenza ne bintu bìmwebìmwè, ànu mùvwà Evà mwenjiibwe mupàtùdiibwe ku Adàmà amu, lubadi lwà mu luseke. *Ebi* ki bintu binùdi ne cyà kwikala naabi dyàmbedi. Kanwèna mwà kubitentula to. Kanwèna mwà kubiidikija to. Bìdi ne cyà kwikala bitùmiiibwe kùdi Nzambì ne bilediibwe kùdi Nzambì. Diidikija ditu dilela ànu cibwejàkàji.

¹³⁷ Bìdi ànu mùmvwa mwàmbe. Nudikù mwà kudifwànyikijila numòna kabangu nyuunyi kasòmbe mwaba wàwa ne masàlà à nkuci maasa mu mapwàpwà ààkù kàmba ne: “Mònaayi, ndi nkuci’s!” Kì nkuci to. Nkabangu nyuunyi, ciminyi. Nudikù mwà kudifwànyikijila nyuunyi mufiike mwikàle ne masàlà à nyuunyi wa kayibà mu mapwàpwà èndè, wàmba ne: “Nwamònu anyi!”? Aci’s ncintu cidiye mudisomèke.

¹³⁸ Kàdi bikèngela cipatukilè munda amu, ne cìdi citwàla bwena Kilistò; Nzambì, ku bukolè bwà Nyumà Mwîmpè!

¹³⁹ Mwanèètù wa bakàji ùvwa ku makàsà kwèndè kubolè ne màyi pàkafikàye kwinshì aku. Bònsò bwètù tudi bamanye Mwanèètù wa bakàji Shepherd ne ngwa dinanga. Wendè nzùbu ùdi bwàshì. Yèyè ne mwanèètù wa balùme, muntu nànsha yèyè mwikale mulalakanyi, mulombi wa kàà pa luse, nànsha yèyè mwikale nganyi, nebàmudiishe, nebenze cintu kanà cyònsò cìdìbo mwà kwenza bwà kumwambulwisha. Ekèlekèle! Nzambì mmwanyishe cyòci aci, cyèndè cishimikidi aci.

¹⁴⁰ Kàdi ki bwalu ebu, mpindyewu, akidilaayi dilongesha edi. Ki cìdi cìbi ncyòci aci kùdi—kùdi. . . Ndi nkwàta eci pa mukàbà. S’ki cìdi kaciyi cyènda bìmpè ne Branham Tabernacle ncyòci eci. Nudi numòna’s, kùdi mishindù yibìdi yà diitabuuja. Kùdi mishindù yibìdi yà bukolè, ànu bu mùmvwà mucyàmbe ditukù adi amu. Mishindù yibìdi mishilàngàne yà dimanya. Mishindù yibìdi mishilàngàne yà didikanda.

¹⁴¹ Bàmwe bàdi bèèla meeji ne bàdi naadi ku mukàndù, ùdìbo naawù. Adi kì mmùshindù wà didikanda didì Nzambì wàmba nànsha. Bwalu mbwà cilunji cìbi, cìdi kaciyi cikòntononyiibwa cyùdi naaci aci, ne bintu byà mùshindù awu, bìdi byènza ne wèwè ùbìnduluke pa lùkàsà, ùtànganganè.

¹⁴² Lutùlù, ne bikwàbò, kùdi byà bitentula, byà budìngibudìngi; diitabuuja difidiibwe kùdi bufùki; bukolè bufidiibwe kùdi bufùki. Kùdi didikanda difidiibwe kùdi bufùki. Bintu byònsò ebi mbifidiibwe kùdi bufùki.

143 Ne citùpà cyà citàmbe bunène cyà diitabuuja dyètù ndiitabuuja dyà mu mutù. Mu kutèeleja kwà Dìyì, bìdi bitùfikisha ku dijingulula dyà mu mutù dyà Nzambì.

144 Kàdi bu Edi edi, dìdì difùmina Muulu edi, kaa, mwanèètù, Dyòdi dididìnge dilenge *eci*, kùdi diitabuuja dyà nyumà dyà difwànà dyà Nzambì. Dìbà adi diitabuuja adi didi dyenza cinyì? Diitabuuja adi didi dijingulula ànu Dìyì. Cìdì ní ncinyì cikwàbò cyàmbe nànsha ciikàle cinyì, didi dyòdi dijingulula ànu Dìyì, bwalu, “Ku cibangidilu kwàkadi Dìyì, ne Dìyì dyàkadi ne Nzambì, ne Dìyì dyàkadi Nzambì.” Ne Dìyì dicidi ànu Nzambì. “Ne Dìyì dyàkavwijiiibwa mubidi ne dyàkasòmbela munkaci mwètù.” Ne pàdi Dìyì Dyòdi diine dipòngoloka mu diitabuuja dyètù, diitabuuja dyètù dyà mu mutù didi dilwa dibuulula dyà nyumà.

145 “Ne pa cishimikidi *eci* Nèngiibakilèpu Èkèleeziyà Wanyì.” Nwamònu anyi? Ki mpa ngeelèlù wa meeji wa mu mutù wa dikashàala wa mu èkèleeziyà, ngeelèlù wa meeji wa mu mutù wa wa Cyòci aci to; kàdi pa dibuulula, dìbà didi tusùlù twà ngàsà atu tupòngòlòkele mu diitabuuja dyà mu mutù dyùdì naadi adi. Pashiishe, pa cyòci *eci*, dibuulula dyà nyumà ne: “Nèngiibakilèpu Èkèleeziyà Wanyì, ne biibi byà ifernò kabyèna mwà kuMutàmbe bukolè to.” Nwamònu anyi? Aci cidi cileeja ne bàvwa mwà kuMulwisha, kàdi kabyàdyàkutàmbe bukolè to. Kaa, cintu cyà butùmbi kaayipu’s wè! Mpindyewu tàngilàayi diitabuuja. Tusùlù tùtaanu etu. . .

Mvwa ne katùpà kàà lupèmbà mwab’ewu, kàdi ndi ngèèla meeji ne kî mmukàtwàle nànsha.

146 Kàdi tusùlù tùtaanu tunùdì numòna tùpwekela mwab’ewu etu, tudi tütuyisha cyònsò *eci*. Ùvwa n’Nyumà Mwímpe wàkenza èkèleeziyà wa Efèsò. Ùvwa n’Nyumà Mwímpe wàkalela èkèleeziyà wa Seemùnà. Nyumà Mwímpe ngwàkafila èkèleeziyà wa Peegàmò, ne èkèleeziyà wa Twatilà, mu Bikondo byà Mìdimà. Nyumà Mwímpe ngudi mwibàke Mukàji-musèla awu, Basungula bàdi bapàtùdiiibwe mu ndongolwelu yà bulongolodi mu bikondo byònsò, mùshindù awu abu. Kudi Musungula, Mukàji-musèla mudyànjila kulongolola wa Yesù Kilistò, mmùmwa ne Nyumà Mwímpe mubiikile pambèlu Musungula awu. Ne civwa n’Nyumà Mwímpe mu cikondo *eci*, cikondo *aci*, cikondo *aci*, *aci*, *aci*, *aci*, *aci*, cyènda cibànda too ne ku lusongo, Nyumà Mwímpe.

147 Nènku mpindyewu bu mùdì mu bantu nkààyà, makolè aa ne bikwàbò, adi dimanya ne didikanda, bìdi bisàkidiibwe ku diitabuuja dyètù. Dìbà adi pààlwà Dibwe dyà mùsongà, Nyumà Mwímpe ùdi ùBilamakaja pàmwè. S’ki dibàtiiza dyà Nyumà Mwímpe adi. Ki bwà cinyì nciitàmbe kwikala cyà mpùùkapùùka menemene leelù ewu.

148 Ngǎnjibi kutàngila apa, ndi ne mifundu ndambù yíndi mufunde mwaba ewu. Tùmonèbi tǔng. Mvwa ne cimfwànyì cizola mwab'ewu, bwà cilòòtà cyèndè aci. Nwamònu anyi? Kanwèna mwà kucimwènena lwà aku to.

149 Mpindyewu, cyùmukila kùdì Nyumà Mwîmpe, cìdì cilwe aci ncinyi? Dìbà adi Yèyè neàkupèeshè, diitabuuja ditàmbe mfùkulu, diitabuuja dyà nyumà, didì lwà mu ndòndò *emu*. Dìbà adi diitabuuja dyà nyumà adi didì djingulula ànu Dìyì nkààyaadi. Nànsha muntu kanà yònsò ewu mwambe cinyi, kacyèna—kacyèna ne dikwàcisha nànsha òmwè to. Adi's didì dimanyè ànu Dìyì. Muntu kampànda yèyè wamba ne: “Matùkù à bishimà àkaadi mamane kupita.” Diitabuuja adi ndimanyè ànu Dìyì. Muntu kampànda ùdi wàmba ne: “Cintu pààci ne ndibatiiza dyà Nyumà Mwîmpè kacitùku to.” Diitabuuja adi ndimanyè ànu Dìyì. Aci ncyà bushùwà, diitabuuja dyà nyumà, nudi numòna's. Ncyà bushùwà. Nwamònu anyi? Ndimanyè ànu Dìyì.

150 Dìbà adi, aci ke cìvwà cyà kumpàla. Cyà kumpàla, cìdì cìlwa kùdì, ndiitabuuja dyèbè dyà mu mutù ànu mwaba ewu, ke Nyumà Mwîmpe ewu ùpweka ubwela mu diitabuuja dyèbè dyà mu mutù, bwà kudìvwija diitabuuja dyà nyumà. Dìbà adi diitabuuja dyà nyumà didì djingulula ànu Dìyì.

151 Mpindyewu, ne ciibìdì, ciisàtù. Dìbà adi newìkalè ne cyà nyumà, newìkalè ne Nyumà Mwîmpè, ne neàtwe bintu byònsò *ebi* citampì munda mwèbè, pàdì Nyumà Mwîmpe ùlààdila *eci*. Kuumukila ku diitabuuja dyèbè, too ne pàdì Nyumà Mwîmpe, ùkutwà citampì munda pàmwè ne Kilistò. Dìbà adi nudi nushààla Umwe. Amen. (Nguumùshìle cintu eci mu njila wanyì; cìdì citàcisha mabòko.) Nudi nushààla umwe. Nwamònu's, wèwè ne Kilistò nudi nusòmba pàmwè. “Mu ditùkù adi nenùmanyè ne Mémè ndi munda mwà Taatù, Taatù munda Mwànyì; Mémè munda mwènù, ne nwènù munda Mwànyì.” Nwamònu anyi? Dìbà adi ncimùkù citwìbwe citampì cyà Mukalenge Nzambi.

152 Mpindyewu, ne pashìishe mbashindikìibwe ne batèèkìibwe. Pàdì dìbà adi dikùmbàna, bàdi balwa bânà bàà balùme ne bàà bakàjì bàà Nzambi bashindikìibwe.

153 Nudi bavùlùke, lwà mu Mukànda wa Maatàayi, nshapità wa 17, ku mvensà wa 1 too ne mwi5, Yesù pa Mukùnà wa Dikùdimuka dyà mpàla?

154 Nukàadi buumvwa *Mutèèlèjaayi*. Dìyiisha ndìvwà mfùma ku dìyiisha, mwaba ewu kùkaadi cidimu cijimà, didì dishààle dyà mwasàkànaayi adi, *Mutèèlèjaayi*. Dishikikiibwa dyà mwànà, mu Efèsò 1.5 kàbìdì ne: “Nzambi mmudyànjile kutùlongolola ku ditèèkiibwa dyà bânà.”

155 Nwamònu's, dìkù kampànda, pàdì mwànà wa balùme mulediibwemu, yèyè mmwànà wa balùme dìbà adi. Kàdi mwànà wa balùme awu ùvwa ne bandeji bwà kumukolesha. Kàdi mwànà

wa balùme awu yéyè kàyì mufikè mu—mu cipidi cijalàme cyà mwànà wa balùme to, kadyàkushààlaku mupyanyi nànsha. Kàdi bu ne yéyè ùvwa mwànà wa balùme mujalàme, ne mwànà uvwa mwà kutùmikila tatwèndè awu, dībà adi mwànà awu ùvwa mutèèkiibwe, anyi mushikikiibwe bilondèshile myaba. Ùvwa ùlwa mupyanyi wa civwà taatù naaci.

156 Ne ki civwà Nzambi wènza pa Mukùnà wa Dikùdimuka dyà mpàla. PàakangatàYe Mwan'Endè Sungasunga, paanyimà pàà Yéyè mumanè kujaadikiibwa ne ùvwa m'Mwànà wa cyà bushùwà, nwamònu's, ne ùkaavwa mukàndàmèène mateeciibwa ònsò, KuMubàndishayè pa Mukùnà wa Dikùdimuka dyà mpàla ne kuMubwikila ne mundidimbi.

157 Nudi bamanye's, mu Dipungila Dikùlukulu, bàvwa bàngata mwànà wa balùme, bàmuvwàdika bilàmbà bilenga, bimpè byà dikèma, ne bàmushikika pambèlu munkaci mwà bantu bitùule. Bàvwa bènza mushingà wà dishikikiibwa, anyi mutùdì tucibikila ne ditèeka. Mu Ngalàtiyà mwàmwa, ndi ngeela meeji ne Pòlò ùdi ùciteeya bu ditèekibwa dyà bânà bàà balùme. Mpindyewu, kàdi, ditèeka dyà mwànà wa balùme, bambi nebuumvwe, ne babadi bàà nyumà, bàà Bible, bwà ditèekiibwa dyà mwànà wa balùme ewu. Mu ngaakwilù mukwàbò, mwànà awu ùvwa mwànà wa balùme pàvwàye ùlediibwa.

158 Ki mwaba ùdi beena Mpenta bèètù aba benze cilèma ngwàwù. Mulediibwe mu dīkù, ku Nyumà Mwimpè, ncyà bushùwà, kàdi dībà adi tudi ne cyà kwikala bânà bàà mùshindù mujaalàme, balongèshìibwe kùdì Ndeeki mujaalàme. Nwamònu anyi?

159 Mpindyewu, pàvwà muntu, mu cikondo cyà kale mwàmwa, wèla meeji bwà mwànèndè wa balùme, ùvwa ujinga bwà kwikalayè mwànà wa balùme wa ngiikàdilu mujaalàme, ùvwa ùpeta ndeeji mutàmbe bwimpe uvwaye mwà kupeta awu, mulongeshi mwimpè ku bònsò, bwalu ùvwa ùjinga bwà mwànèndè wa balùme kukolayè kushààla bu tatwèndè. Nwamònu anyi? Pa nànkù ùvwa upeta ndeeji mujaalàme.

160 Mpindyewu piikalà muntu wa pa buloba apa mufwànyine kwela meeji bwà ndeeji mutàmbe bwimpe, kàdi netwambe bishi bwà Nzambi, Taatù wetù? Mpindyewu, kacya kàtu mwànji kwangata bèèpiskòpò, ne ba kardinale, ne bansaserdòse nànsha. Yéyè wàkangata Nyumà Mwimpè bwà kwikalayè Ndeeki wetù. Ne Nyumà Mwimpè ki Mulongeshi wetù. Ne Yéyè—Yéyè ùdi mu Èkèleeziyà, ne Yéyè ùdi ùfikisha mukenji kùdì Taatù.

161 Ne pashìishe bu taatù, anyi, ndeeji mwà kuuuka e kwamba ne: “Èè, Taatù. . .” Mpindyewu, yéyè kí mmuswè kwangata ndeeji kampànda udi muswè buneeme ku cifulu cyèndè aku, nudi bamanye's, lusàlà, mutùtù twalùbiikila amu. Wàmba ne: “Kaa, mèmè mwambile taatù cintu kampànda bwà bwalu ebu. . . Mwànà wa balùme wàwa mmuntu muvilè diitaba, yéyè

mwine, kàdi bu mèmè mwà—bu mèmè mwà kwambila taatù, taatù mmufwànyine kumbàdishila difutu.” Awu ki ndeeji wa mùshindù mwîmpe to. Ndeejì wa mùshindù mwîmpe ngwa meeji matòòke, wàmba bulelèlà.

¹⁶² Ne Nyumà Mwîmpè ùdi wàmba Bulelèlà pàdiYe ùlwa kumpàlà kwà Nzambì, bwà bwalu bwètù. Èyowà. Pa nàнку Ùdi ùbànda. Udi wela meeji bìshi? Ùvwa mufwànyine kufwa bundù leelù pa kwamba ne: “Bànà bèèbè bàà bakàji bàdi bàkòsa bònso nsukì yàbò, kadi Pèèbè mubambile bwà kabàyìkosu to. Bànà bèèbè bàà balùme mbatàmbe kwikala badifile ku malongolodi, mu mùshindù wà ne kabèenaku mwà kutwàlanga muntu ne mukwèndè to. Mmwòmò. Kàdi bàdi basungula *eci* pamutù pà Eci, ne *eci* pamutù pàà Cyàcyà.” Mùshindù mwinè Ùdiye ne cyà kufwa bundù’s we! Kàdi mùshindù wùdì Ndeejì awu mwà kunanga bwà kulwa kwamba ne: “Kaa, ekèlekèlè! Mwànà awu mmwànà wa balùme mulelèlà. Yèyè ùdi ànu mùdì Taatù amu.” Kaa, mùshindù mwinè ùvwàYe mufwànyine kunanga kwamba aci’s wè! Nwamònu anyi?

Dìbà adi Taatù ùdi ùdyùmvwa maleela, wàmba ne: “Ewu mmwànà Wanyì wa balùme!”

¹⁶³ Ki cyàkenzà Nzambì menemene pa Mukùnà wa Dikùdimuka dyà mpàla. Mònaayi, ki Mòsà ne Eliyà kumwènekabo. Ne Peetèlò, musaluke yònsò; citàmbe-mfùkilu kwenjiibwaci. Peetèlò musaluke, kwambayè ne: “Twibakè ntentà yisàtù, umwe bwèbè Wèwè, ne umwe bwà Mòsà, umwe bwà Eliyà.”

¹⁶⁴ Pàcìvwàye ànu wàkula apu, Nzambì kumubwikidijayè mukana. KwambaYè ne: “Ewu ewu m’Mwànà Wanyì munanga mwena munda mmùNdi ntàmbà kusànkila. MutèèlèjaaYi.” Nwamònu anyi? Nzambì wàkaDìpingaja paanyimà, ne: “Ewu m’Mwànà Wanyì.”

¹⁶⁵ Mòsà uvwa uleeja mikenji. Bapròfetà bàvwa bàleeja bwakàne Bwèndè. Katùvwa mwà kwikala ne mwoyi ku mikenji Yèndè to. Katùvwa mwà kwikala ne mwoyi ku bwakàne Bwèndè to. Ncyèna ndòmbe bwakàne to. Ndi nkengela luse, kî mbwàkàne to. Ncyèna mwà kulama mikenji Yèndè to, ne ncyèna mwà kutwilangana ne bwakàne Bwèndè to. Kàdi ndi nkèngela luse Lwèndè. Ne Nzambì wàkamba ne mikenji ne bwakàne byàkakùmabajibwa munda Mwèndè. “Yèyè m’Mwànà Wanyì munanga. NùMutèèlèjaaYi. Ki Yèyè awu. Ki Yèyè awu.”

¹⁶⁶ Mpindyewu, mu Dipungila Dikùlukulu pàakatèèkiibwa mwànà awu, anyi mutèèkiibwe mu dikù, dìnà dyèndè dìvwa dikùmjàne pa shekè ànu mùvwa dyà tatwèndè amu. Èyowà’s, mukalenge. Kabàvwa ne... Bàvwa ne kakànù, mu matùkù awu, ci—cimanyinu, citampì. Nènku bàvwa...[Mwànèètù Branham ùdi wènza bu udi utwila matè ne ùtuuta cintu pa cyambilu—Muf.] Bàvwa bàtwilapù matè, baàlabapù, ke cìvwà citampì. Aci cìvwa ànu bu mùdì... Ùvwa ùlwàta kakànù kàà

tawèndè, citampì cyèndè. Nènku aci cívwa címpe ànu bu cyà tatwèndè.

¹⁶⁷ Mpindyewu, pàvwà Yesù mutùmike, Yesù kùdì Nzambì, Nzambì wàkaMutèèka bilondèshile myaba ne: “Ewu n’Yèyè.”

¹⁶⁸ Mpindyewu, pàdì cidimba cilediibwe kùdì Nyumà Mwímpè mu díkù dyà Nzambì ne bishindikiiibwe ne ùdi ne makolè aa munda mwèndè, bwà ne Nzambì ùdi mwà kumòna bukolè, dimanya, didikanda, lutùùlù, dinangangana dyà bwànà bwètù, ne difwànà dyà Nzambì, munda mwèndè, díbà adi Nzambì ùdi ùmutwà citampì, anyì ùmutèèka pa kaaba. Nènku, mwaba awu, ki paùdi umòna bânà bàà balùme ne bàà bakàji bàà Nzambì.

¹⁶⁹ Pashiishe, Efèsò 4.30 ùdi wàmba ne: “Kanùbungamiji Nyumà Mwímpè wa Nzambì to, unùdì batwibwe nendè citampì too ne ku Ditùkù dyà bupikudi bwènu.” Mpindyewu, bàmwè bàà ku nwènu ba-Baptistes bàdi baswè kwimanyina pa dikùbiibwa dyà Cyendèlèlèlè, mpindyewu, bu nwènu mwà kufika ku cipidì aci, Nengiimane neenù mu dikùbiibwa dyà Cyendèlèlèlè, bu nwènu mwà kufika pa mwaba awu.

¹⁷⁰ Kàdi ànu bwà kwamba cyanààna, muntu kanà yònsò ewu wàmba ne: “Ndi mukashàale wa mu èkèleeziyà wa ba-Baptistes. Ndi Presbytérien. Ndi ne dikùbiibwa dyà Cyendèlèlèlè.” Aci ncyà mafi. Nsòmbelu webè wèwè mwinè ke udi ùshindika ne kwena Nendè to, pàdiYe kàyì mwanji kwikala munda amu nànsha.

¹⁷¹ Ne Nzambì mukutèèke ne mukutwè citampì ku Nyumà Mwímpè mukubweje mu Bukalenge, pa nàнку kakwèna dipátuka dyà mwómù nànsha. Udi mukùbiibwe bwà Cyendèlèlèlè. Itàbùùja. “Kanùbungamiji Nyumà Mwímpè wa Nzambì unùdì nwènu bònsò ne makolè ènu à difwànà dyà Nzambì awu batwibwe citampì too ne ku Ditùkù dyà bupikudi.”

¹⁷² Ndi ngiitabuuja ne kùdì Mukàji-musèla udi mudyanjila kulongolola. Ndi ngiitabuuja ne Nzambì mmwambè ne Yèyè ùvwa mwà kwikala ne “Èkèleeziyà kàyì katobà anyi mufudi to.” Ndi ngiitabuuja mu didyanjila-kulongolola, ne Mukàji-musèla mmudyanjila kulongolola. Bikèngela ikalè Mwómò amu. Ndi ntèkemena ne nengiikale Nendè. Bwa ne, nwamònu’s, mémè nengiikale Nendè. Mpindyewu mbilààle kùndì bwà kukwàta mudimu bwà lupàndù lwànyì sungasunga ne Nzambì, too ne piikalà bintu *ebi* ne cyà kujaadikiibwa kùdì Nzambì, ne pashiishe kutwibwa citampì mu Bukalenge bwà Nzambì. Ki Nyumà Mwímpè nyèyè awu. Ki byenzedi bishùwashùwàlè byà Nzambì mbyòbì abi. “Ncitwibwe citampì too ne ku Ditùkù dyà bupikudi.”

Ke cívwa cilòòtà cyèndè ncyòcì aci. Ngeela meeji ne cívwa cilenga.

¹⁷³ Mpindyewu, ki bwà cinyì, pàdiYe wènza nàнку, pàdì Èkèleeziyà awu ùlwa mu mwaba ewu, anyì muntu-nkààyà, Èkèleeziyà neikalèKu. Lekèlaayi ncyambe bímpe menemene bwà

nwênù kucyùmvwà. Èkèleeziyà mmudyànjila kulongolola bwà yèyè kwikalaKù. Ndi muswè kwikala Nendè, kàdi mùshindù umwèpelè ungiikala Nendè, ngwà kwikala citùpà Cyèndè. Mmunyi mûndi ndwa citùpà Cyèndè? Pa kwikala mu Yèyè. Mmunyi mûndi mbwelaMù? Nku dibàtiiza kampànda, ku Nyumà umwe. Kolintò wa Kumpàla 12: “Ku Nyumà umwe nkutùdi bônso babàtiijiibwe mu Mubidi wùmwè.” Mubidi wùmwè; babàtiijiibweMù.

¹⁷⁴ Kàdi kwènà mwà kulamika tuntu tukèsè etu to, wamba ne: “Ndi mwakule mu myakulu. Ndi Nendè.” Upàtuka pambèlu apa, mufiike munda, wènda udìcipa, wenda wenza maalu à lukutukutu. Nwamònu anyi? Aci nkwasà masàlà à nyuunyi wa kayiba mu—mu nyuunyi wa cibonkola. Nwamònu anyi? Kwèna mwà kucyènza to. Nsòmbelu webè sungasunga ngudi ujaadika ne kabyèna nànkù to.

¹⁷⁵ Kàdi díbà dìdì bintu ebi munkaci mwà kukwàcila mudimu munda mwèbè, kùdì Nzambi, díbà adi udi mutwìbwe citampì. Díbà adi kakwèna byà ditelakajapù to. Wèwè udi ànu wèwè mwinè. Ki pàdi bikèèna-kumòna, bipwàngàne, Nyumà Mwimpè, byenzedi byà Nzambi, byònsò, bìmwèneshiibwa, bwalu (bwa cinyi?) wèwè ne Kilistò nudi balwè umwe. Ndi ntèkemena ne aci ncyumwike. Wèwè ne Kilistò nudi balwè umwe.

¹⁷⁶ Mvwa ne cintu cikwàbò kàbìdì cìmvwa mufùnde kaaba aka, cìmvwà muswè kwelelapù meeji. Cidi citùfikisha pa kaaba kàà Mwoyi. Díbà udi ushààla. . . upeta Mwoyi wà Cyèndèlèlè.

¹⁷⁷ Mpindyewu, ndi ne mukàndà wà mbùmbilu wa myàkù wà cyena Ngèlikà, *The Emphatic Diaglott*. Mèmè kulonga ditùkù dikwàbò pa mwàkù kampànda.

¹⁷⁸ Mpindyewu, mu Yone 14, anyi Yone 3.16, tudi tusangana ne, mwaba wùmwèpelè wùdi wàmba ne: “ìkalà ne Mwoyi wà *kashidi*.” Mwaba mukwàbò ùdi wàmba ne: “ìkalà ne Mwoyi wà *Cyèndèlèlèlè*.” Kàdi mu cyena Ngèlikà, mu nkùdimwinu wa cyena Ngèlikà. . . Mu beena Ebèlù, cidi cyàmba ne: “Mwoyi kawùyi ne ndekeelu to.” Mu cyena Ngèlikà, nkwikala ne a-i-n-i-o-a-n.

¹⁷⁹ Mbyenze ànu bu mùdì “*aeon*.” *Aeon* ùdi “ntàntà” ùdi kàyì mwà kwikala to, mbùngì bùdì kabùyi mwà kubadiibwa. Mbisambùke pa miliyo, binunu byà miliyàlà, miliyàlà.

¹⁸⁰ Kàdi eci cidi *aionios* yà cikondo, Mwoyi wà Cyèndèlèlè. Kàdi mwaku wà cyena Anglais bwà cyòci aci ùdi wà Cyèndèlèlè. Tudi bawùmanyè ne ng’wà Cyèndèlèlè, *aionios*, anyi “Mwoyi ùdi kawùyi ne ndekeelu nànsha.” Nwamònu anyi? Nènku wèwè ne Mwoyi ùdi kawùyi ne ndekeelu to, mmunyi mùdì mwà kubùtuka? Udi mulwè citùpà cyà Cyèndèlèlè. Nènku kùdì cintu ànu cìmwèpelè cyà Cyèndèlèlè.

¹⁸¹ Sàtaanà kí ngwa Cyèndèlèlè to. To. Yèyè—yèyè wàkalwa Sàtaanà. Ifèrnò kí ngwa Cyèndèlèlè to. Ifèrnò wàkafukiibwa. Ki

ngwa Cyendèlèlè to. Ne mibidi eyi kí nyà Cyendèlèlè to. Yìwwa mifùkìibwe.

182 Kàdi Nyumà wa Nzambì ngwa Cyendèlèlè. Kacya kàtu mwanji kwikala ne mbilangu to, anyi kacya kàtu mwanji kwikala ne ndekeelu nànsha. Ne mùshindù ùmwèpelè utùdi mwà kupeta Mwoyi wà Cyendèlèlè, wa ku mwàkù wa cyena Ngèlikà awu, Zoe awu, mbwena kwamba ne: “Mwoyi wà Nzambì sungasunga,” tudi ne, tudi tulwa citùpà cyà Nzambì patùdi tulwa bânà bàà balùme ne bàà bakàji bàà Nzambì, ne tudi ne Mwoyi wà *aionios*. Pa nàнку citùpà cìdi ne mwoyi, twètù, bàdi bajingulula Dìyi edi, kuumukila *apa* too ne *kwàka*, bàdi bajingulula, bàdi Mwoyi wà *aionios*, “Mwoyi ùdi kawùyi ne ndekeelu to.” M’Mwoyi wà Nzambì Sungasunga munda mwètù. Amen. Yoyòyò!

183 Dìngà ditùkù, mu lwendu, mvwa ne dikokangana, ne Ntèmù wa Yèhowàh. Mpindyewu, nciyi ndyùla ditabuuja dyà nì nganyi nì nganyi to. Tudi ne bààbùngi bàdi bakùdimune mucima basòmbe mwaba ewu, buumukila mu Bantèmù bàà Yèhowàh. Umwe wa ku balubuludi bèètù bàà èkèleeziyà uvwa Ntèmù wa Yèhowàh, *uvwa*, kàdi wàkasungidiibwa, yèyè ne famiye wendè. Tatwèndè uvwa mubadi; Mwanèètù Wood ne bakwàbò abu. Bânà bàbò bônso bàà balùme ne bàà bakàji, pàmwè ne bônso bààkalwa, e kupetabò Nyumà Mwímpe, bwalu bìkèèna-kumòna byà Nzambì byàkabàmbila bìvwàbò bènzè. Ne bìvwàbò... Nwamònu anyi? Ke cyàkacyènzà.

184 Mpindyewu, kàdi mwaba ewu, Bantèmù bàà Yèhowàh mu mukàndà wàbò, bàdi bàmbamù ne mupùyà wùdi weyela awu ke musùùkà. Mpindyewu aci kacyna mwà kwikala cilelèlè to. Mupùyà ùdi weyela kí mmusùùkà to. Byòbì nàнку, udi—udi musangu ùmwè udi musùùkà wà mùshindù kampànda, musangu ùdi ùlonda udi muntu mukwàbò wa pàtupù, udi mupàtùle mwinè musùùkà awu. Wamònu mwaba ùvwa mwà kwikala usanganyibwa’s. Mpindyewu, mupùyà ndupeepèlè, ne lupeepèlè ndòlò lùdi weyela mu mimpèmpè yèbè.

185 Mpindyewu, bàdi bàngata Mufùndù wà kwàka wà ne: “Nènku Nzambì wàkapùdija Mupùyà mu mimpèmpè, ne yèyè wàkalwa musùùkà wùdi ne mwoyi.” Mpindyewu, ndi muswè kunùkonka cintu kampànda. Piikalàbi ne yèyè ùvwa muntu, mmupùyà wà mùshindù kaayi ùvwàyè weyela kumpàla kwà Nzambì kumwelayè Mupùyà Wèndè wà Mwoyi munda mwèndè? Nwamònu anyi? Mmupùyà wà mùshindù kaayi? Yèyè’s ùvwa muntu wa wèyela, mwikale ne mwoyi. Èè, dìbà adi, piikalàbi nàнку, dìbà adi nyama yònsò ùdi musùùkà ùdi ne mwoyi, bwalu bàdi bèyela musùùkà wa buntu, ne musùùkà wètù, ne bônso pàmwè. Dìbà adi Yesù kàvwa ne cyà kwikala mufwè to. Mulambu wà nyama ùvwa mwà kwikala mukùmbàne. Nwamònu anyi? Pa nàнку, mwanèètù, didìbingisha adi kí ndishìndàma to.

¹⁸⁶ Kàdi cyàkenzà Nzambi, Yèyè wàkapùdila Mupùùyà wà Mwoyi wà Cyendèlèlè, amen, pashìshe kulwayè musùùkà wùdì ne mwoyi, musùùkà ùdì kawùyi mwà kufwà to. Mpindyewu tàngilàayi mpindyewu. Tudi tudìbwinka mu bwìci, bufika too ne mu nkèngiibwà yènu amu. Mònaayi. “Kupwidijaye Mupùùyà wà Mwoyi wà Cyendèlèlè mu mimpèmpè yèndè amu, e kushàalayè musùùkà wà Cyendèlèlè.” Bwalu, Nzambi wàkapwidija, kaciyi cidì bufùki bwènze to, kàdi cyàkenzà Nzambi, e kupwidijaye Mupùùyà wà Mwoyi mu mimpèmpè yèndè, e kulwayè musùùkà ùdì ne mwoyi.

Dìbà adi udi ungambila ne: “Adàmà wàkafwà, Mwanèètù Branham.”

¹⁸⁷ Kàdi vùlukàayi ne, kumpàlà kwà Adàmà kufwàye, ùvwa ne mwànà wa mùkòòkò wàkamupikula. Àlèluuyah! “Aba bàakadyànjilàYe kumanya, Yèyè wàkabàbìkila.” Ùvwa ne mwànà wa mùkòòkò bwà kubàpikula. Ùvwa cifwànyikijilu. Adàmà wàkapòna. Pashìshe mwànà wa mùkòòkò wàkalongolodiibwa bwà Adàmà, bwalu mu mimpèmpè yèndè ùkaavwa mushàale Mupùùyà wà Nzambi wa Cyendèlèlè, ne wàkalwa musùùkà wùdì ne mwoyi. Yèyè ùvwa mwànà wa Nzambi.

¹⁸⁸ Kaciyi mupùùyà wèndè to, byènze bu mwàkù wà cyena Àfrikè nànshà. Ncyèna mumanyè cidì mwàkù wà cyena Ngelikà wàmba bwàci to, bwa mpindyewu. Kàdi mwàkù wà cyena Àfrikè, bàdi bàbìikila ne *amoyah*, ùdì ùswa kwamba ne: “lupeepèlè; dikàndà didì kadiyi dimwèka ne mèsù.” Nyama yitu yèyela ku amoyah. Bangènzàmpeèkàtù bàtu bèyela ku amoyah.

¹⁸⁹ Pa nàнку citùdì mwà kulwangena bwà Mwoyi wà Cyendèlèlè ncinyi, pìikalàbi ne musùùkà wà Cyendèlèlè mmubwele munda mwètù ku dyèyela? Bwà cinyi tudi mwà kulwangana bwà Mwoyi wà Cyendèlèlè? Bwàtù ntanga cibwa’s, mwanèètù. Nwamònu anyi? Kacyèna—kacyèna—kacyèna ànu mwà kucyènzà to.

¹⁹⁰ Kàdi, Nzambi, nangananga bwà Adàmà, wàkapwidija Mupùùyà wà Mwoyi wà Cyendèlèlè, ne wàkalwa muntu wa Cyendèlèlè pàmwè ne Nzambi. Ùvwa ne bukolè ànu bu Nzambi. Yèyè ùvwa nzambi wa mwànà. Yèyè ùvwa nzambi wa buloba; kàdi, kì Nzambi wa mu Dyulu to. Nzambi wa buloba!

¹⁹¹ Ne dīngà ditùkù bānà bàà Nzambi nebālwe cyàkàbìdì banzambi. Yesù ngudi mwambe nàнку. “Kì mbifundìibwe mu mikenji yènu ne: ‘Nudi banzambi anyi?’ Kàdi panwikalà nubìikila aba bàakabìikilaYè ne nzambi, aba bàakakùmbulà Nzambi, mmunyi munùdì mwà kuMpiisha, nwamba, pàndì ngamba ne Mèmè ndi Mwànà wa Nzambi?” Nwamònu anyi? Mpindyewu tudi tubwela mu cintu kampànda cyà ndòndò.

Mpindyewu tàngilàayi eci díbà ditùdi twenda tupopela musonso edi.

¹⁹² Mpindyewu, s'ki bòbò aba. Yèyè ùdi mpindyewu mwànà wa Nzambi, kàdi ùdi wènza cilemà. Yèyè mmumanyè ne ùdi wènza bibì. Mpindyewu vùlukàayi ne, Adàmà kàakaseeswishiiibwa to. Bible ngudi mwambè nàнку. Timòtè wa Kumpàla 3. “Adàmà kàakaseeswishiiibwa to, kàdi mukàji awu ngwàkaseeswishiiibwa, ùvwa mu dishipa dyà mikenji.” Adàmà wàkalonda Evà, bwalu yèyè ùvwa mukàjèndè.

¹⁹³ Byàmwomùmwe ne Kilstò, kàakaseeswishiiibwa kùdi Sàtaanà to, kàdi wàkabwela mu lufù ne Mukàji-musèla. Wàkaya kashàala ne Mukàji-musèla, bwà Wàmòna mwà kupikula Èkèleeziyà.

¹⁹⁴ Adàmà ùvwa mumanyè ne ùvwa mupiile, pa nàнку wàkapatuka ne Evà. Nwamònu anyi? Kàdi kùvwa mwànà wa mùkòòkò mulongolola bwàbò bòbò, bwà ne bàvwa bapikula.

¹⁹⁵ Nèнку bàna bàà mìkòòkò aba, leelù ewu, bàvwà badyànjila kumanya kùdi Nzambi abu, ne Nzambi mmubiikile, kùdi Mupikudi. “Muntu nànsha umwe kèna mwà kulwa kùNdi pàdi Taatù Wanyì kàyi mumukòke to. Ne bònsò bàdi Taatù muMpèeshe nebàlwe kùNdi.” Ncyà bushùwà anyi? Pa nàнку kùdi Mwànà wa mùkòòkò mulongolola, kuumukila ku difùkà dyà dyulu ne buloba, mwaba wùvwà mènà àbò mafùnda mu Mukàndà wa Mwoyi wa Mwànà wa mùkòòkò awu. Mwànà wa mùkòòkò wàkalongolodiibwa, bwà kuseba njila wa ngàsà bwà yònsò wa kùdìbò àbwelè mu dibìikà dyà ku lufù, Mwànà wa mùkòòkò mulongolola; Mwànà wa mùkòòkò wa Adàmà, mpindyewu mònaayi, bu mùvwà Adàmà ne mwànà wa mùkòòkò mulongolola.

¹⁹⁶ Mpindyewu, aci ki Èkèleeziyà leelù ewu. Ncyèna nswa kwamba e—èkèleeziyà to. Nudi bamanyè mudi bwalu anyi?

¹⁹⁷ Ncyèna ngàmba eci bwà kunyangakaja cijila nànsha, ne ncyèna njinga bwà kutàpa muntu ku mwoyi nànsha. Ncyèna apa bwà kwenza nàнку to, bu munkàdi mumvwiye kiipàcilà kaanyi. Ndi mwab'ewu bwà kwambulwisha, kàdi cìndi nteeta bwà kwenza . . .

¹⁹⁸ Nudi bamanyè mùdi bwalu anyi? Mu bushùwà bwà bwalu, èkèleeziyà eyi kì maèkèleeziyà to. Kùdi Èkèleeziyà ànu umwèpèlè. Aa nùнку mmaswa. Nwamònu anyi? Mmaswa. Ncyèna ne cintu nànsha cìmwè to . . . Bìdi ànu bìmpè. Kàdi ndi—ndi muswè kunùjaadikilaci, mu tusunsa tukesè emu, bwà ne bòbò mmaswa ànu ètù à menemene aa. Wèwè udi wa mu diswa dyà ba-Méthodistes, wa mu diswa dyà ba-Presbytériens, anyi wa mu diswa dyà beena Mpenta, bwà pa bìdi bìtàngila abi. Èyowà, um-hum. Maswa! Nwamònu anyi? Kanwèna mwà . . . Nwamònu anyi? Maèkèleeziyà mmaswa ànu ètù à menemene aa mùdi bantu ne mmwènènu yimwèyimwè bakùngwila pàmwè.

199 Kàdi Èkèleeziyà ùdi Umwèpelè. Ne wêwè kwéna mwà kudivwija mwena Èkèleeziyà to. Wêwè udi mulediibwe munda Mwèndè. Ne paùdi ulediibwa munda Mwèndè, udi cidimba Cyèndè.

200 Ànu bu famiye wanyì. Ndi nsanganyibwa mu famiye wa Branham munda mwà bidimu makumi àtaanu ne bisàtù. Kacya kabàtu bandòmbe bwà mèmè kushààla wa mu fàmiyè ewu. Bwà cinyì? Ncyèna mwà kushààla wa mu fàmiyè ewu to. Ndi mulediibwe Branham.

201 Ne wêwè udi mulediibwe mu Èkèleeziyà. Mpindyewu, bikwàbò byònsò ebi mmaswa. Nukàadikù beele meeji ku cyòci aci anyi? Èyowà's, mukalenge.

202 Dînga ditùkù mwà nkosa mashinda, ne mwà munkaci mwà kwelangana meeji bwà, èè: “Èkèleeziyà munène wa munsantu wa Kàtòlikè,” mùdìbò bàmbiikila. Mwà ngènda ntungunuka mùshindù awu, ne kwenda kukòsa mashinda.

203 Ke Cintu kampànda kungimanyikaci, ne bukole bònsò, cyàmbe ne: “KuCibiikidi mùshindù awu to.” Ki mèmè e kukènzakana. Mèmè e kutunguka ne kukòsa mashinda. Ke kungimanyikaci cyàkàbìdì, cyàmbe ne: “Kubàbiikidi Nàнку to.” Cyàmbe ne: “Bòbo bàdi diswa, ànu mùdì makwàbò amu. Bòbò kí ng'Èkèleeziyà to. Kùdi Èkèleeziyà umwe.” Nwamònu anyi? Bòbò mbidimba byà diswa kampànda, bwalu udi mwà kushààla wa mu diswa kampànda. Kwèna mwà kushààla wa mu Èkèleeziyà to. Èkèleeziyà, udi ulediibwaMù. Udi ulwa cidimba Cyèndè ku Dilediibwa dipyadipyà, dìbà adi cidimba cyà Fàmiyè, mwanèètù wa balùme anyi wa bakàjì munda Mwèndè.

204 Mpindyewu indilaayi nnùbadilè mu *The Emphatic Diaglott* mwab'ewu cintu kampànda, cyà mu Bwàkabuulwibwà 17.3, ne Bwàkabuulwibwà bwà *The Emphatic Diaglott* ebu. Tàngilàayi ànu eci, mùdici cibadiibwa, ne mùdici—mùdici cinwàngana bilenga menemene ne cyòci aci. Bwàkabuulwibwà 16, 17. Eyo. Mpindyewu túbalàayi kaaba aka katanci kakesè cyanààna. Tèèlejàayi eci, ne ntèmà yònsò, Bwàkabuulwibwà 17.3.

Ne umwe wa ku Banjèlo MWANDAMUTEKÈTE ABU mwikàle ne... Mpànzà MWANDAMUTEKÈTE wàkalwà e kwakula nànyì,...

205 Ndi nùbadila, mu *Nkòngamyakù*. “Mwikale ne... ”

...“Lwàku, nènkuleejè CILUMBULWIDI cyà MUKÀJI MUNÈNE WA MASANDI awu, udi musòmbe pa MÁYI MANÈNE awu;

206 Ne twètù bònsò tudi bamanyè ne aci m'Vatican. S'ki cibèjibeji cyà *Mwenyi Wetù Wa Dyàlumingu* eci, cyùmukila mu èkèleeziyà wa Kàtòlikè, citwàmbila menemene cidìci. Nwamònu anyi?

207 Nènku eci cidi cicyàndamuna, cyàmba ne: “Kàdi anji indila kakesè.” Cyàmba ne: “Kùdi mēna à mishindù yònsò,” cyàmba ne: “mafwànyine kwenza nkàmà yìsambòmbò ne makumi àsambòmbò ne yìsambòmbò.”

Mēmè kwamba ne: “Kàdi anji indilaayi kakesè.”

Yèyè ne: “Dìnà dyèbè ndifwànyine kwenza nkàmà yìsambòmbò . . .”

208 “Kàdi,” mûngàakambà, “Ncyēna musòmbe pa tukùnà mwandamutekète to, mwikàle nkòokesha bàà pa buloba, nànsha nàнку, nudi numòna’s.” Uh-huh! Nwamònu anyi? Ncyà bushùwà. Nwamònu anyi?

209 [Mwanèètù Branham ùdi ùbala Bwàkabuulwibwà 17.1 ubadila mu *The Emphatic Diaglott*—Muf.]

. . . nènkuleeje CILUMBULWIDI cyà NDUMBA MUNÈNE, udi musòmbe pa *Mâyì Manène*;

210 *Mâyì*, Bwàkabuulwibwà 17.15: udi “mupimbu ne misùmbà yà bantu.” Nwamònu anyi?

udi *BAMFUMÙ* bàà pa *BULOBA* bendè *nendè* masandi, ne bàdi *BASOMBE* pa *BULOBA* bakwàcike *MVINYÒ* wa ma . . . *MASANDI èndè*.

211 Mpindyewu ncinyi?

Nènku wàkandombola, mu *Nyumà*, mu *Cipèèla*; . . .

212 *The Emphatic Diaglott* mpindyewu. Nwamònu anyi?

. . . ke mēmè kumòna *Mukàjì* musòmbe pa *Nyama* wa diikala dikùnze, mûle tètè ne *Mènà Mapendi* à *Nzambì*, . . .

213 Mpindyewu, mu King James, ùdi wàmba ne: “mûle tètè ne mēna a kupenda nawù Nzambi.” Anji indilaayi kakesè, nènku nēncyāngàtè kaaba aka, katancì kakesè cyanàànà. Bwàkabuulwibwà, mwi3. Èyo, ki cyôci eci. Èyo. Bwàkabuulwibwà, mvwa njinga kwamba 17, kî 7 to; 17, mpindyewu tèèlejàayi mvensà mwi3.

Nènku wàkantùntumuna mu nyumà kuya nànyì mu cipèèla: ke mēmè kumòna mukàjì musòmbe pa *nyama* wa diikala dikùnze, mûle tètè ne mēna à kupenda nawù *Nzambì*, . . .

214 Ke mùdi Anglais ucifila nàнку awu. Cyena Ngelikà cyà ku muji kuumukila mu *The Diaglott* cidi cibadiibwa nùнку, mu Bwàkabuulwibwà 17.3. Tèèlejàayi.

Nènku yèyè wàkandombola, mu *Nyumà*, mu *Cipèèla*; ne nakamòna *Mukàjì* musòmbe pa *Nyama—Nyama*, wa diikala dikùnze, mûle tètè ne *Mènà Mapendi* à *Nzambì*, . . .

215 Acì's ncishiilàngàne bikolè, kuumukila ku “mènà àdì àpenda Nzambi” too ne ku “mènà mapendi à Nzambi.” Ncinyi aci? Nènku twètù. . . Mpindyewu, yêyè ùvwa:

. . . MAAMÙ WA BANDUMBA . . .

216 Twètù bônso tudi bamanýe aci. Kàdi ncinyi aci? [Mwanèètù wa balúme kampàndà ùdi wàmba ne: “Èkèleeziyà wa Kàtòlikè wa cyena Loomò.”—Muf.] Kabyèna bikèngela bwà wèwè kwikala. . . Èè, ncyà bushùwà, aci ncfwànyine kwangata èkèleeziyà wa Kàtòlikè wa cyena Loomò. Kàdi yêyè ùdi “múle tètè ne mènà mapendi à Nzambi,” ba-Méthodistes, ba-Baptistes, ba-Presbytériens, ba-Luthériens, mùdibo bàdibiikila bônso amu, “èkèleeziyà yà Nzambi.” Mènà mapendi Nzambi! Dishiihangana dyàbùngi pankaci pàà “mènà à kumpenda naawù Nzambi” ne “mènà mapendi à Nzambi.” Bàdibiikila bóbò biine ne: “Èkèleeziyà wa Nzambi,” ne bàdileeja kumpàla kwà bàà pa buloba; bàtwa twartà, ne bànwà maalà, bènza maalu à lukutukutu, banwa nsupu mu didyà dyà dilòòlò, ne bikwàbò byónso, ne bintàkanyi byà mishindù yónso byanyishiibwemù.

217 Kùdi Èkèleeziyà ànu umwèpelè. Udi mulediibwe munda Mwèndè. Kwèna ubwela Mwómò amu to too ne paùdi usukudiibwa mu Mashì à Mwànà wa mùkòòkò ne utwibwa citampì kùdi Nyumà Mwîmpè.

218 Dishiihangana kaayipu pankaci pàà “mènà à kupenda nawù Nzambi” ne “mènà mapendi à Nzambi.” Nwacyùmvù anyi? [Disangisha dìdi dyàmba ne: “Amen.”—Muf.]

219 Mémè kubakula cyôci aci mu dindà emu pámvwa mbala kaaba aka, kùdi. . . Ngènda mpweka, Cintu kampànda e kungambilaci ne: “Bwela mu cibambalu cyèbè cyà bulàlu. Ambùlà *The Diaglott*.”

220 Èe, cidi ànu ditùmikila. Kwàjiki. Kubwelamù. Ki mémè kubuulula Bwàkabuulwibwà 17. Mémè kudyàmbidila ne: “Bwà cinyi Udi muswè bwà mémè kubala cyôci eci?” Mémè kubanga kubala. [Mwanèètù Branham ùdi ùtuuta cishòndò—Muf.] Ndi mwenze ànu ncitwa byanza anyi, “Ki cyôci aci.” Ki mémè kwambula crayon e kucifùnda. Mémè ne: “Ki cyôci aci.”

221 Mpindyewu, bàdi bangeela mbila bwà mùndi ntwà malongolodi misèbà. Ngwòwò mènà mapendi à Nzambi awu, àdibo bàdibiikila bóbò biine ne: “èkèleeziyà yà Nzambi, ne èkèleeziyà yà Kilistò, ne èkèleeziyà yà ba-Méthodistes, ne maèkèleeziyà.” Mmaswa, kí mmaèkèleeziyà to.

222 Èkèleeziyà umwèpelè, ki Èkèleeziyà wa Mukalenge Yesù Kilistò awu. Ne Yêyè ùdi cinyi? Mubidi musokòme wà Yesù Kilistò mu mudimu pa buloba, mwenza ne cidimba cyà mu dyónso dyà ku masangisha aa, udi muswè kwikala cidimba cyà Mubidi wà Kilistò. Bìdi bikukèngela wèwè kwikala mulediibweMù, kùyì mukashààla wa Mwómù to.

223 Kàdi kushààla wa mwômò amu, mmênà mapendi à Nzambì, mukàjì ewu. Mukàjì ewu, bukolè bwèndè!

224 Nènku nwamònu ànu mpindyewu mene mùdibo ne cyà kwangata bantu bònsò bàdi ne mmwènenu yà pabwàyì pa bìdi bitàngila ntèndeleelu's, ne kubàtùma ku Alaska. Nudi bamòne cyòci aci's. Miitabuuja ètù wònsò à pabwàwu awu.

225 Kàdi ncinyi ciine aci? Nsangilu, Nsangilu wa Buloba bujimà wa Maèkèleeziyà ne beena Kàtòlikè patùdi twakula apa bàdi ne didisangisha dinène mu Vatican mpindyewu, kuntu kwàka, kwìnè aku nkùdibo munkaci mwà kuteeta. Ne bèepiskòpò bònsò aba, ne bikwàbò, bàdi bàteeta bwà kubwela mu dyumvwangana kampànda, bwà kulwisha communisme. Bà pa buloba bàdi munkaci mwà kulwisha communisme, ànu pa kudisanga ne Bwena Kàtòlikè.

226 Mbyenza ànu bu mùdibi leelù ewu emu. S'ki twètù aba, ànu mùmvwà mwambe. Tudi bayè. . .Tudi ànu bu bamane kutwa panshì. Tudi munkaci mwà kusomba, mwà kutùla mfranga mpindyewu, yà bitàdi byàfutàbò bidimu dikumi ne binaayi kuumukila ku mpindyewu. Ki mutùkaadi baye nàнку awu. Nganyì udi ne mfranga yà buloba bujimà? Èkèleeziyà wa Kàtòlikè. Mmu kiipàcilà kaayi kàyisombeshilàbu États Unis? Mbwà kulama kùmpànyì eyi yà mfwankà ne yà wiski ne bikwàbò. Mmwòmò, nebàbàsombeyi. Piikalàbo benze nàнку, nebàsumbishè bukenji bwàbò bwà bwanaàabutè, bwònsò, kùdi èkèleeziyà wa Kàtòlikè wa cyena Loomò. Tudi tudisanga. Tàngilàayi eci, mbitòòke too, mbitòòke too menemene kutàmba ne dibala dyà cibèjibeji. S'ki cyòci eci. Nwamònu anyi?

227 Mba-Méthodistes, ba-Baptistes, ba-Presbytériens, ne bikwàbò, bàdibìikila ne: "Èkèleeziyà wa Nzambì." Kàtòlikè ne bintàkanyì byònsò byà mùshindù awu ebi ki bukolè bwà nyama wa lwonji bùle tètè ne mènà mapendi à Nzambì. Ùdibìikila wèwè mwine ne: "Ndi. . ." Mèmè kwamba ne. . .

228 Mvwa muyè mu lùpitaadi munu emu, àbìdi mashààle aa, mvwa muyè bwà kasambidila muntu kampànda. Mèmè kwamba ne: "Netwikale ne cyà. . ." Ùvwa mmààwù mundedi. Mèmè ne: "Netùsambidile maamù."

Ki inàbànza awu kwambayè ne: "Kokaayi rìdò awu."

Mèmè ne: "Kwèna mwena Kilistò anyi?"

Yèyè ne: "Twètù tudi ba-Méthodistes."

229 Mèmè ne: "Twasàkidila. Mèmè mvwa ngèèla meeji ne pàmwàpa wèwè ùvwa mwena kwitabuuja." Mèmè kukoka ànu rìdò kunjikaye. Nwamònu anyi? Pa nàнку, pawìkala kùyì mwena Kilistò to, aci's ncishiilàngàne. Nwamònu anyi?

230 Kàdi kwamba ne: "Tudi ba-Méthodistes," aci nkupenda kwà Nzambì. Nyama wa lonji, maèkèleeziyà, àdi àbìkidiibwa ne mmaèkèleeziyà awu, kaèna maèkèleeziyà to. Swàyì ngiikale

mutwishiiibwe ne cidi munkaci mwà kukwàciibwa pa mikàbà yà mèyi. Èyowà. Bòbò kabèèna maèkèleeziyà to. Bàdi maswa. Bantu bàdi bàkashààla bàà mwômò amu.

231 Kàdi kwèna mwà kashààla wa mu Èkèleeziyà wa Nzambi udi ne mwoyi to. Udi mulediibwe munda Mwèndè, ku dibàtiiza dyà Nyumà Mwimpè. Nènku paùdi mubàtiijiiibwe ne Nyumà Mwimpè, makolè aa mmatwibwe citampì munda mwèbè, ku Nyumà Mwimpè, ne ki bwà cinyi: “Èwu udi mulediibwe kùdi Nzambi kàtu wènza mpèkaatù to.” “Kwèna mwà kwenza mpèkaatù to.” Ki bwalu mbwòbù abu’s. Kaa, ekèlekèlè!

Tudi twakula ànu ditùkù dijimà cyanààna, kì mmwômò anyi?

232 Èkèleeziyà m’Mubidi musokòme wa Kilistò, mulediibwe kùdi Mweyelu wa Nzambi. Kaakakakaka! Nwacyùmvù anyi? [Disangisha didi dyamba ne: “Amen.”—Muf.] Èkèleeziyà wa Nzambi mmulediibwe ku Mweyelu wa Nzambi. Nzambi wàkeela Mupùuyà mu mimpèmpè, yà Adàmà, mu nyumà, e kulwayè musùukà ùdi ne mwoyi. Nuvwakù bamanyè ne beena mpenta, anyi Èkèleeziyà mulelèlè wa beena Mpenta, mmulediibwe kùdi Mweyelu wa Nzambi anyi?

233 Swàyì nnubadile cintu kampànda, mu katanci kakesè cyanààna pa bwalu abu. Ngánjì mmonèbi túng, katanci kakesè cyanààna. Yone Munsantu, ngèèla meeji, kúnyààya aku. Netùjandulè ne bìdi nàнку bwa Èkèleeziyà wa Nzambi, anyi kabyena nàнку. Yone Munsantu, twánjibi kumòna, ngèèla meeji ne aci ndwà ku 16,19; 20. Èyo. Apa ndi ngiitabuuja ne netùcipete, mwaba ewu mene. Èyo. Swàyì nnubadile, bwà kumòna Èkèleeziyà ní mmulediibwe ku Mweyelu wà Nzambi, anyi to, bu mùvwà Adàmà ku cibangidilu. Tàngilàayi.

Nènku ditùkù òmwèdìmwè adi ku dilòdò, ciikàle ditùkù dyà kumpàla dyà lumingu, pàvwà biibi bikànga ne bayiidi badisangishe bwà bwòwà bwà beena yudà, Yesù kulwa e kwimana munkaci mwàbò, ne kubàmbila ne: Ditalala dikalè kunùdi.

Nènku pàakamanàye kwamba nàнку, yèyè kubàleja. . . byanza byèndè ne luseke lwèndè. Mùvwà. . . Pashùishe bayiidi bàvwa ne disànka, pàakamònàbo Mukalenge. Ne Yesù. . .

Ke pashùishe Yesù kubàmbila kàbidì ne: Ditalala dùikalè kunùdi: bu mùdi Taatù wànyì muntùme, . . . mèmè pàànyì ndi nnùtùma.

234 Tàngilàayi. Taatù wàkaMutùma wàkabwela munda Mwèndè. Ne Yesù, pàdiYe útùma muyiidi, Ùdi ùbwela munda mwèndè. Umwèumwè awu wàkatùma awu; Nzambi.

Nènku pàkambàye nàнку, wàkabèèla mupùuyà, e kwambaye ne. . . Akidilàayi Nyumà Mwimpe:

235 Èkèleeziyà, mulediibwe ku Mupùùyà wà Nzambì! Pààkadifùmbà cipidi eci kuulu kwàka, mu dikùmbana, ke Mupùùyà wà Nzambì kubàpwekela ne: “Akidilaayi Nyumà Mwímpè,” díbà adi udi mwànà wa Nzambì. Udi mwà kudivwija wa mu cintu kampànda cyùdi muswè kwikala aci, kàdi udi mulediibwe mu Èkèleeziyà wa Nzambì udi ne mwoyi, mulediibwe kùdi Mupùùyà wà Nzambì. Nzambì wàkabèèla mupùùyà pambidi, wàmba ne: “Akidilaayi,” yoyöyò, “Nyumà Mwímpè.” Kaa, ekèlekèle! Ki bwalu mbwòbù abu’s.

236 Kabiyi byà ne: “Lwàku ùshààle wa ku twètù nànsha, fùndishà dínà dyèbè apa to.” Kàdi ne madyà ènù à dilòdòlò à nsupù awu ne byònsò bìdi byèndelamù abi, nudi nukashààla bàà mu diswa kampànda. Udi mwà kudivwija wa mu diswa dyà ba-Méthodistes, diswa dyà ba-Baptistes, diswa dyà Presbytériens, diswa dyà Kàtòlikè, anyi diswa dyà beena Mpenta, cintu kanà cyònsò cyùkaashàadi wa mu cyòci aci, kàdi’s udi ukashààla wa mu diswa kampànda.

237 Kàdi paùdi ulwa mwànà wa Nzambì, udi mulediibwe ku Mupùùyà wà Nzambì. Amen. Mbitàmbe bwímpe kulekela cintu aci, ànu mwaba awu mpindyewu. Mbímpe.

238 Mwoyi wà Nzambì ùdi kàbìdi díbà adi munda mwèbè, mwàkamba Yesù. Indilaayi kakesè. Yesù wàkamba ne: “Mémè ndi Mwonji wa mvinyò. Nwènù nudi matàmba.”

239 Mpindyewu tàngilàayi. Dikokangana dyàbò dìvwa dyà cinyi ne Yesù? Dikokangana dyàbò ne Yesù, bwalu Yèyè ùvwa Muntu ùDìvwiya Nzambì. Yèyè ùvwa Nzambì. Nzambì ùvwa mu Kilistò. Nwamònu anyi? Ki Yèyè kubàmbila. Wàmba ne: “Kàdi kanùntàngidi Mémè to. Kí Mémè to. N’Taatù Wanyi, ne Yèyè mmusòmbèle munda Mwànyì.” Kaa! Nwamònu anyi?

240 Mpindyewu, bàvwa bàtàngila mubidi mukesè wùvwa mulediibwe kùdi Màriyà awu. Nwamònu anyi? Awu kàvwa Nzambì to. Ùvwa m’Mwànà wa Nzambì, kàdi Nzambì ùvwa mu Mubidi awu. Ùvwa n’Nzambì. Yèyè ne: “Mémè nciyi ngenza byenzedi byà Taatù Wanyi to, díbà adi nùMpiishe. Kàdi nganyì wa kunùdi udi mwà kuMpiisha bwà mpèkaatù, bupidyà bwà Díyi? N’Díyi kaayi dìdi Nzambì mwakùle dìdi kadiyi dyuwile mu Mémè?” Mpèkaatù mbupidyà. “Nganyì wa kunùdi aku udi mwà kumpiisha Mémè bwà mpèkaatù?” Mpèkaatù mbupidyà. “Ndejaayi tǔng. Pangikala Nciyi ngenza byenzedi byà Taatù Wanyi to, díba adi kaNungiitabùùji to. Kàdi Mémè ngenza byenzedi byà Wanyi. . . Nànsha wèwè kùyì mwà kuNgiitabuuja to, itàbùùjà byenzedi bìndi Mémè ngenza, bwalu byòbì bìdi bifila bujaadiki.” Mu mùshindù mukwàbò ne: “Taatù udi munda Mwànyì, mwikàle ùDifidila bujaadiki bwà Yèyè mwine.” Bwalu: “Nzambì ùvwa munda mwà Kilistò, ùpungisha bàà pa buloba ne Yèyè mwine.” Nwacyùmvù anyi? [Disangisha dìdi dyàmba ne: “Amen.”—Muf.]

241 Èè, mpindyewu, Mwoyi ùmwèùmwè ùdì mu mwonji wà Mvinyò awu ùdì kàbìdì mu ditàmbà. Munyì muwàya kashààla wa mu Wòwò awu? Kabyèna mwà kwenzeka to.

242 Mvwa mumòne mucì ànu àbìdì adi panshì aa, mu lupangu lwà micì lwà Mwanèètù Sharrit mu Arizona, ùvwà mukwàme bimuma bishìilàngàne byà madimà ku matàmbà àwù. Cìvwa ncinyì aci? Ùvwa—ùvwa mucì wà madimà a orange, orange wa navel. Kàdi kùvwa madimà à—kùvwa ma—madimà à mpùsù, tumàndàleena, orange wa mutwile, ne cimuma cyà mbòmà. Kùvwà byà mishindù yònsò. Mémè kwimana, kutàngila mucì awu. Ki mémè kwamba ne: “Mwanèètù Sharrit, udi uswa kungambila ne mucì awu mmucì wa oranges anyi?”

Yèyè ne: “Bushùwà’s.”

243 Ki mémè kwamba ne: “Èè, mbìshi’s? Mbyenzeke bìshi nànkù?” Mémè ne: “Ndi mmòna cimuma cyà mbòmà *mwab’ewu*, ne tumàndèleena *mwab’ewu*, orange wa mutwile *mwab’ewu*, ne didimà dyà mpùsù *mwab’ewu*, ne bimuma bikwàbò byònsò ebi. Mbilwè bìshi?”

Yèyè ne: “Èè, udi umòna’s, mbisomekamù.”

244 “Kaa!” Mémè kwamba ne: “Èè, ndi muswe nkukonkèku cintu kampànda. Mpindyewu, wèwè mutùlekù cimuma cyà mbòmà eci ne madimà à mpùsù. Mpindyewu, cidimu cyàlondà, necikalè cinyì? Newikalè díbà adi ne didimà dyà orange dikwàmekù’s.”

“Kaa, to.” Yèyè ne: “Nedìpatulè didimà dyà mpùsù. Nwamònu anyi?”

“Kaa,” mûngàakambà, “twasàkidila.” Nwamònu anyi?

Kwèna mwà kwenza nànkù to. Kwèna mwà kushààla wa mwômò amu to.

245 “Kàdi,” wàkamba ne: “cikondo cyònsò cìikalà mucì awu wutenteka cidimu ne wèla ditàmbà dipyadipyà, ditàmbà adi didi dikwama madimà à orange, pìikalà mucì wà mvinyò awu ùpàtula ditàmbà dyàwù wowò mwinè.”

246 Kàdi citùdì bateete kwenza nkukashààla bidimba munda Mwèndè, kàdi biikàle twenda mwinshì mwà dìnà dyà Bwena Kilistò. Bwalu, tudi, ànu mùdì mu ngaakwilù wa bantu bònsò twètù tudi mucì wà madimà, Èkèleeziyà wa Kilistò.

247 Kàdi dibà didì Mucì wà mvinyò Mwinè awu wèla ditàmbà, nedìikale ànu bu Mucì wà dyàmbedi wàkapàtulaDi awu. Pìikalà Mucì wà dyàmbedi wàkapàtulaDi, bàakafùnda Mukàndà wà Byenzedi paanyimà pàDì; Wòwò ànu mudidìdinge mwele dikwàbò, neDifùndè mukàndà wà byenzedi paanyimà pààDi. Mmwómò.

248 Pa nànkù, nudi nukashààla ànu bàà mu maswa awu. Kàdi paùdì mulediibwe ku Mucì awu. . . Udi ne cimuma. Ncyà

bushùwà. Udi ne cimuma, kàdi cyùdi wenza naaci ncinyi? “Udi ne cimwènekeli cyà difwànà dyà Nzambi, kàdi uvila bukole bwàdi.” Udi uvila bimanyinu. Udi uvila maalu à kukèma. Udi uvila Nyumà Mwimpè. Udi uvila dyakula dyà mu myakulu. Udi uvila bikhèenà-kumòna. Udi uvila bipròfetà. Udi uvila dyondopa. Kàdi, nànsha nànkù: “Kudinyika wèwè mwine dìnà.” Ki bwà cinyi kabyèna bikèmesha pàākamba Nyumà Mwimpe ne: “Bukolè, bwà misumbà yà bantu, bùle tètè ne mènà mapendi à Nzambi, bushùwà, bàdibiikila ne: ‘Beena Kilistò.’” “Ne cimwènekeli cyà difwànà dyà Nzambi, kàdi biikale bavila bukole bwàdi. Bà nànkù àbu tàpùlukà naabò, bwalu mbàà mùshindù awu bàdi balombola bakàji bakùtākane bàdi bùle tètè ne nkukà yà mishindù yònsò.”

249 Malongolodi à mishindù yònsò! Èkèleeziyà mmupàte tètè ne bàabùngi menemene, ne musumbà wà mùshindù *ewu*, ne musumbà wà mùshindù *awu*. Kàdi bishi bwà musumbà wà bantu bàà Yesù Kilistò? Nwamònu anyi? Tudi ne bintu bikwàbò byònsò ebi, ne tudi babàmbidikile èkèleeziyà ne bujitu panshi. Mpindyewu ki bwalu mbwòbù abu’s.

Kwèna mwà kushààla wa mu Èkèleeziyà nànsha.

250 Udi ukashààla wa mu diswa kampànda. Udi cidimba cyà mu diswa kampànda, cyà mu musumbà wa bantu kampànda, ànu mùtù diswa amu. “Tudi twitabuuja *eci*. Tudi ne ètù malondyanganyi. Tudi ne yètù minsokòntù, ne bikwàbò.” Nudi nwenza pèènù mùshindù wà mwomùmwe awu, cidiku ncyà ne nwènù nudi nukashààla bàà mu èkèleeziyà udi ùdibiikila ne ng’èkèleeziyà.

251 Kàdi kwèna mwà kashààla wa mu Èkèleeziyà to. Nwènù nwakashààla bidimba byà mu diswa, kàdi kì ng’Èkèleeziyà to, bwalu nudi nulediibwa mu Èkèleeziyà awu ne Mvinyò Mwinè.

252 Mpindyewu anji indilaayi kakesè. Tàngilàayi. Nènjikijè, paanyimà pàà katanci. Mònaayi. Mfwilaayikù luse. Ncivwa—ncivwa ne meeji à kwamba aci to. Tàngilàayi. Tàngilàayi.

253 Pìikalà Nzambi mulamakaje Mukàji-musèla ewu pàmwe ne mwinè Nyumà awu, dībà adi’s Udi ùlamakaja pàmwe muntu nkàayà ne mwinè Nyumà awu, nwamònu’s, dībà adi udi mulediibwe mu Bukalenge abu. Ne pashiishe Mwoyi mwinè wùvwà mu Èkèleeziyà *ewu* awu, ùdi mu Èkèleeziyà *awu*, ne *Yèyè awu*, *Yèyè awu*, *Yèyè awu*, *Yèyè awu*. Ne Mwoyi mene ùvwa mu cizubu, Mwonji, Yesù, udi mu cidimba cidìYe mupàtùle. Butumbi’s wè! “Ne bintu bimwèbimwè bìndi ngenza abi, byenzedi bìndi Mèmè ngenza ebi, nenùbyènzè pèènù.” Ki cidimba cilelèlè cyà Mubidi wà Kilistò ncyòci, kakùyi dìnà ni ndyà mùshindù kaayi diCilamika pambidi nànsha. Byenzedi menemene byà muntu nkàayà awu bìdi bijaadika kùdiyì ùfùmina. Nsòmbelu wendè ùdi ujaadika cidìye.

254 “Wèwè udi cidimba kaayi? Mmu mubidi kaayi muwùdi?” Mubidi wa Kilistò. “Èè, nkwepi kùdi mukashàale wa Mwômò?” Bwàlà. Mémè ndi mulediibweMù. Nwamònu anyi? Ndi mulediibweMù.

255 Kabyèna bikèngela bwà wèwè kubambila to. Mbamanyè cidi cyenzèke. “Wèwè, mmunyi mùdi mwà kuteemesha kàndeyi kàdi kukàbwikidija mèèsà?” MwàkambàYe. Nwamònu anyi? To, to.

256 Paùdi ulediibwa mu Bukalenge bwà Nzambì abu, díbà adi Mwoyi, Mwoyi mwinè wùvwà munda mwà Yesù awu. Díbà adi udi ucyùka bwalu bwà misùukà. Díbà adi kwèna ne cyà kutèndèkeena bantu, bwà kulwabò ku cyoshelu nànsha. Kabyèna bikèngela bwà wèwè kusèngeleela muntu kampànda to, bwà kulwa keukeba pàmwè ne bàdi ku cyoshelu nànsha. Èyowà. Bi—bi—bi—bintu bìdi bìditucila nkòkà ànu nkàyaabi, bwalu mBitwibwe citampì mu wèwè. Wèwè udi cintu cijimà cyà Nzambì. Udi mutwibwe citampì kùdi Nyumà Mwímpè.

Mpindyewu nudi bamanyè cidi “Nyumà Mwímpè” ùmvwija anyi?

257 Ki mbwena kwamba ne: “Mvwa mutùpika e kwela mbilà to. Mvwa ne njiyà yà pabwàyì.” Abi byònsò mbímpè. Mvwa mutùpika ne mwele mbilà, ne mùmvwe njiyà yà pabwàyì. “Ndi mwakùle mu myakulu.” Ndi ngiitabuuja ne Nyumà Mwímpè ùtu wàkula mu myakulu. Bushùwà’s. “Nkààdi muumvwije.” Èyowà’s, mukalenge. Ndi pàanyi, ngiitabuuja nànu. Kàdi kî ng’Acì to. Kî ng’acì cìndi ngàmba to. Kùdi mwà kwikala ditùbu lwà mwaba kampànda. Kùdi mwà kwikala ditùbu *mwaba ewu*, mu lutùlù lwènù.

258 Muntu kampànda àdìdingè àkubàngulè dipi ku luseke, mu mpàla, nèufile lukwàbò anyi? Kàdi wèwè udi wamba ne: “Cyena lubombo cyà manyanu cyàcya!” Díbà adi kùdi ditùbu kampànda, mwaba kampànda, disòsò ditùbùke. Mbímpè tucilekèlè. Èyo. Kàdi’s nudi bamanyè cìndi njinga kwamba aci.

259 Kàdi paùdi mutwibwe citampì mu Mubidi wa Kilistò, díbà adi udi mùle tètè ne Nyumà, ne udi mwànà wa Nzambì.

260 Kaa, mvwa njinga ngiikalapù nànsha ne tusuna tutwè ku tùtaanu’s, bwà kubala cintu kampànda kaaba aka. [Disangisha didi dyamba ne: “Tungunukà. Cìbalààku, mwanèètù.”—Muf.] Kàdi nudiku bwà kuntwàla bwà tusuna tukwàbò dikumi anyi? [“Èyowà.”] Ndi muswe kubala cintu kampànda, ànu katùpà kakesè cyanàànà. Mpindyewu, ne meeji wònsò matòòke, nkùnda kayakulungula to. Ndi muswè ànu kunùshindikila, nwamònu’s, bu twètù ànu mwà kubala cyòci eci bwà katanci kakesè cyanàànà. Ncímpè kaciyi cyà kupicisha to. Ndi ne tuntu ànu tubìdi cyanàànà mwab’ewu, tùdi tùfuma ku dimvwila mu meeji, tùndi njinga kwamba.

261 Tùbuululàayi mu Yone Munsantu, nshapità mwi3, wàkula bwà Mwoyi wà Cyendèlèlè. Twànjàayi kujandula cidiCi

cyàmba apa bwà nshinga wa Mwoyi wà Cyendèlèlè ewu, Mwoyi wa Nzambi. Mpindyewu, mpindyewu tàngilàayi apa.

Kuwwa muntu wa mu Bàfaalèsà, dìnà dyèndè Nikòdemè, mulombodi wa beena Yudà:

Yéyè awu wàkalwa bwà bwalu abu kùdì Yesù ciibufùkù, e kumwambilaye ne: Laabi, tudi bamanyè ne wèwè udi mulongeshi mufùmìne kùdì Nzambi: . . . muntu nànsha umwe kèna mwà kwenza bishimà ebi . . . Nzambi kàyì nendè to.

²⁶² Mpindyewu, bôbò, tubàdì twà beena Yudà abu, bàakajingulula ne Yéyè ùwà Mwànà wa Nzambi. Bàvwa bacimanyè. Ki mukòòkeshi wabò nyéyè ewu mwaba ewu, uMwambila ne: “Tudi bamanyè ne Wèwè udi Mulongeshi mufùmìne kùdì Nzambi, bwalu Mwoyi mene wà Nzambi ùdì ùtuuta nkòkà mu Wèwè.” Nwamònu anyi? “Tudi bamanyè ne dilongesha Dyèbè kì ndyà mu Wèwè Nkààyebe to. Ndyà kwà Nzambi, bwalu Nzambi ùdì ùdishindika.” Nwamònu anyi? “Mwoyi wà Nzambi wùdì wùtuucila nkòkà munda Mwèbè.” Mpindyewu tàngilàayi.

Yesù wàkandamuna e kumwambila ne: Bulelèlà, . . . Ndi nkwàmbila ne: Muntu yéyè kàyì mulediibwe cyàkàbìdì, kèna mwà kumòna bukalenge bwà Nzambi to.

²⁶³ Kaa, ekèlekèlè! “Ànu wèwè mukashàale wa mu èkèleeziyà wanyì anyi?” Kaa! Tàngilàayi numòne mùdìbo buumuka ku Cyôci? Nwamònu anyi? Nwamònu anyi?

Yesù, dìbà adi Yesù wàkandamuna ne: Bulelèlà, bulelèlà, Ndi nnwàmbila ne: Muntu yéyè kàyì mulediibwe ku màyi ne . . . Nyumà, kèna mwà kubwela mu bukalenge bwà Nzambi to.

Eci cìdì cilediibwe kùdì . . . mubidi mmubidi; ne cìdì cilediibwe kùdì . . . Nyumà n’nyumà.

Kùkèmi nànsha bwà pangààkwambìdì ne: Udi ne cyà kulediibwa cyàkàbìdì.

Lupeepèlè ludi lutuuta kùdìlu luswè, . . . Nwamònu’s, lwàlukila cyàkàbìdì, nwamònu’s, lwàlukila, nwamònu’s.

Lupeepèlè ludi lùtuuta kùdìlu luswè, . . . kwèna mwà kuumvwa mutooyi . . . udi mwà kuumvwa mutooyi wàlu, kàdì kwèna mwà kwamba kùdìlu lufùma, anyi kùdìlu luya to: nànkù ke mùdì ewu yònsò . . . udi mulediibwe kùdì Nyumà.

Nikòdemè wàkandamuna e kumwambila ne: Mmunyi mùdì maalu aa mwà kwikala’s?

Yesù wàkandamuna e kumwambila ne: Wèwè udi mulongeshi wa Izàlèlèlà, kadi kùyì mumanyè bintu ebi?

264 Tàngilà kwàka, mwanèètù, muntu wa mapòlomè à—D.D., Ph.D., ne yibidì yà L.D., nwamònu’s, “Kàdi kùyi mumanyè ebi bintu to?”

Bulelèlà, . . . Ndi nnwàmbila ne, Tudi twakula bitùdi bamanyè, ne tujaadika bitùdi bamòne; kàdi nwènù kanwèna nwakidila bujaadiki bwètù nànsha.

265 “Tudi bamanyè bintu ebi. Tudi babimòne. Tudi bacimanyè, kàdi kanwèna nànsha nwakidila bujaadiki bwètù nànsha.” Mukashàadi wa mu Èkèleeziyà’s wè! Nwamònu anyi?

Piikalabi ne ndi mukwambile maalu à pa buloba, kàdi wèwè kùyi witabuuja to, mmunyi muwitabuuja, mèmè mukwambile. . . maalu à mu dyulu?

266 Mpindyewu tèèlejàayi eci mwaba ewu. Tàngilàayi.

Ne kakwèna muntu wàkabànda mu dyulu, kàdi ànu ewu wàkatuuluka ùfùmina mu dyulu, nyèyè Mwànà wa muntu mene udi mu dyulu.

267 Dìfwànyìkijilaayi aci tǔng.

268 Nudi bamanyè’s, musangu kampànda, Yèyè wàkamba ne: “Nudi nwela meeji kaayi bwà Kilistò? Yèyè m’Mwànà wa Nganyi?”

Kwambabò ne: “Mwànà wa Davidi.”

269 Yèyè ne: “Kàdi bwà cinyi Davidi, mu Nyumà, ùdi ùMwambila ne: ‘Mukalenge wàkambila Mukalenge wanyi ne: “Sòmba Wèwè ku Dyànyì dyàbalùme”?’ Munyi mùvwàYe mwà kwikala Mukalenge Wendè ne Mwanèndè?” Muntu nànsha umwe kàkaMukonka bǔngà bwalu to.

270 Mu Bwàkabuulwibwà, Yèyè wàkamba ne: “Mèmè ndi Muji ne Mùtòlokù wa Davidi.” Nwamònu anyi? “Mèmè ndi Mwonji wa mvinyò ne Ditàmbà. Mèmè ndi cibangidilu. Mvwakù kumpàla kwa cibangidilu. Mvwa cibangidilu, ne—ne Mvwa Mùtòlokò Wendè, kàbidì.”

271 Mpindyewu, ki Yèyè awu ne: “Muntu nànsha umwe kàtukù mwanji kupweka ùfùmina mu Dyulu to, ànu Mwànà wa muntu udi mpindyewu mu Dyulu.”

272 Inàbànzà kampànda wàkangela, lukonko, musangu kampànda. Mèmè kwamba ne: “Lǔngandamwìneku.”

Wàmba ne: “Nganyi uvwa Yesù ùlòmba mu budimi bwà Gethsemane?”

273 Mèmè kwamba ne: “ÙvwàYe wàmba awu Nganyi pààkambàYe ne: ‘Muntu nànsha umwe kàtu mwanji kubànda mu Dyulu, pa kuumusha ewu wakatùluka mu Dyulu, nyèyè Mwànà wa muntu mene udi mu. . . udi mpindyewu mu Dyulu awu?’ Nganyi?”

274 S’ki Yèyè ewu, mwimane ànu kaaba aka ku mùsongà wà nzùbu, wàkula ne Nikòdemè, wàmba ne: “Mèmè ndi mu Dyulu.”

Ncyà bushùwà anyi? Tùshiyàayi aci too ne dilòlò edi. Udi wamba cinyi? [Disangisha didi dyàmba ne: “Amen.”—Muf.] Dìbà dikaadi dimane kupita. Kaa, ekèlekèle! Ndi ngànji kunùshiya nwelangana meeji pa cyôci eci ndambù, mu mapingaja emu.

²⁷⁵ Mmunyi mùdì ubwela mu Èkèleeziyà? [Disangisha didi dyàmba ne: “Ndi mulediibwemù.”—Muf.] Mulediibwemù. Ku Cinyi? Mupùuyà wà Nzambi.

Ngeelè mupùuyà, ngeelè mupùuyà;
Nyumà wa Nzambi udi ne mwoyi, ngeelè
mupùuyà.

²⁷⁶ Ki disambila dyànyì: lekela ànu Nyumà Mwímpe elè mupùuyà. Kaa, ekèlekèle! Bwalu, Mupùuyà wà Nzambi, Udi cinyi? Mutwibwe citampì mu Bukalenge bwà Nzambi, mumanyè ne, pangàakatonda dyàmbedi, ngàkiitabuuja Yesù Kilistò. Eyowà.

Pashiishe, ku Diitabuuja dyànyì, ndi nkusàkidila bukolè, bukolè bwà difwànà dyà Nzambi.

Pashiishe ku bukolè bwànyì, ndi nkusàkidila dimanya dyà Dìyì.

²⁷⁷ Ku dimanya dyànyì, ndi nsakidilakù lutùùlù, didikontonona. Ndi muswè aci be. “Ditùngà dyànyì s’ngwèwè ùndi nzànjika ewu, nsàku musùùkà wànyì cifulu cyà butùmbi cyà didikontonona, kuumukila ku mbù ne ku mbù udi wela nsesà.” Nwamònu anyi?

²⁷⁸ Lutùùlù. Kaa, ekèlekèle! Bateeciibwè. Kanùditacishi to; Sàtaanà neànubadilèwu. Mémè ndi mbànda cibàndilu mpindyewu. Nwamònu anyi? Ndi musàkidile bukolè, dimanya, didikanda, mpindyewu bikèngela nsàkidilè lutùùlù. Ncyèna ànu mwanji kupeta Nyumà Mwímpè to.

²⁷⁹ Pashiishe paanyimà pàà mémè mumane kusakidila lutùùlù, ndi nsàkidila difwànà dyà Nzambi. Nudi bamanyè ne ncinyi ciine aci anyi? Kwikala bu Nzambi. Ndi nsàkidila cyôci aci. Nciyi nditwàla bibi to. Ndi ngèza màalu mùdì mwena Kilistò mujaalame ne cyà kwenza. Kaciikadi cintu citelakaja to. Cintu kampànda munda mwànyì, dinanga dyà Nzambi, disàba ànu kusàba. Nwamònu anyi? Nwamònu anyi? Kwàmbi ne: “Uh-uh-uh-uh, mulùmyànà, mvwa mwà kucyènza, kàdi pàmwàpa mbitàmbe bwímpe ncicyenji to.” Nwamònu anyi? Huh-uh. Huh-uh. Cintu ncikwata mwaba, nànsha bishi.

²⁸⁰ Ndilediibwa. Ndi mulediibwe mu eci, mu eci, mu eci, mu eci, mu eci, mu eci, mu eci. Ne pashiishe dinanga dyà Nzambi, Kilistò, ùdì ùpweka ne ùtwa byònsò bìdì munda mwànyì abi citampì, bwà mudimu. Nwamònu anyi?

²⁸¹ Dìbà adi cidiYe wènza ncinyi pàdiYe ùmpèèsha Nyumà Mwímpè apu? Udi ùkutèka pambèlu mu mwaba mutàpùlùke wèbè wà sungasunga, ùkutwà cimanyinu. Nwamònu anyi? Udi muntu mushiilàngane dìbà adi. Kwèna wa pa buloba, kàbidi

nànsha. Nwamònu anyi? Udi mulwàcishiībwe bishiilàngàne. Udi mulwàte bishiilàngàne. Kí mmùzàbì wa pa mubidi ewu to. To, to. Kwèna ne cyà kwikala mushiilàngàne ne wa pabwèndè, ne nkoolò munyungùlùkè, ne mushingà mulemùle, byà nàнку awu to. To, to. Kwèna wenza aci to. Udi ulwàta, mu mubidi emu, mùshindù ewu. Cyà mushinga mmùzàbì wà nyumà. Civwàlù cyà dibanji ncimana kukuvwàdika. Wèwè udi cinyi?

²⁸² Ànu bu Yesù, tàngilààyi, ùvwa mubwikila kùdi mundidimbi, ne mpàla Wendè wàkakùdimuka kumpàla kwàbò, ne civwàlù Cyèndè cyèla nsèsa bu dîbà. Kí Yèyè awu, Yesù, Nzambi ùtèeka Mwan'Èndè Sungasunga. Nwamònu anyi? Kí pashiishe kulwàkù Mòsà. Pashiishe kulwàkù Eliyà. Kí Peetèlò kwambayè ne: “Nudi bamanyè's, nci—ncintu cìmpè's cyà kwikala kaaba aka.” Nwamònu's mùdi muntu ùkafika? Èyowà. Kaa, citàmba mfùkilu cyenzeka! Kwambayè ne: “Twibakààyi ntentà yisàtù. Twibakè umwe bwà Mòsà, ne umwe bwà Eliyà, ne umwe bwèbè Wèwè.”

²⁸³ Kàdi kàyi ànu mwanji kujikija kwakula, Nzambi e kukànga cintu cyònsò aci, wàmba ne: “Ewu m'Mwan'Àanyi munanga. Mu bintu byònsò ebi bingààkalomba Mòsà, ne mupàtwile mikenji kùdi Mòsà; bwakàne ku baprófetà; Wàkabikùmbaja byònsò. Mutèelejaayi. Ndi ngèela cidya mpindyewu mpàtuke mu cimfwànyì. Mutèelejaayi ànu Yèyè cyanààna. Mutèelejaayi ànu Yèyè cyanààna.” Kaa, ekèlekèle! Cintu cilenga kaayipu's wè!

²⁸⁴ Nèнку, patùdi tukùmbàja mishingà eyi, ne tushààla bùle tètè ne makolè à Nzambi aa ne bintu byà Nzambi ebi, dîbà adi Nyumà Mwîmpè ùdi ùtùluka ne ùtùtwa cìtampì mu Bukalenge. Kanùditàci nànsha. Muntu yònsò nèamanyè ne udi Nèndè. Kabyàkukèngela bwà wèwè kwamba dîyi pa bwalu abu to. Bantu bònsò nebàmanyè ne udi Nèndè. Kùtácishikù meeji to. Èyowà. NeàDìfidilè bujaadiki bwà Yèyè mwinè. Yèyè neénze bwà kumanyikaci munkaci mwà bantu.

²⁸⁵ Nzambi ànùbènèshè. Ndi ne disànkà dyàbùngì dyà kwikala neenù kaaba aka mu dindà emu, kupìcila mu cikondo cyà bwobùmwè eci. Tèelejaàyi, kaèkèleeziyà kèètù kakesè aka nkancii, byòbì biinè katwèna ne mwaba bwà bantu bàdi bàlwa mwaba ewu to. Twètù katwèna bulongolodi to. Tudi twitabuujà ne tudi mu bwobùmwè ne bulongolodi bwònsò. Nudi nulwa mwab'ewu bwalu nudi baswè bwà kulwa. Nàнку nwènù, tudi banùngè. Ne tudi baswè bulongolodi bwònsò, muntu yònsò. . .

²⁸⁶ Ndi ngiitabuujà ne kùdi bantu mu malongolodi wònsò awu bàdi beena Kilstò. Mbànà bèètù bàà balùme ne bàà bakàjì mu Kilstò.

287 Pa nàunku, ki bwà cinyi, katwèna ne mângà meeji to, cintu nànsha cimwè cyà kudilamikakù, cintu nànsha cimwè cyà kwenza to ànu kwikala mwena Kilistò. Bu mùvwà E. Howard Cadle ne ciibidilu cyà kwamba ne: “Twètù katwèna ne mukenji to ànu dinanga, katwèna ne mukàndà to ànu Bible, katwèna ne twitabàayi to ànu Kilistò.” Mmwômò. Nwâlwayikù kutwèndela. Tudi ne disànka bwà bwalu abu. Tudi twitabuuja Èvànjeeliyò mu Kaabujimà, kantu ne kantu kònsò kàà Díyi. Tudi twitabuuja ànu menemene mùshindù awu. Katwèna tusàkidilaKù cintu nànsha cimwè to, katwèna tuumushilaKù cintu, katwèna tusàkidilaKù cintàkanyì nànsha cimwè cyà bulongolodi to. Tudi tuDilekela ànu mùdìDi amu. Ki mùdìbi. Kàdi tudi ne disànka dyà kunwàkidila. Lwâyì nwikale neetù, dîbà dinùdi baswè. Twètù tudi tusambidila babèèdi. Twètù tudi twitabuuja cintu cyònsò cidì Bible wàmba bwà kwenza. Twètù tudi “tupwà mateketa ètù mwoyi, paanyimà, ne tudi bambùlùje batàngile ku cimanyinu cyà Dibiikidiibwa ditumbùke.”

288 Mpindyewu cikwàbò cintu kàbidì. Nenwànyishè bwà kwambibwaci anyi? Dyàbwàbwa mu dindà... Nenùtangilè ku—ku cibàsà pambèlu pàpa, cikèènà-kumòna. Mvwa mupeté cikèènà-kumòna. Tuvwa bu pa dîbà itaanù jaajaaja, bu mùdì mukajàanyì udi paanyimà pàpa mumanyè, anyì pa dîbà isambòmbò. Mvwa mutàbàle. Twètù e kubùika bwà kulongolola bânà bwà kuyabò mu kàlaasà.

289 Ndi ànu mpeta byòbì ebi, ku musangu ne ku musangu. Ne nwènù bònsò nudi bamanyè's, yònsò wa kunùdi kaaba aka, bwà ne kabitukù bìpangila nànsha. Byòbì, kakuyi mpatà to mbipwàngàne. Nwamònu anyi? Kacya kabitukù bìpangila nànsha.

290 Ki mèmè kwela meeji ne mvwa muntu wa disànka dyàbùngì menemene unkàdikù mumòne. Mvwa mwimàne mu dîbà, d-î-b-à, ne mvwa—ne mvwa munkaci mwà kuyiisha Èvànjeeliyò kùdi disangisha dinène, dyalàbàle.

291 [Mwanèètù Branham ùdi wikisha—Muf.] Mvwa muswè ànu bwà kumòna ni civwa munkaci mwà kukwàciibwa pa mikàbà.

292 Di—disangisha dinène, dyalàbàle, kàdi bàvwà basòmbele mu diitu kampànda. Ne nsèsà yà dîbà yìvwà yìbàtwa, ànu *eku* ne *kwàka*, bòbò munkaci mwà kuDìpeta, bàpeta Díyi.

293 Nènku ndi, bu pa ciibidilu, misangu yàbùngì ntàmba kuleepesha, too ne ku shòò, nyiisha ntàntà mule be. Ki mèmè kuyiisha ntàntà mule, mu mùshindù wa ne disangisha kulwadi ne nzala bwà cyàkudyà cyà mubidi. Nènku bòbò, bàmwè bàà kùdìbo, kucyòkabò. Pa nàunku bòbò kwimanyina kuulu, e kupàtukabò pambèlu bwà kapeta ndambù wa cyàkudyà, kubangabò kupàtuka pambèlu.

Mèmè ne: “Kanùpàtukikù to. Kanùpàtukikù to.”

294 Mvwa ne tutòngòbèlà túbìdì kúmvwá muswè kafika, kúmvwá muswè kafika, mu diyíisha dyànyì. Ne Mukalenge ngùvwá muyimpeesha. Nènkú muyiishi kanà yònsò ewu mmumanyè, paùdì mumanyè bulelèlà ne n'Nzambì udi mukupèeshaci, udi ulàkuka ànu mudilu bwà kucyàmbila bantu.

295 Nènkú mvwa ànu munkaci mwà kuyiisha, Charlie, ne mwànyì mwònsò mùmvwà naamù, ngènda ànu mbyàdija, nudi bamanyè's, ngàmba ne: "Bintu binène byònsò ebi, *ebi* bìdì Nzambì munkaci mwà kwenza ebi. Tàngilàayi *eci*. Yèyè ùdì ùjingulula meeji à mu mwoyi. Ncinyì Aci? Dìyi." Ngènda nya ànu mùshindù awu. Kàdi, kaa, mvwa njinga ne mvwa mwà kuvùlukakù cìmvwà ngàmba ne civwà cyena bwalu cyànyì. Ncyèna mwà kucivùluka to. Nwamònu anyi? Kàdi mvwa ànu munkaci mwà kuyiisha ne mwànyì mwònsò.

296 Nènkú mvwa ndìbandila mèmè mwine munkaci mwà kucyenza. Nènkú pàmvwà mwimane mwaba awu, mwikale ntàngila, ki mèmè kushaala ndìbandila mèmè mwine munkaci mwà kuyiisha Cyôci aci.

297 Nènkú mvwa ànu nyiisha, bwà ewu yònsò uvwa muswè kuntèeleja awu. Nènkú paanyimà pàà katanci, mèmè kujuuka, nudi bamanyè's, ki mèmè kudyambidila ne: "Butumbi kùdì Nzambi's wè!" Mèmè ne: "Tàngilàayi bintu lenga ebi, ne *cikampànda, cikansanga!*"

298 Dyàkàmwè, mèmè e kumònà bantu bàbanga kuleeja bu ne mbuumvwá nzala yà cyàkudyà cyà mubidi. Ne pa nànkú bàvwa búmvwe cyàkudyà cyà nyumà cibàkumbàna, pa nànkú e kubangabò kupátuka. Nènkú bàmwè bàà kùdìbo [Mwanèètù Branham ùdì wèla mwàwù—Muf.] e kubangabò kuya.

Mèmè kudyambidila ne: "Mbwalu kaayi ebu ne bantu bònsò?"

299 Ki—ki mèmè kutàngila, ki babàka batekète aba bènda bèndela, ku luseke lwànyì. Ki mèmè kudyambidila. . . Mèmè kwamba ne: "Indilaayi kakesè, balundà bàànyì! Indilaayi kakesè! Nenwàlukile kàbìdì pìikalà dìbà dibwèlè." Nwamònu anyi? Mèmè kwamba ne: "Nenwàlukile kàbìdì. Kàdi lekelaayi nupèeshè katòngòbèlà kàà kumpàla aka. Bintu byònsò bingaanùlèjì ebi, bìdì bìfùmina penyì? Mbyà penyì?" Ki mèmè ne: "S'ke byòbì ebi. Bìdì mu Dìyi dyà Nzambì. Bìdì EMU MMÙDÌ MUKALENGÈ WÀMBA, mulayi Wèndè. Bwalu," Mèmè kwamba ne: "bònsò bwènù mfidilaayi bujaadiki, filaayi bujaadiki ebu, ne wànyì mudimu ùdìbo bantùma naawù ngwà: 'Kushààla ne Dìyi.'" Mèmè kwamba ne: "Mbwalu kaayi ebu neenù bònsò? Kanwèna mwà kuumvwá Dìyi anyi? Nudi ne cyà kuDyùmvwá."

300 Ki bàmwè bà kùdìbo kwambabò ne: “Mwabilaayi, mvwa njinga kupetakù ndambù wa mampà,” ne bikwàbò byà mùshindù awu.

301 Èè, ki mèmè kwela meeji ne: “Èè, butùmbi kùdì Nzambì! Pìikalàbò bàjinga mampà, bàlekele bàye kaàngate.”

302 Pa nàнку mèmè—mèmè kukudimuka. Mèmè kudyàmbidila ne: “Kaa, kàdi, udi mumanye mudi bwalu anyi? Mìndidìmbi neyìpone, paanyimà pàà katanci, dyàkàmwè.” Mèmè kwamba ne: “Pashiishe, dilòòlò edi, pààdisangisha disangisha dyàdya kàbìdì, nembàfikishe mu katòngòbèlà, ne kubàmbila ne bintu bìvwàbo bammòne mèmè ngèza abi bìdì bisanganyiibwa mu Dìyì dyà Nzambì, kabiyì mu mukànda wà byenjenji bifwikàkaja anyì bulogolodi kampànda nànsha. Bìdì bisanganyiibwa mu Dìyì. Nwamònu anyi? Kantu ne kantu kònsò kàà cyòcì aci, mu Dìyì, bwalu mèmè ndi mutùmbiibwe ne mudimu wà Cyòcì aci.”

303 Ki mèmè kudyàmbidila ne: “Nudi bamanyè’s, bòbò, muntu ne muntu, nebààlùkilè dilòòlò edi, pa nàнку mònaayi cingèzà. Nempinganwine, ngèza bu udi upinganwina.” Nudi bamanyè mùshindù ùmvwà mucyènze pa bikondo byà èkèleeziyà ebi ne bikwàbò, ngàmba cìmvwà mwàmbe kumpàla. “Nempinganwinepù, pa Dìyì, ne pashiishe katòngòbèlà kanène, kàà dikèma aka.” Mèmè ne: “Ndìbà kaayi dìikalàcì’s we! Butùmbi bwikale kùdì Nzambì’s wè!” Ki mèmè kudimòna ngènda nshààla mukesè menemene, mèmè e kuumvwa ne: “Butùmbi bwikalè kùdì Nzambì.” Ki mèmè kudimòna ngènda njimina mùshindù awu. Kàdi’s ki mèmè ewu, mwimàne mwaba awu.

304 Mpindyewu, ki dyumvwija dyàcì ndyòdì edi. Nwamònu anyi? Cintu cyà kumpàla cìndì mwènze, bintu bìvwà byenjìbwe, bìvwa bu myanu kùdì bantu, cibúngì cyà kùdìbo. Ncyèna ngàmba nàнку bwà Èvànjeeliyò mu Kaabujimà ne bansantu bàà Nzambì to, kàdi, ndi njinga kwamba ne, bwà ciibúngì cyà bantu. Kanwikadikù nutàngila kùdì bàà pa buloba, kosmos, bu Mukenji wà Nzambì to. Panùdì nuya ne nwamba ne . . .

305 Bu mwàkambà Boze ne: “Ntu misangu yònsò ànu. . .” Wàkamba ne: “Mvwa mupetè cilòòtà, kùkaadi bidimu, ne—ne Nzambì ùvwa mwà kuntuma ku Chicago ne kunyùkushaku Chicago bwà butùmbi bwà Nzambì.”

Mèmè ne: “Joseph, Ùkaadi mumanè kucyènza.”

“Mòna’s,” kwambayè ne: “kabàtu banyukushiibwa to kacya ku Moody.”

306 Mèmè kwamba ne: “Mwómò anyi? Ndi ngàakula bwà Èkèleeziyà. Abu’s nnyama yà dyasabò yidì pambèlu pàpa. Abu bàdì ànu lupwishi lwà buloba, musumbà ùdì wènda ùlalakana mu misèèsù awu, ba Yezèbèlà bàdì badilaabe bilaabu kwìsù ne bikwàbò abu.” Mèmè kwamba ne: “Abi mpambèlu pàpa. Maswa manène ne bikwàbò abi nebyùpukè

e kudishindabi mu misèèsù mwàmwa.” Mémè ne: “Yèyè ùdi wàkula bwà Èkèleeziyà. Èkèleeziyà udi mumòne dibuulula dyà Yesù Kilistò dimwènèshìibwe, ne bôbò kuDijingulula. Mbafwànyine kwikala kabàyi dikumi ne bàtaanu mu Chicago amu nànsha. Mbafwànyine kwikala kabàyi dikumi mu lukòngo lujimà elu nànsha, mu cimenga cijimà cyà Chicago, bàdi mwà kupàtukamù.”

307 Nukààvwakù bakwelèle meeji anyi? “Ànu mwàkadibi mu matùkù à Noà, ki mwikalàbi kàbìdi ku Dilwa dyà Mwànà wa muntu, mùvwa misùùkà mwandamukùlù misungìdìibwe.” Uh-huh. Mbúngì kaayi bwà kapàtukà mu Sodomà? Nudi bamòne cìndi njinga kwamba aci anyi? Ndi ngeela mpatà ne ndyanza dijimà. Nwamònu anyi?

308 Kàdi Èkèleeziyà Yèyè mwinè mmupetè dinyukushiibwa. Mbacijingùlùle. Bàvwa bamanyè Dìyi. Bàkamòna Dìyi pàvwàDi munkaci mwà kwangata mubidi, ne bààkaDìbàkula. Mpindyewu tàngilàayi cyòci aci bwà katanci, mpindyewu.

309 Nènkù Mukenji wà kumpàla ewu, pàvwàbo mwà kuCimòna, bantu bònsò bààkaCilamata, bàmba ne: “Kaa, butùmbi kùdi Nzambi’s wè! Kaa, bu ngamònapù *cikampànda*, *cikasanga*, ne *cikankènga*.” Ke bôbò e kuya, mùshindù ùmwèùmwe wàkabwelàbo awu. Nwamònu anyi?

310 Nènkù mpindyewu bàdi bèèla meeji ne: “Èè, ncyèna mumanyè to. Mpenyi paùdi mwà kadilamika’s? Mémè nciyi mufike ku *eci* to, necìikale mùshindù *ewu*. Ne nebàngipàte, lwà eku nùnkù, nènkù ncyà kwikala ne cintu *apa* to.” Bàna bèètù bàsòmba panshi bàmba ne: “Èè, cìndi mufwànyine kwenza nciyi bu mèmè. . .?” Nwamònu mwaba awu anyi? Kabeena bìlmana ntàntà bule bukumbàne bwà kujingulula ne n’Dìyi dyàkalayà Nzambi to, diikale dimwènèshìibwa. Nwamònu anyi? Nènkù kupàtukabò e kuya.

311 Kàdi, kanùtàcishi meeji to, mindidìmbi yikaadi pabwìpi, nwamònu’s, pàngààlukilà mu budimi bwà bwambi.

312 Nudi bavùlùke, dilòòlò kampànda, bwà Mukenji wàkampeshaye musangu awu pàmvwà ntèeka dibwe dyà mu ditumba apu anyi? Ànu menemene. Yèyè kwamba ne: “Enza mudimu. . .” Yèyè ne: “Pawàpàtuka mu cikèènà-kumòna eci, ùbale Timòtè Mwibìdi ku 4.” Nudi bamanyè’s, cidi cìsanganyìibwa ànu mu dibwe dyà mu ditumba amu, kùkaadi bidimu makùmi àsàtù ne bisàtù.

313 Yèyè kwamba ne: “Enza mudimu wa mutangadiki, enza cijaadiki mu kaabujima cyà mudimu wèbè wà bwambi. Bwalu cikondo necilwe cìikalàbo kabàyi bàtwàla Dilongesha dishimàte nànsha. kàdi bènda bàlonda nkùkà yàbò mene nebàdivudijile balongeshi, bìikale ne maci àbàsansakana; nebàtangile ku myanu. . . buumuka ku Bulelèlà batàngile ku myanu.” Piikalà aci

kaciyi ànu cyùle, ku díyi ne ku díyi to! [Katùpà kàà mukàbà wa mèyi munda mutupù—Muf.]

³¹⁴ Kàdi, vùlukààyi, díbà adi, dilòlò dishààle, pàmvwà nciyi nànsha mucibale cyònsò to. Bidimu makumi àsàtù ne byà mu njila bìndi muiiishe mu tabernacle ewu, kacya musangu nànsha ùmwè ncìtu mwanji kusambuka pa aci to, ne ncyèna mumanyè ne mbwà cinyi to.

³¹⁵ Ntu pa ciibidilu ndikonka, too ne mwàkenzàbi ne, dinga ditùkù, mèmè e kumòna kaaba kàkambulà Yesù Muvungu ne kutwàdija kubala, ne kubala cyàbìbìdì cyà cipròfetà, e kwimanayè, ne kwamba ne: mu Kapènumà mwàmwa, e kwambaYè ne: “Nènku leelù ewu, cipròfetà eci cyàkùmbànyi.” Bwà cinyi kàakabala cikwàbò cìvwà cishààle aci to? Cìdi cikùmbànyine Dilwa Dyèndè diibìdì. Nwamònu anyi?

³¹⁶ Nènku ki mèmè kubala aci, nciyi mumanyè to. Mèmè kwangata aci, kàdi's ki cyòci aci, ànu kumpàla kwànyi menemene, ku Southern Pines, mu Caroline wa ku Sud. Mu dindà amu, mwimane pambèlu apu, nyukilangana ne Joseph Boze, mweyèmène ku luseke lwà kàshinyi, Mèmè kucilenga. [Mwanèètù Branham ùdi ùtuuta cishòndò—Muf.] Pòlò wàkamba ne: “Ndi. . .Bantu bònsò mbambènge. Kakwèna muntu udi mutwè ku cyànyi to. Demasè wàkundekela; munange maalu à cikondo eci. Kàdi mèmè mpindyewu. . .” Tàngilàayi. “Nènku nsenda wa byamu mmungenzele bibi bikolè.”

³¹⁷ Tàngilàayi cìvwà Demasè mwà kwikala mwele meeji cyà ne: “Mòna's, mvwa mumòne Pòlò uyiisha Èvànjelìyò ne wòndopa babèèdì. Kàdi's ki yèyè mwinè ewu musòmbe, ùsaama, yèyè mwinè, mutwàle ngàngàbukà kampànda wènda wènda nendè, Lukà. Cikondo cyònsò cidiye ùya, ùdi ànu wàngata ngàngàbukà, muntu mwinè udi uyiisha byà kwà Nzambì awu. Mòna's, mvwa mumòne mutwè muntu kampànda bufofo. Wàmba ne: ‘Mukalenge àkutàndishe, ne newùshaale mpofo bwà cipòlò kampànda.’ Kàdi ùlekela nsenda wa byamu ùmwipata mu disangisha. Ngeela meeji ne ùvwa mujimije bukolè bwèndè bwà kutwàngana bufofo abu. Bakwètù wanyi, wàkajimija bukolè bwèndè bwà Dyòndopa dyà kwà Nzambì abu. Nzambì ùvwa mumwele nyimà.”

³¹⁸ Ncyèna ngeela meeji ne Demasè ùvwa mupàtùke mukabwele mu byà pa buloba nànsha, bwalu Demasè ùvwa wa mu. . . Nudi bamanyè bwalu bwèndè bulonda. Yèyè ùvwa wa mu dikù, dinèna dibanji. Kàbìdì ùvwa muswè kwenda ne bònsò bàà mu musùmbà awu.

³¹⁹ Kàdi, Pòlò, Pòlò mukèsè mukwàte ne byà luse awu. Cìvwa cinyi aci? Nzambì ùsòmbela ùlekela mudimu wà bwambi ùfika too ne mu cipidì aci, kàdi pashiishe e kuwàsayè cifulu cyà butumbi.

320 Wàkalekela Yesù ùfika mu cipidi aci. Tàngilààyiku. Pèndè ùvwa mwà kjuuula bafwè, Pèndè mwà kwenza cyònsò civwàYe muswè kwenza; kàdi ùlekelà mùsàlaayi wà cyena Loomò ùMujoomona mwedi ku cibàngà, ne ùMutwila matè mu mèsù. [Mwanèètù Branham ùdi wìdikija mwadi wà ditwila dyà matè—Muf.] KuMutuuta pa. . . KuMubwikila mukusù kwisù, kàdi kwamba ne: “Mpindyewu, Udi mumanyè, mbangàmibile ne Wèwè udi mupròfètà.” Bònsò bwàbò biimàne manzàlànzàlè ne malènga, biikale bamutuuta mu mutù. [Mwanèètù Branham ùdi ùboobola cintu kampànda.] Bàmba ne: “Mpindyewu twambile nganyì wàKutuuci awu.” Yèyè ùvwa mumanyè uvwa muMutuute awu. Uh-huh. Ncyà bushùwà. Ùvwa mumanyè. Nwamònu anyi? Kàdi mudimu Wèndè wa bwambi ùvwa pabwipi ne kwashiibwa cifulu cyà butùmbi.

321 Ùtu ùkafika misangu yònsò mu cipidi aci cyà bìmwèka bu ne mmupùngile bikole, bikole menemene, ànu byètù byà mwambè kuya ebi, dîbà adi Nzambi ùwàsa cifulu cyà butùmbi.

Éyi Mukalenge, cyènzekèku. Cyènzekèku, Mukalenge.

Twinyikàayi mitù yètù.

Ndi muMunange, ndi muMunange

Bwalu Yèyè kumpàla. . .

Mpindyewu Mukukwilaayi. Twafùmu ku dipeta dilongesha dyùmè ncyông.

Ne wàkampetela lupàndu

Pa mucì wà Kàlvariyo.

322 Twèlàayi byanza byètù muulu mpindyewu kùdiYe.

Ndi. . .

Mpindyewu ikàlaayi mu Nyumà, nwamònu’s: “Ndi muMunangè.”

. . . Ndi muMunange

Bwalu Yèyè wàkannanga kumpàla.

Ne wàkampetela lupàndu

Pa mucì wà Kàlvariyo.

323 Mpindyewu, twìmanàayi kuulu, batwè makàsà ètù panshi.

Mu musambu wètù mukesè wà ditangalajangana naawù, tudi twimba citùminyi cyà kumpàla, netùlabulangane ku cyanza muntu ne mukwèndè; citùminyi cìbiiidi, netùwimbilè Nzambi. Éyo. Ne pashiishe netùtangalakè.

Mpindyewu, twìmbàayi:

Angata Dìna dyà Yesù wèndè naadi,

Wèwè mwànà wa tunyinganyinga ne dikènga;

Nedikupè disànkà ne busàmbi,

Nda naaDi kwònsò kúyaaya.

Dìna dyà musinga, Éyi dyà bupòle be!

Ditèkemena dyà buloba ne disànkà dyà Dyulu;

Dîna dyà mushinga, Éyì dyà bupòle be!
Ditèkemena dyà buloba . . . Dyulu.

³²⁴ Mpindyewu, vùlukàayi eci, mpinndyewu. Nendombè, mwakùnyàanyi wa balùme, mwab'ewu, ùmvwà nendè mu cibambalu mu tusunsa tukesè emu; mwa—mwakùnyàanyi wa mushinga mukolè, mpandanjila mu ma-Assamblées à mu cipèlè emu; ngàpù ne dîna dyèndè mwoyi, nemmulòmbè bwà kutangalajayè disangisha mu disambila patùdì ànu twimba citùminyi cìdì cilonda eci:

Angata Dîna dyà Yesù wèndè naadi,
Bu Ngabu ku butèyi bwònsò;
Ne pàakujìngilà mateeta ku nseke ne ku nseke,
Nungàna ànu Dîna dyà Cijila adi mu
disambila.

³²⁵ Tàngilàayi mùdì badémons buumuka díbà adi. Nwamònu anyi? Mpindyewu, vùlukàayi ne:

Angata Dîna dyà Yesù wèndè naadi,
Bu Ngabu ku butèyi bwònsò;
Ne pàakujìngilà mateeta ku nseke ne ku nseke,
Imàna ànu cyanàana, ne nungàna Dîna dyà
Cijila adi mu disambila.

³²⁶ Tàngilàayi cìdì cyènzekà. Éyo. Bònsò cyàpàmwè mpindyewu.


Angata Dîna dyà Yesù wèndè naadi,
Bu Ngabu ku butèyi bwònsò;
Pàakujìngilà mateeta ku nseke ne ku nseke,
(Cyùdì wenza ncinyi, mpindyewu?)
Nungàna ànu Dîna dyà Cijila adi mu
disambila.

Dîna dyà mushinga, (Dîna dyà mushinga!) Éyì
dyà bupòle be! (Éyì dyà bupòle be!)
Ditèkemena dyà buloba ne disànkà dyà Dyulu;
Dyà mushinga mukolè . . . (. . . ? . . . nwamònu's
mwàna mukesè wa bakàjì awu . . . ? . . .) Kaa
dyà bupòle be! (Lwàku apa, munanga wanyì.)
Ditèkemena dyà . . .

³²⁷ Panùdì biimàne kaaba aka apa: Cikondo cyà ndekeelu cìmvwà nsanganyibwa mu tabernacle, apa (Maamù ewu nyèwù ùdì munkaci mwà kuseka ne kufunkuna mwàna wa mu dibòko.), mwàna wa mu dibòko ewu ùvwa mukangibwe milonda yà balema. Ki yèyè ewu, wènda ùnyemakana lùbilu mwaba ewu, ùnàya byà kalolo leelù ewu. Kî mbîmpe anyi? Mukalenge àtumbishìbwe. Mpindyewu, tàngilàayi kùnu: Munanga wanyì, tùpika túng ùbàleeje, lwà kuneeku, mùshindù ùdì mwà kunyemakana. Nwamònu anyi?

Kaa, Dîna dyà mushinga mukolè,
 (Nwavùlukaayi bwà, Mèèsà à Mukalenge
 dilòòlò edi, mpindyewu.) . . . dyà bupòle be!
 Ditèkemena dyà buloba ne disànkà dyà Dyulu;
 Dîna dyà mushinga, Éyì dyà bupòle be!
 Ditèkemena dyà buloba ne disànkà dyà . . .

³²⁸ Mpindyewu twìnyikàayi mitù yètù. Nènku vùlukàayi masangisha à dilòòlò edi, mpindyewu; kàbidì kùdi Mèèsà à Mukalenge dilòòlò edi. Ne vùlukàayi bônso ne, nwênù, bàdi beena Kilstò abu, tudi tunùbìikila bwà kulwa kwangata neetù Mèèsà à Mukalenge. Tudi bindìle cikondo cyà dicyònkòmoka.

³²⁹ Mpaasàtà wetù wa mushinga mukolè, kaaba aka, Mwanèètù Neville, ne. . . Mbanganyi bàdi banangè Mwanèètù Neville? Ambàayi ne: “Amen.” [Disangisha didi dyàmbe ne: “Amen.”—Muf.] Tèèlèjàayi, bânà bèètù, ntèèlèjàayi mèmè bu wenù. . . bu umwe wa ku baampaasàtà bàà mu èkèleeziyà emu: Swikàkanàayi ne Mwanèètù Neville. Shààlaayi nendè. Nwamònu anyi? Yéyè mmusadidi wa Kilstò. Shààlaayi nendè. Bible mmwambe ne: “Tùdisangishaayi kaaba kàmwè: ne nangananga panùdi numòna ditùkù dibi edi dyènda ditàmbe kusemena.” Lwâyi mu masangisha, lwâyi; túbwelàayi ànu kubwela ne kushààla ku luseke lwà mpaasàtà wètù. Nwamònu anyi? Shààlaayi ànu nendè. . . 

62-1104M Mênà Mapendi à Nzambi
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org